

على حزب وداد قلبى

تأليف
فتحي سلامة



الهيئة العامة
للفنون والثقافة



سلسلة شهرية تنشر النصوص المسرحية الطويلة
لمختلف الأجيال وتحبى حركة النقد بدراسات نقدية

• هيئة التحرير •

رئيس التحرير
أبو العلا سلاموني
مدير التحرير
محمود الطويل
سكرتير التحرير
الحسيني عمران

الآراء الواردة في هذا الكتاب لا تعبر بالضرورة عن توجه الهيئة
بل تعبر عن رأي وتوجه المؤلف في المقام الأول.

• حقوق النشر والطباعة محفوظة للهيئة العامة لقصور الثقافة.
• يحظر إعادة النشر أو النسخ أو الاقتباس بأية صورة إلا بإذن
كتابي من الهيئة العامة لقصور الثقافة، أو بالإشارة إلى المصدر.

ملامحة نصوص مسرحية

تصدرها
الهيئة العامة لقصور الثقافة

رئيس مجلس الإدارة
د. أحمد نوار
أمين عام النشر
د. أحمد مجاهد
الإشراف العام
محمد أبو المجد

• على حزب وداد قلبى
• فتحي سلامة
• الطيعة الأولى،
الهيئة العامة لقصور الثقافة
القاهرة - ٢٠٠٦ م
٢٠٨ ص. - ١٢ فراسم
• تصميم الغلاف: أحمد الفياض
• المراجعة اللغوية: سماد عبد الحليم
• مملوح بدران
• رقم الإيداع: ٢٤٧٣٩ / ٢٠٠٦
• الترقيم الدولي: 2-140-437-977
• الرسائل،
باسم / مدير التحرير
على العنوان التالي: ١١٦ شارع أمين
سليمي - القصير الحسيني
القاهرة - رقم بريد ١١٥٦١
ت: ٩٩٤٧٨٩١ (داخل ١٨٠)

• الطباعة والتنفيذ:
شركة الأمل للطباعة والنشر
ت: ٣٩٠٤٠٩٦

علی حزب و داد قلبی

علی حزب و داد قلبی

على حزب وداد قلبى
وقضايا المهمشين

(تناول الكاتب المسرحى والروائى فتحى سلامة، العديد من القضايا الاجتماعية الوطنية والقومية خلال مسرحياته التى بلغت الآن ما يقرب من عشرين نصاً مسرحياً، أغلبها تم تقديمه على خشبة المسرح، ونعتقد بمتابعة تلك النصوص المسرحية أنها اتخذت لنفسها خطأ اجتماعياً انحرف إلى تناول القضايا الحياتية، وعلمنى الكاتب خصوصية بلون من ألوان الكوميديا الهادئة، وقد تناول العديد من نقاد المسرح عبر الصحف أو المجلات أو الكتب التى تناولت نصوص الكاتب بكثير من التحليل مثل كتاب المفكر عاطف عز الدين والذى تناول عدة نصوص محددة للكاتب وقدم لها تحليلاً علمياً، ربما نختلف معه أو نتفق، ولكنه فى نهاية دراسة استغرقت كتاباً كاملاً صدر هذا العام أما الكتاب المتفرق حول النص المسرحى للكاتب أو العروض المسرحية فقد تناولها العديد من الكتاب خلال رحلة الكاتب فى عالم النص المسرحى والتى امتدت أكثر من أربعين عاماً تقريباً.

وبدأ الخط المسرحى الذى تلازم مع الكاتب فتحى سلامة منذ تقديمه نصاً بعنوان : (ما بعد الخوف) الذى قدم على المسرح تحت

اسم «الخوف» وقدمته فرقة المنصورة القومية، وهو إرهابية مبكرة بما حدث فى الخامس من يونيو، واستكمل فتحى سلامة عرض هذه القضية التى تهيم (مستقبل وطن) فى نصه المسرحى الكليلى (خضرة الشريفة) الذى قدم على خشبة المسرح تحت هذا الاسم، وتكرر تقديمه أكثر من مرة وتطورت نظرتة لقضايا مجتمعه، فاستكمل ثلاثيته التى ناقش فيها قضية (كيف نسير)، أو كما قال توفيق الحكيم: (إن مسرح (فتحى سلامة) مهموم بوطنه، إنه يذكرنى بأعمالى الأولى) ومع هذا فإن بعض النقاد أشاروا إلى أهمية النص عند (فتحى سلامة)، وكانت مسرحيته الشهيرة (عقول للبيع). ويبدو أنه شعر أن المواطن والوطن وجهان يتماثلان وأن المواطن المؤلف الذى يكتب معبراً عن الإنسان فى وطنه يعانى أكثر من المواطن العادى، لهذا قدم مسرحيته (عقول للبيع)، إنها رحلة سيكوباتية داخل عقل المواطن المؤلف، ولكنه يعود فى مسرحيته (كلام فى كلام) إلى العقل الجمعى، إلى الوطن بمواطنيه، إن تلك العودة قال عنها لويس عوض: (إنه يحمل هموم مجتمعه فى جوفه، فلا يجد مناصاً من سرده)، ثم يمتزج الخطان عند فتحى سلامة الكاتب المسرحى فى العديد بعد ذلك من المسرحيات مثل (حفلة طلاق) التى استمر عرضها أكثر من سبعة أعوام ثم (باحبك

باحبك) وهى معالجة لقضية الوهم الإنسانى (الفردى والجمعى،
الوهم الحب والوهم بالعطاء والوهم البطولة، ولكن هذا وهم لا
يقف فى وجه تحديات العصر الراهن، ويتحاور فتحن سلامة مع
نصوصه فيقدم (حب على ورق) و (يعملوها الكبار) و(مجرم
عاقل جداً) ويكتشف أنه لم يقتحم بيت الأسد بعد، وأنه تناول هذا
(الصوت الأسرى) أو هذا الوهم البطولى فى مسرحيته (خضرة
الشريفة) بشيء من التعجل أو كما يقول الناقد الأستاذ محمد
بركات فى مقال له فى مجلة الوطن العربى: (إنه يرفض منطق
القطيع، منطق أن نكتفى بتنفيذ أوامر عليا... وهذه وجهة نظر
جديدة فى زماننا هذا ولكنها لم تأخذ الحجم المعقول للإفصاح
عنها)

على حزب وداد قلبى

نحن هنا أمام قضية المهمشين، وفى المسرحية نرى مجموعتين
منهم، أولاهما من كان يظن أنه مسئول ورجل مهم فى الزمن القديم،
ثم زال زمنه وأصبح لا شيء، ويمثل هذا التيار (الباشا) ثم الشباب
الذى لا يعمل ويشعر أنه محروم من وجود فرصة له فى الحياة
العامة، ثم مجموعة التجار التى أثرت وتبحث عن فرصة للظهور، إن
هؤلاء جميعاً يشعرون أنهم يجب أن يكون لهم دور مهم فى قيادة

الاجتماع، وقد توحدوا جميعاً فى هدف وهو إيجاد مكانة لهم فى صدور القيادة ولكنهم لا يملكون الوسائل لتحقيق هذا الحلم ومن خلال الصراع ما بين الرغبة والأمل وبين الواقع الذى لا يزال يرفض هؤلاء المهمشين الذين تربوا وفقاً لقاعدة السير بجوار الحائط ومن خلال أحلام، ربما تبدو فى الظاهر، مختلفة ومتضاربة، ومن خلال واقع كل فئة والتى تبدو أيضاً مختلفة إلا أن هناك رغبة جارفة فى تحقيق الأحلام، لماذا لا يوجد لهم مكان تحت الشمس، والجميع.. على الرغم من التضارب الظاهرى.. يتضافرون فالزعيم الذى صنعوه كانت لديه إمكانية الزعامة ولكن لا يملك قدراتها ويتقدم (المثقف) الذى يعرف كيف ينسق الخطب ويضع البرامج والخطط لكى يكمل دور الزعيم ويكتب له الخطب، ويرسم الشعارات، ويقدم (تجارة الخردة) التمويل اللازم فى مقابل المناصب التى سوف يتقلدونها لو أن الحزب انتصر فى معركته، إنهم لا يهتمون بقيمة الخطط والشعارات، إنما كل ما يهمهم هو النصب وبريقه ولمعانه، إنهم يشعرون بأن حقهم فى تلك المناصب البراقة اللامعة على المستوى الاجتماعى. وهناك من كان ذا منصب ثم فقدته بتقدم السن أولاً وارتكابه المخالفات التى أدت إلى إبعاده سابقاً فإنه يقلد نفسه المنصب السياسى الذى اختاره بنفسه من مناصب الحزب المزعوم،

ويقوم بالفعل بما يستوجب عليه ذلك المنصب ، إنه يعيش الوهم واقعا ، وفعلا ، وحيث لا تضارب فى المصالح بعد أن اختار كل منهم المناصب التى يفضلها فإن الاتحاد الذى شمل هؤلاء المهمشين هو الذى دفعهم إلى الاعتقاد بأن ما يقومون به بالفعل واقع مؤكد ، وهو غير ذلك ، إن منطق الأحداث لهؤلاء المهمشين متسق معهم ولكن غير متسق مع الواقع ، ولهذا فإنهم ينفصلون عن هذا الواقع ، وعلى الرغم من أن أحلامهم مشروعة وفقا للقاعدة الديمقراطية إلا أنهم لم يعرفوا كيف تسير القواعد وكيف يسخرونها لتحقيق أحلامهم ، إن (حزب الوداد) الذى يجمع هؤلاء المهمشين فى تكتل سياسى يحقق لهم أحلامهم ، عيبه فقط أنه لا يسير وفق قواعد العمل السياسى الديمقراطى . نحن فى أشد الحاجة إلى حزب لهؤلاء المهمشين ولكن على أن يقوم وفقاً للقاعدة العامة التى وضعها المجتمع ، وعلى الرغم من اختفاء الصراع هو الخحك الأساسى للمسرحية .

والمؤلف برع فى تصوير شخصياته

بحيث تبدو فردية الصراع ، إلا أن الحتمية الدرامية تسوغ ذلك الصراع ، إن (الزعيم) الذى لا يملك مقومات الزعامة ، ولا يملك غير قصره العتيق ولقبه الذى فقده ، إلا أنه يشعر أنه يجب ألا يقلد أحداً ولا يجب أن يخطب من خطب سابقة التجهيز من مجموعة المثقفين ،

يجب أن يقول خطبة بما تجمع فى نفسه، ولأنه غير صالح لهذه المهمة وغير قادر عليها فإنه يعانى معاناة قاسية بين الرغبة فى الكمال وبين إحساسه بعدم أحقيته فى هذا الكمال، هذا الصراع الذى قاده المؤلف لكى يعبر به عن أهمية قضيته ولكن ما هى قضية المؤلف فتحن سلامة، القضية التى يحملها على كاهله طوال سبع عشرة مسرحية، هى كيف يقود الفرد مجتمعه نحو الأفضل من الحياة، ويتضافر مجتمعه معه لكى يصلأ معاً إلى الحياة الأفضل، إن السلوك الفردى يؤثر سلباً وإيجاباً على السلوك العام، ومن التنشئة الاجتماعية يأتى الإنسان الاجتماعى الذى يملك ضميراً جميعاً ويقع تحت ضغط عقل جمعى، ومع هذا فأنا موافق رأى الدكتور إبراهيم حمادة: (إن قراء النص المسرحى ليسوا جميعهم على درجة عالية من القدرة على التخيل وخلق عوالم متكاملة الحركة والصورة واللون فى مخيلاتهم) ولهذا نرى أن بتجسيد العمل على خشبة المسرح يصبح العمل المسرحى متكاملأ، ولكنى قرأت معظم نصوص الكاتب فتحن سلامة وأستطيع القول كما قال توفيق الحكيم فى مقدمة مسرحيته (مجرم تحت الاختبار) التى أعدها الكاتب عن إحدى مسرحيات الحكيم، يقول توفيق الحكيم: (إن الإحساس العميق بأهمية المسرح لأنه من المجتمع جعل فتحن سلامة يكتب وهو

يصب كل خيالاته على خشبة المسرح، بحيث يبدو النص المسرحي عند فتحي سلامة واضحاً في مخيلة القارئ) وقد حدث هذا في مسرحية (مجرم تحت الاختبار) ولنا كلمة أخيرة، الكاتب فتحي سلامة كما يقول الناقد عاطف عز الدين في أطروحته العلمية (قراءة في مسرح فتحي سلامة) وهو دراسة علمية تعتمد كلياً على النص المقروء لفتحي سلامة، ويقول الأستاذ عاطف عز الدين: (إن الحوار في مسرحياته يعطينا دلالة كافية عن شخصيات مسرحياته والعمل الذي بين أيدينا يعد عملاً واضحاً يعبر عن مقدرة الكاتب الذي قدم العديد من المسرحيات التي لاقت نجاحاً كبيراً مثل (حفلة طلاق) و(ممنوع دخول الستات) و(عشرة على باب الوزير) ونعتقد أن هذه المسرحية تعتبر إضافة مهمة للمسرح العربي، نحن في البداية أمام مشكلة البطالة التي تنهش نهشاً في جسد المجتمع، فهؤلاء الذين تخرجوا في الجامعة يريدون عملاً حتى يمكنهم ممارسة الحياة الاجتماعية السليمة، ولكن قلة الأعمال وأيضاً الطريقة التقليدية للبحث عن العمل لأن من يريدون العمل يبحثون عنه بين المكاتب، إنهم يحاولون تقليد الجيل الماضي، الوظيفة الميرى ولعلنا نرى أن الاحتلال (اللورد كتشتر) تحديداً، أراد أن يجعل من المدارس أماكن تفريخ للموظفين، وتمادت الحكومات بعد ذلك بعد أن مضى

الاحتلال، فى تنفيذ هذا المخطط الرهيب الذى أدى إلى اعتماد خريجي المدارس والجامعات على الحكومة لتوظيفهم فى وظائف إدارية لا تعطى مردوداً فعلياً، إنه جهاز الحكومة الذى يعمل أساساً لخدمة المجتمع، ولكنه فى حاجة إلى المادة، وجاء الشباب إلى (سرايا الباشا) المخلوع لكى يوفر لهم الوظيفة، وقد أخطأت الحكومات الخريجين. الأمر الذى أدى إلى ما يمكن أن يسمى البطالة فاعل، وجود لا وجود له، وهؤلاء بالملايين، ولا بد لهؤلاء أن يمارسوا الحياة بصورها المختلفة، وأيضاً كان من مجموعات المهتمين بآثار الخردة والتجارة شطارة، إنهم يعملون فى أشياء غير ذات قيمة، ولكنهم كونوا ثروات، وأصبحوا يملكون البيانات والمجموعات التجارية، أصبحوا يملكون المال والحكومة تحصل منهم أحياناً بعض الضرائب، لأنهم يعملون معظم أعمالهم بعيداً عن الأضواء، مثل الباعة الجائلين وبائعي مخلفات الذبح، وجامعي القمامة وجامعي الخردة، إنهم أثروا ثراء فاحشاً، ولكن الثراء لم يعطهم شيئاً إلا المال الذى يتزايد باستمرار وهم الآن يريدون أن يكون لهم منصب مهم فى إدارة الحكومة أو فى الحزب، إن بائعة (الكراشة) لا يكفيتها ما تجمعها من أموال، إنما تبحث عن مكانة اجتماعية، إنها تعرف بالسليقة ماذا يعنى عضو البرلمان، أو عضو الحزب أو عضو الحكومة ولأن

الديمقراطية تتيح لها الاشتراك في الأحزاب فإنها ترغب في دخول الأحزاب، ولكن الأحزاب الموجودة لها كوادرها وناسها، فهي لن تستطيع دخول الأحزاب الموجودة، فلماذا لا تدخل في حزب جديد بل لماذا لا تقوم هي بعمل حزب جديد (على كيفها) وكما تريد بائعة (الكرشة) يريد بائع الروبائيكيا، إنه أيضا لا يريد المال الذي يمتلكه بوفرة، إنما يريد الدخول في دائرة الضوء، يريد أن يصبح هو الآخر نجما في التلفزيون، يقول كلاما لا معنى له في الإذاعة... لا يقل عن هؤلاء الذين يتكلمون ليل نهار، لهذا لا يمانع من الاشتراك في إقامة الحزب، أما الفئة الثالثة أصحاب المعاشات الذين عاشوا تجربة العمل الوظيفي وكانوا من أوائل من قدموا العمل على المصالح الشخصية، فإنهم يرون الحال المائل الذي أصبحت عليه الخدمات الحكومية من تعليم إلى صحة فإنهم يرون أنهم الأجدر باحتلال مناصب الإشراف على الخدمات الحكومية وهؤلاء أيضا لا يقدرّون على الدخول في الأحزاب الموجودة ولأنهم أكثر دراية بالروتين الحكومي فإنهم لا يمانعون من الدخول في تأسيس حزب خاص وفي نفس الوقت يتولون بالفعل تنفيذ عمليات الإشراف والإصلاح، إنهم في عجلة من أمرهم والجميع يندفعون نحو إقامة الحزب ويساعدونهم بطموح الشباب وبعقولهم المتفتحة، لكي يحولوا حلم

هؤلاء إلى واقع، والحقيقة كوننا نصدق هؤلاء الذين يحلمون،
وكوننا نتعاطف معهم، نحن أيضاً نريد مكاناً تحت الشمس، نريد
أن يكون لنا صوت مسموع، لماذا نقف نحن في الضل لا نتكلم
والآخرون يتكلمون بلساننا، إنهم يتحدثون بالنيابة عنا، آن الأوان
لكي نتكلم نحن وقد نجح المؤلف في جرننا معه خلال تلك الفانتازيا
التي جمعت بين الحلم والواقع، بين ما يمكن تحقيقه بالفعل وبين
المستحيل، إنه عالم خاص، عالم ليصل إلى حد التمازج مع ذلك
المستحيل، إنها- فعلاً وحقاً- فعل درامي جديد وجيد ..

أ. د. مصطفى السعدني

أستاذ الأدب العربي، بجامعة الزقازيق

علی حزب و داد قلبی

شخصيات المسرحية

- ١- عصمت سيد العدل الديداموني : باشا سابق.
- ٢- خليفة : طالب وظيفة .
- ٣- إسماعيل : خادم عصمت .
- ٤- بيومي : الجزار .
- ٥- نبوية : زوجة بيومي الجزار .
- ٦- زتون : مدرس على المعاش .
- ٧- زيزى : راقصة .
- ٨- الدكتور لطفي .
- ٩- جرجاوى : فلاح صعيدى .
- ١٠- فاتن : صحفية شابة .

الفصل الأول

المنظر: (صالة كبيرة لفيلا من الفيلات القديمة ذات الطراز

العتيق، مرايا على جوانب الصالة، صور لرجال

وسيدات فى ملابس رسمية مما يوحى بالعز وعلو

المركز، قنايات فخمة، مقاعد ذات طرز معروفة فى

عالم الأثاث، ولكنها متسخة إلى حد ما، وتميل إلى

القدم.

فى عمق الصالة يوجد على مائدة حديثة من المعدن

ماكيت لبرج سكنى، ثم مجموعة لافتات كبيرة من

الكرتون موضوعة بشكل فوضوى لا ترى ما هو

مكتوب عليها، سلم يؤدي إلى أعلى فى اليمين، فى

اليسار باب للدخول إلى الصالة من الزجاج الحديد،

الصالة عمومًا توحى بالشراء إلا أنها قديمة إلى حد

ما، يفتح الستار على دخول بيومى الكومى وهو

يحمل ساطوراً وفى يده إسماعيل الخادم العجوز).

بيومى: عاوز تجرى منى، لا يا حدق... مش عليا أنا الحركات

دى.

إسماعيل: أنا فى عرضك يا معلم سبنى ، أنا ما ليش ذنب .

بيومى: مش قبل ما ينزل سيدك البيه .

إسماعيل: الباشا مش هنا .

بيومى: البيه بتاعك خلاص نزل عليه التخفيض بقى بيه ،

ومش رسمى كمان ، إحنا يا خويا لغينا الباشوية

وتوابعها من مليون سنه وانت نازل .. الباشا ..

الباشا (يحرك إسماعيل فى يده) لأ بقى .. البيه

ومش رسمى كمان .

إسماعيل: أمرك يا معلم .. البيه مش هنا .

بيومى: يبقى هادبحك .. اتشاهد على روحك ..

إسماعيل: إعمل معروف أبوس ايدك يا معلم .. أنا مالى بس

ومال الشغلانة كلها .. أنا عندى عيال أبوس ايدك

سبنى وأنا أمشى من هنا خالص .. أسيب السرايه

بحالها .

بيومى: مش قبل مادبحك .. اتشاهد على روحك ..

إسماعيل: يعنى خلاص .. مافيش فايده ..

بيومى: ما هو يا تقولى البيه بتاعك فىن يادبحك .

إسماعيل: ما اقدرش .

بيومى: اتشاهد على روحك .. اللهم صبرك على ما بلاك ..
هادبحك على الطريقة الشرعية .. مبسوط ..
واكتب عليك ذبح بالطريقه الشرعيه .. زى كل
علب البلوبيف .. وارده من أيها حته يروحوا حطين
عليها ذبح بالطريقه الشرعيه .. بقى دا كلام يا عم
إسماعيل معقول كل العلب دى دبحوها بالطريقه
الشرعيه .

إسماعيل: اعمل معروف هاخلص فى إيدك يا معلم بيومى
بيومى: يبقى نتوكل على الله .. (يرفع يده بالساطور)
نبوية: (داخلة) انت بتعمل ايه يا مفتري .. سيب الراجل
(تدفع إسماعيل بعيداً)

بيومى: نبويه .. إيه اللى سيبك المديح دلوقتى ..
نبوية: انت عاوز تخش اللومان .. سيبه .. إجرى يا راجل
انت (إسماعيل يهرب إلى الداخل)
بيومى: بقى كده يا نبويه .. طيب تعالى انتى بقى (يندفع
نحو نبوية)
نبوية: يا خرابى .. انت إيه لازم تدبح كل يوم .. النهارده
التلات يا معلم .

بيومى: الكلام ده مش عندنا .. مش انتى اللى خلصتى
الهايف ده .. يبقى تعالى (يجرى خلفها) (يدخل
إسماعيل فى خوف)

نبوية: (بصوت عالٍ) يا لهوى .. الحقونا يا خلق .. الحقونا
يا عالم .. اتحرك يا راجل انت .. اعمل معروف يا
معلم بيومى .. مش كده .. انت واقف ساكت ليه
(تحاول الاحتماء بإسماعيل)

إسماعيل: (فى شجاعة) اسمع يا معلم .. انت عاوز تعرف
الباشا فىن؟

بيومى: قلت لك البيه.

إسماعيل: (فى شجاعة يحاول حماية نبوية) انت إيه يا أخى
ما حدش قدك .. هو ده اللى انت فالح فيه .. البيه
مش الباشا .. وهادبك هادبك .. زهقتنى من
حكاية هادبك دى .. عامل عليا أنا سبع وأول ما
تشوف الباشا تعمل خروف ..

بيومى: إسماعيل؟

إسماعيل: عمك إسماعيل .. كفايه بقى وروح شوف شغلك ..
ما فيش برج هايتبنى .. الفلوس اللى أخذها منك

طارت .

نبوية : يا لهوى .. بتقول إيه يا راجل انت ؟ (تحاول

الإمساك به)

إسماعيل : اللى سمعته يا مرات المعلم أبو كرشه .. البرج

آه .. ورق كرتون إذا كنتم عاوزين تسكنوا فيه

إتفضلوا (مشيراً إلى ماكيت البرج السكنى) .

بيومى : يعنى إيه .. كرسى فى الكلوب والفرح شطب ؟

والباشا بتاعك تذكرة طياره وقلع ؟

نبوية : لأ يا بيومى فلوس أهلى ما يروحوش أونطه .. انت

لامم من اخواتى ميت ألف أهيف ..

بيومى : وأنا دافع زيهم يا وليه .. دا إذا كان كلام الراجل

إسماعيل ده صحيح تبقى ..

نبوية : وهو ها يكذب ليه .. دا الشغال اللى عنده وعارف

كل أسراراه بيقولك الفلوس طارت .

بيومى : دا انا أطيّر رقبتة قصاها .

خليفة : دستور يا أهل الدار .. دستور (داخلاً)

بيومى : انت مين انطق (يستدير فى غلظة نحو خليفة

ويعسكه فى عنف)

خليفة: يا عالم غرقان لشوشته يا جدعان من أولها!

بيومي: إنطق انت مين؟

نبوية: بيومي.. الواد يروح منك فطيس.

بيومي: اسكتي انتي خالص.. انت مين يا وله؟

خليفة: وله.. أنت بتقول وله.. وكمان ما انتش عارف أنا مين..

نبوية: بيومي.. دا مباحث (يطلقه بيومي بسرعة)

خليفة: أيوه أنا مباحث.. مباحث عن شغل.. أنا عاوز مدحت بيه.

نبوية: مدحت بيه مين يا سعادة البيه (خليفة في احترام)

خليفة: (مقلدا بيومي) انتي تبقى مين؟ انطقي.. انتي مين؟

نبوية: أنا خالتك نبويه بتاعة الكرشه مرات المعلم بيومي

(مشيرة إلى بيومي)

خليفة: (في كبرياء) أهلاً وسهلاً.. أهلاً.. إنتوا بتعملوا

هنا إيه.. وازاي ما تعرفوش مدحت بيه صاحب

السرايه دي..

بيومي: مدحت مين ده يا عم اسماعيل

إسماعيل: عاوز إيه يا حضرة؟

خليفة: عاوز آكل عاوز أشرب عاوز أنام ما أعرفش ليه ..
عاوز زميلي وحبي وصديق العمر مدحت بيه
عصمت سيف العدل الديداموني .

إسماعيل: مدحت بيه .. هو وصل ؟
خليفة: هو مش هنا (يجلس) يبقى زمانه جاي .. أنا هاقعد
استناه هو دايما كده .. كان يطلع معنا بعد
المحاضرات كلنا نروح وهو لا .. يفضل قاعد في
المكتبة .. عارف يا عم ..

إسماعيل: اسماعيل
خليفة: كان دايما يطلع الأول مع إنه مش بيداكرو .. مش
عارف ليه ؟!

بيومي: مدحت بيه ده مين يا عم اسماعيل ؟
إسماعيل: ابن الباشا الكبير ..
خليفة: (مقاطعاً) بس إيه يا عم ..
نبوية: عمك بيومي يا خويا .. عمك بيومي الجزار .
بيومي: صاحب محلات بيومي بروتين والست حرمه .
خليفة: انت بقى بتاع اللي ما تتسماش .. إنت بقى اللي
واقف على الخشبه اللي زى شجرة الجميز دى

وهات يا تقطيع .. يا راجل حرام عليك نشفت
ريقى .. رايح جاي عليك سبع سنين وانت ولا
سائل وهات يا تقطيع .. هات يا خبط ورزق ..
أروح احوش السبعه جنيه وأول ما اهورب منك
أسمعك بتقول للراجل اللي بيترعش قدامك
قولنا تسعه .. مش عاوز كتر كلام .. أروح
ماشى .. السنة اللي بعدها أكون حوشت التسعه
وأول ما اهورب .. قولنا حداشر قلت إيه ؟ قلت
إيه .. لا إله إلا الله .. مش واكلها .. وانت كمان
قلبت الدكان سوبر ماركت وغيّرت اسمها ..
بس عفّارم عليك سميتها بروتين .. أحسن
برضه .. ما هو كده مش هاعرفها .. تقولى بقى
حداشر سبعتاشر .. مين .. ولا أنا هاسأل فيك
مهما تعمل أنا مش ممكن أكلمك .. أصل أنا
مخاصمك .. يا بواخه .

بيومى: جرى إيه يا افندى .. إيه الكلام الشغت بتاعك ده ..

إسماعيل: انت مين حضرتك ؟

خليفة: خليفه عبد ربه حسانين التريمى من دشنا مركز ميت

غمر ليسانس آداب دفعة ٨٢ بتقدير جيد جداً.

إسماعيل: عاوز إيه خلصني إنت كمان؟

خليفة: مدحت بيه.. زميل مدحت بيه..

إسماعيل: (فى سعادة) زميلك.. انت كنت معاه فى..

خليفة: (فى سعادة) أيوه يا عم إسماعيل.. أيوه.. قاعد

معاه فى حته واحده.. ماشى معاه فى كل مكان..

يقولى يا خليفة.. أقوله يا مدحت على طول.

بيومى: مدحت مين ده يا عم إسماعيل؟

إسماعيل: بقولك ابن الباشا الكبير.

خليفة: ولد.. إنما إيه (فى تباهى) ولد.

بيومى: هايديني فلوسى؟

خليفة: فلوسك.. إيه فلوسك دى يا عم إنت.. مدحت ده

الوحيد اللى لا يمكن يا كل حق حد.. مدحت انت

أصلك ما تعرفوش.

نبوية: ربنا كريم يا بيومى.

إسماعيل: ابسط يا معلم بيومى.. آهو جالك مدحت بيه..

صحيح أنا أشهد عمره ما أتأخر فى طلب لك يا عم

اسماعيل.. بس انت كنت معاه؟

١
خليفة: أحلفك علشان تصدقنى.. أنا زميل مدحت.. هو
بس أنا.. أصل جواب القوى العاملة أتأخر عشر
سنين بس..

بيومى: اسمع يا أستاذ خليفة.. أنا قاصدك فى معروف..

خليفة: بوس إيدي (يمد يده)

بيومى: انت بتقول إيه؟

خليفة: اللى سمعته.. بوس إيدي وأنا اسمع.. ما أنا
مخاصمك يا بتاع اللى ما تتسماش بوس (يمد له
يده)

نبوية: بوس يا بيومى.

بيومى: يا وليه.

خليفة: بوس يا أخى وخلصنا.

بيومى: (يقبل يده) وبعدين..

خليفة: قول انت بقى وأنا أسمع..

بيومى: مدحت زميلك ده راجل حقانى صحيح؟.. يقدر
يمشى كلامه على أبوه؟

خليفة: على أبوه وعلى جده.. دا كان بيمشى كلامه على
عم حافظ..

بيومى: مين عم حافظ ده؟
خليفة: المعاون.. إنت ماتعرفوش؟
نبوية: المهم يا خويا.. نقدر ناخد فلوسنا من البيه؟
بيومى: لأ أنا عاوز الشقة اللى حاجزها.
نبوية: وانا عاوزة الفلوس الميت ألف.
إسماعيل: قولى يا ابنى (يحاول جذب خليفة جهته ولكن نبوية تشده ناحيتها)
نبوية: تعال هنا قولى.. أنا الأول.. مدحت زميلك ده معاه فلوس (تجذبه نحوها)
خليفة: للركب.
إسماعيل: يا أستاذ خليفة (ياخذه نحوه)
بيومى: عم اسماعيل.. استنى.. روح اعمل شأى للبيه.
نبوية: أيوه يا اسماعيل.. روح هات له حاجه ساقعه
بيومى: خد.. وهات لنا كلنا (يتحرك إسماعيل إلى الخارج بعد أخذ الفلوس)
خليفة: أنا عاوز لحمه..
نبوية: بعدين قولى بس..
خليفة: ما هو انا اعرف الأول الحكاياه إيه.. أفهم يا ناس..

أفهم.

بيومى: عصمت بيه..

خليفة: أبو مدحت؟

نبوية: أيوه.. عمل إعلان فى الجرنال إنه هايعمل برج الوداد..

خليفة: أبو مدحت؟

بيومى: أيوه يا أخى.. رحى جاي وحاجز عنده أربع شقق..

نبوية: بكتير يا سيدنا البيه

خليفة: أكيد بكتير.

بيومى: الميتين ألف جنيه دفعناهم تحت الحساب لعصمت بيه..

خليفة: أبو مدحت؟

بيومى: أيوه.. اسمع أمل.. وفاتت سنه..

نبوية: وراها سنه..

بيومى: قول خمس سنين دلوقتى..

نبوية: لا استلمنا الشقق ولا شوفنا حتى البرج..

إسماعيل: (داخلا) الساقع يا معلم.

خليفة: (ياأخذه منه) يدوم يا عم اسماعين.. اتفضلوا..

والله زمان يا مدحت .. ما كنش حد يدوقنا البتاع
ده إلا هو .. ويحلف والله لا انت شارب وانا اقول
مش عاوز يا مدحت .. لكن هو إيه .. يروح فاتح كام
واحدة .. هو دا البرج (يذهب عند البرج)

بيومى: دافع فيها ميت ألف ومراتى واخواتها ميت ألف ..

نبوية: دا غير اللي جمعه عصمت بيه من بقية الناس ..

خليفة: كام دور ده يا معلم؟

بيومى: خمسة وعشرين دور وكل دور فيه عشر شقق ..

خليفة: ٢٥٠ شقه .. وأنا مش لاقى متر تراب أنام عليه !!

نبوية: وعلى كده الشقه بكام .. بميتين ألف أهيف وحياتك

يا سيدنا الأفندى ..

خليفة: ٢٥٠ شقه فى ميتين ألف .. واتبنى البرج ده؟

بيومى: ولا شوفنا منه طوبه ..

نبوية: إحنا اللي نستاهل يا بيومى .. إنت السبب .. ما لها

الحته اللي ساكتين فيها .. ما عندنا بدل البيت

عشره وبدل الشقه عشرين .. لأ لازم نسكن على

النيل ..

بيومى: يعنى هانفضل ساكتين فى العزبه طول عمرنا ..

نبوية: أديك طلعت منها .. وخسرت تحويشة العمر

خليفة: إيه الحكاية يا عم اسماعيل ؟

إسماعيل: اللي سمعته يا زميل مدحت بيه .. اللي سمعته ..

خليفة: يعني أبو مدحت ..

بيومي: ريحني يا ابني .. مدحت ها يقدر يسدد لنا الفلوس ؟

خليفة: طبعا .. هو مدحت فين يا عم اسماعيل ؟

إسماعيل: انت ما انتش عارف مدحت فين ؟

خليفة: لأ ..

إسماعيل: تبقى أحسن تسكت خالص .. (منصرفاً إلى

الداخل)

خليفة: هو إيه الحكاية ؟!

بيومي: اسمع يا أستاذ خليفة .. أنا هاجيلك على المشفى ..

ها أديلك عشر بواكى لو قدرت ترجع لنا الفلوس ..

واهو انت بتقول مدحت ابن عصمت بيه راجل

حقاني .

نبوية: آه .. مش ها يقبل فلوس الغلابه اللي زينا ..

بيومي: وآدى الكارت بتاعى .. ها استنى منك تليفون ..

نبوية: احنا هانمشى يا معلم ؟

بيومى: يا وليه طولى بالك .. خليفه بيه هايتصرف .
نبوية: لازم بيه هو اللى يتصرف .. ما تتصرف انت .. انت
مش زيهم ليه ؟

بيومى: نبوية ..
نبوية: سكت يا معلم .. سكت .. حاضر .. عن إذنك يا
بيه .. إتصرف إنت يا بيه .. ما هو بيه برضه هو
اللى أخذ فلوسنا .. بقى لو كان المعلم فتوح واللا
المعلم بدوى أخذوا منك مليم ومارجعوهش .. كنت
سكت ؟

بيومى: نبوية !!
نبوية: ها اسكت ها انكتم .. عشان بيه ساكن فى سرايه
دفعت له كل فلوسك وحتى من غير ورقه ..
هانكتب فى الشهر العقارى يا بيومى .. حاضر يا
جناب الباشا .. الشهر الجاى .. المهندسين ها يحطوا
الأساسات يا بيومى .. ربنا يخليك لينا يا سعادة
الباشا .. آهو الباشا لهف فلوسنا .

بيومى: نبوية !!
نبوية: (خليفة) عن إذنك يا بيه .. ابقى اتصرف .. ولما

تتصرف ما تبقاش تاكل الفلوس فى بقك ..

(تخرج)

بيومى: خليفه بيه .. اعمل معروف .. اصل ليها حق ..

دافعه واخواتها مبلغ مش قليل ..

خليفة: معلم أنا كنت عاوز اقولك ..

بيومى: أنا عامل حسابى .. خد (يناوله بعض الأوراق

المالية)

خليفة: إيه دول ؟ (وهو يمسك النقود)

بيومى: تحت الحساب .. ما تدقش .. سلام (خارجاً)

خليفة: (ممسكاً بالنقود) نعم .. ما تدقش .. حساب إيه ..

أخلص إيه .. يا خليفه بيه .. يا خليفه بيه .. عشر

ستين مركون على الرف يا عالم قاعد جنب أمى ..

كل يوم أمى تغرز عنيتها فى وشى أغرز أنا عيني فى

التراب ، لا شغله يا أمه ولا مشغله ابنك ما

علموهش غير النقل من الكتب .. الباب الأول

مدركات المحسوسات بواسطة العقل الثقلى .. قال

الفيلسوف نيلسون جاب الحق عوضين .. أن العقل

المدسوس فى برام الرز الرشيدى يدفع عنه القوى

الثاقبه عن المعلول دون إدراك علة الخلالات وهات يا
حفظ... وآخر السنه يا نقل... ومبروك يا خليفه
بقيت من العلما... معاك ليسانس مفتخر درجه
أولى بالتكليف... قعدت جنبك يا امه مستنى
الجواب الميرى. لكن الميرى اتأخر يا امه... اتأخر
قوى... اتأخر بعد ما شال كل تروس المكن اللي
جوايا وخلاها ورق كربون... باهت... الكتابه فيه
مش باينه...

زتون: (داخلًا) أكيد حضرتك السكرتير (نموذج
للمدرس الابتدائي القديم)

خليفة: وأنت تطلع إيه إنت كمان؟

زتون: زتون عرض زتون (فى مباهاة واضحة)

خليفة: أهلاً... أكيد سعادتك جاى تسأل على مدحت بيه

زتون: أبوه عم اسماعيل قالى... ان مدحت بيه وصل...

خليفة: الحمد لله... أخيراً وصل مدحت... يا أخى تعالى

شرف اللى بيحصل فى بيتكم (ينادى بصوت

عالٍ) يا مدحت... مدحت...

زتون: إسمع بس يا أستاذ...

خليفة: خليفه.. خليفه عبد ربه حسانين التريحي من دشنا

مركز ميت غمر.

زتون: تشرفنا يا أستاذ خليفة.. أنا عاوز خدمة إنما إيه..

خدمة العمر..

خليفة: إوعى تكون بتاع لحمه ومستخبي ومسمى نفسك

بروتين

زتون: ظريف.. أنا الأستاذ زتون مدرس العلوم والرياضه.

خليفة: مدرس؟!

زتون: إيه تعرفنى؟

خليفة: وهو فيه حد ما يعرفش المدرس.. قم للمدرس وفه

التبجيلا..

زتون: إسمع بس يا خليفه بيه..

خليفة: حتى انت كمان خليفه بيه.. هو حد خرينى من

جوا اللا اللى زيك .

زتون: ابن نكته سعادتك.

خليفة: أنا ابن.. واللا على إيه.. إيه حكايتك انت

كمان.. لازم اشتريت شقة فى برج الدلال والخفه

بتاع عصمت باشا سيف العدل الديدامونى..

زتون: لأ شقة إيه بس.. انا مستثمر فى شركات الدلال

اللى عاملها عصمت باشا.

خليفة: شركات إيه يا خويا؟!

زتون: الظاهر حضرتك مش مصدق.. وآدى الأوراق اللى

تثبت.. أنا مساهم باسمى وباسم أولادى وعائلتى

بـ ٧٥٠ ألف الفرنجى وزيهم عربى.

خليفة: حضرتك؟ (يمسك بالورق)

زتون: شغل عشر سنين شغل يهد الجبل والله يا سعادة

البيه.. من الفجر لغاية تانى يوم الفجر.. عشر

سنين أشغال شاقه لغاية ما جمعت الفلوس دى..

وقلت استريح بقى.

خليفة: (مكملًا) واحط الفلوس فى البنك..

زتون: يا ريت!! وأنا حاططهم عندكم فى شركة..

خليفة: الوداد والخفة! (ضاحكًا) حلاوة زمان يا ملين..

بالجوز يا عسليه..

زتون: ظريف.. اسمها شركة الوداد للاستثمار والتنمية.

خليفة: لسه تانى استثمار.. بعد دا كله، ما اتفقست يا

افندى.. ما طلعت تهليب وتهذيب وإصلاح.

زتون: لأ مش شركتنا .. قصدى مش شركتكم، عصمت

باشا ورأنى بنفسه أوراق التوفيق.

خليفة: توفيق؟ المهم وبعدين .. أنا مالى.

زتون: لأ فى عرضك .. عم اسماعيل بيقول إن مدحت بيه ..

خليفة: صاحى .. حبيبى صديقى الروح بالروح ..

زتون: عشان كده لازم تخدمنى .. بقالى سنتين ما صرفتش

مليم .. لا أرباح ولا حتى قادر بس آخذ حق الدوا ..

خليفة: مش ممكن .. إزاي؟

زتون: الأوراق أهه (بريه مجموعة أوراق) .. إحنا كنا

بنصرف أرباح شهره ١٥ ألف دولار و ١٥ ألف

جنيه.

خليفة: حلوقوى .. عاوز إيه بقى؟! .. ما هى كتير اهه

زتون: دى تحت الحساب، عصمت باشا قالنا ان الأرباح

مش هاتقل عن ٣٨ أو ٤٠ فى الميه .. وأنا بقى لى

سنتين ما صرفتش الأرباح .. يعنى أنا ليا (يخرج آلة

حاسبة لكى يحسبها)

خليفة: إنت هاتحسبها على المكنه .. إنت مش مدرس

رياضه .. مش مدرس حساب احسبها بمخك يا

افندى.. احسبها بدماعك يا مدرس .

زتون: ظريف (يضع الآلة فى جيبه) حضرتك فعلاً ظريف .

خليفة: اللى هو أنا؟! والمطلوب؟

زتون: عم اسماعيل بيقول ما دام مدحت بيه وصل يبقى

خليفة: أشوفه .. (يندفع خارجاً ولكن زتون يلحق به

ويمسكه)

زتون: اسمع بس يا خليفة بيه .. أنا بقى لى سنتين ما

صرفتش .. عاوز بس ولو ميت ألف خمسين ألف ..

عشرة تلاف .. من فلوسى علشان العلاج ..

خليفة: وأنا مالى يا عم؟!

زتون: يا ريت تخلصهم مع مدحت بيه .. عم اسماعيل

بيقول ..

خليفة: أشوفه .. عم اسماعيل .. مدحت بيه .. يا عالم يا

اللى هنا (لا يقدر على الفرار من زتون)

زتون: خليفة بيه ما تتخلّاش عنى .. أنا عارف إنك تقدر ..

ها آجى بكره تكون اتصرفت ، عصمت باشا كان

دايما يدينى الأرباح نقدا كل أول شهر .. عصمت

باشا أكيد ما يعرفش حالتى والبركه فيك (يناوله

بعض الأوراق النقدية

خليفة: إيه دول .. بالدولار؟!

زتون: مصاريف و...

خليفة: ومشال، ما هي فلوسك أكيد محتاجه شيال، آمال

إيه مش بتقول عشرتاشر ألف أنا بقى أول مرة

أمسك ورق نقديه بيتعد .. فعلاً عد الفلوس متعب

قوى .. كان في بلدنا واحد اسمه عم مرسى العداد

يعد الفلوس للفلاحين كل موسم .. ما هو أمى ما

كانتش تعرف تعد بعد خمسة .. كل شوية تقولى ..

توره وتوره .. عندها كل حاجه بالتوره .. بس احنا

بقى ما عندناش حاجه تتعد خالص .. كل حاجه

عندنا على رأى جحا واحده نايه وواحده .. نايه

برضه حتى الجاموسه اللي كانت بترضعنى ..

قصدي بناخد منها اللبن .. صابتها عين ..

حسدوها .. استكثروها علينا .. راحوا فاقعينها

عين .. وهب ما فيش لبن .. نامت .. فضلت نايه ..

أبص لها وأبص للشهادة بتاعتي .. دى جاموسه

ودى ليسانس .. دى سودا ودى سودا لكن ما

فيهمش فايدة.. أمى عندها أمل الجاموسة تقف..
وأنا عندى أمل إن جواب الميرى يطل عليا..
(يدخل إسماعيل).. عم اسماعيل.. حلاوتك
تعالى هنا.. إيه حكايتهك يا عم اسماعيل.. فين
عصمت باشا ده.. هو عامل إيه ميت مشروع..
يبقى ها يعيننى..

إسماعيل: إنت عاوز إيه بالظبط؟
خليفة: الأول كنت عارف.. ركبت القطر.. فضلت ماسك
التذكيره فى إيدي لغاية ما وصلت محطة مصر..
ومن الساعة اتناشر لغاية العصر عبال ما وصلت
لغاية هنا.. اعمل إيه كل ما أشاور لتاكسى يقف..
الزمالك يا اسطى..

إسماعيل: يقولك شبرا..
خليفة: لأ يقول اتفضل..
إسماعيل: وما ركبتش ليه..
خليفة: ما كانش بيعجبنى.. شكله مش حل..
إسماعيل: كل التاكسيات؟!
خليفة: قلت آخذها مشى فى الطراوة..

إسماعيل: فى عز الظهر؟!

خليفة: واد عز يا عم اسماعيل.. أنا فضلت أحلم بالعز..
لغاية ما لقيت عز الظهر قلت أمشى معاه.. لكن
بقى طلع مش قوى.. ما عجبنيش.. كان ملحه
زياده.. قصدى.. الرز كان معجن.. لأ هو العيش
اللى..

إسماعيل: خليفة يا ابنى.. إنت إيه حكايته.. إنت مش
بتقول إنك كنت مع مدحت بيه؟
خليفة: أيوه..

إسماعيل: أمال هو فين.. ما جاش معاك ليه؟
خليفة: أنا جاي أسأل عليه هنا.. أنا كنت معاه فى الجامعة..
إسماعيل: فى الجامعة.. (بغيط)
خليفة: إيه.. هو جراه حاجه؟

إسماعيل: مدحت فى أمريكا من عشر سنين يا خليفة.
خليفة: ركب الخليفة وانفض المولد.. أمال إيه حكاية
مدحت وصل ده.. والناس فرحانة وهات يا دفع
فلوس..

إسماعيل: إنت السبب مش بتقول إنه كان معاك وإنه زمانه

جای؟

خليفة: ودلوقتى أعمل إيه يا عم إسماعيل ، أنا كنت جاي
عشان مدحت يشوفلى شغل .. كنت فاكر إن
مدحت هنا .. أعمل إيه فى الفلوس اللي إدوهالى
الناس.

إسماعيل: خدها لك.

خليفة: وفلوسهم اللي عاوزينها .. وحقوقهم؟

إسماعيل: سيبك منهم دول عبط.

خليفة: عم إسماعيل (يهجم عليه فى حركة بلهاء)

إسماعيل: اعقل يا خليفه .. إنت فى سراية عصمت باشا .

خليفة: أهى كلها سرايات .. بس لأ .. ما هو لازم يرجع كل
مليم خده من الناس .

اسماعيل: خليفه .. الناس دى تستاهل .. المدرس ده عمره ما

سأل فى الشركات دى بتعمل إيه وبتشتغل فى

إيه .. عمره ما سأل عصمت باشا عن الأرباح دى

بتطلع منين .

خليفة: وما فيش شركات؟

إسماعيل: ولا عمارات ولا حتى يحزنون .

خليفة: نعم !!

إسماعيل: إسمع.. إنت مش خدت لك قرشين.. اتكل على الله..

خليفة: أنا بقي مش ماشى من هنا اللا لما أرجع لكل واحد حقه.. أنا إديتهم كلمه.. وأمى طول عمرها تقولى الراجل يتربط من لسانه..

إسماعيل: روح يا خليفه يا ابنى.. روح إنت مش قده..

خليفة: لأ أنا قده.. أنا مش خارج الا لما العدل يأخذ مجراه (يقفز على أحد المقاعد) ويدق ناقوس الأمن والأمان وتعلو الكلمه فوق كل الماديات وأنا باسمكم جميعاً..

عصمت: (داخلا) إنت.. إنت يا..

خليفة: وإنت إيه كمان.. مستثمر فى شركة الوداد والخفه.. دفعت كام بالانجليزى وكام بالعربى.. طلع.. طلع..

عصمت: إيه ده جراك إيه يا ولد؟!

خليفة: ولد.. طيب أنا ولد صحيح.. وما حيلتيش اللضا.. الدور والباقي عليك إنت كنت راجل وبقيت ولد..

عصمت: ولد.. إسماعيل..

إسماعيل: خليفه (إسماعيل يحاول جذب خليفة بعيداً لكن خليفة لا يكف)

خليفة: طلّع.. يا راجل.. قصدى يا ولد.. طلع واحسب أرباحك من ثلاث سنين بقوا كام بس اسمع أنا بقى مش ها آخذ منك مصاريف مشال.. أصل أنا هأجر عربية كارو بالكهربا وأحط عليها أرباح الناس كلها وأوزعها رحمة ونور على عقولكم..

عصمت: إسماعيل؟

إسماعيل: إخرس بقى.. إنت إيه مكنة كلام؟

خليفة: طول بالك يا عم اسماعيل.. أما نسمع منه حكايته.. اوعى تقول انك مشاركه على جاموسه واللا على نص فدان.. أصلهم فى بلدنا لغوا الجاموس الشرك.. عملوه استثمار هو راخر.. بقوا يكتبوا على الجاموسه جيم نون.. جيم للاستعمار.

عصمت: أطرده بره يا إسماعيل.. أطرده حالاً.

إسماعيل: اخرج اعمل معروف.. عصمت باشا (مشيراً إلى

عصمت) حالته وحشه من أسبوع.

خليفة: هو ذا عصمت باشا سيف العدل الديداموني

(يحاول الهرب)

عصمت: سيه يا اسماعيل .. تعالى هنا يا ولد ..

خليفة: معاك حق يا عم .. تعال يا ولد .. روح يا ولد .. ما

هم بييجوا لك برجليهم .. يبقى الراجل منهم فلق

وراسه تشيل قفه أسمنت وإنّت بعون الله تخليهم

عيال .. إلا .. أيوه أنا نسيت .. أنا معايا مصاري

الشحن (ويخرج الأوراق المالية من جيبه)

عصمت: تعرف .. أنا مبسوط منك قوى .. باين عليك ولد

ذكي .

خليفة: أيوه .. هانبتدى .. بس لأ .. أنا بقى مش هاسمع ..

حاكم يا عم إسماعيل .. الناس اللي زى دول ما

عندهممش الا لسان .. ريق حلو .. ضحكتين

ويخليك تركع .. تلاقيك إنت كما بقيت ..

إسماعيل: خليفه .. اسمع كلام عصمت باشا .

عصمت: أنا خلاص ها أعينك عندي .. إنت مش كنت جاي

لمدحت ابني علشان الوظيفة .. خلاص يا عم أنا

عينتك وخلاص .. بقيت موظف .

خليفة: عم اسماعين.. خليك شاهد أنا ما عنديش فلوس
أدفعها له.

عصمت: أنا مبسوط منك علشان مشيت الراجل المتهور ده..

إسماعيل: بيومي الجزار يا عصمت باشا.

عصمت: وكمان الراجل اللزج ده اللي اسمه..

إسماعيل: زتون

خليفة: غريبه.. زتون ولحمه.. وأنا خليفه!

عصمت: تحب تاخذ كام فى الشهر؟

خليفة: ألف دولار أفرنجى.

عصمت: موافق.

خليفة: وألف دولار عربى.

عصمت: دا كتير قوى.. إنت معاك إيه؟

خليفة: وهو إنت اللي معاك.. قال ها يدفع.. زعلان قوى ما

هى باينه آهه.. شفت الفلوس وطاروا.. هو فيه

واحد نصاب تلاقى معاه فلوس أبداً.. غريبة يا أخى

الحرامى مهما يسرق.. والنصاب مهما لطش

تلاقيهم على الحديد.. معاك إيه.. معايا دول..

شوية انجليزى وشوية عربى.

عصمت : اسمع .. إدى لعمك اسماعيل عشره جنيه علشان

ينزل بسرعة يشتريلى سيجار صغير .

خليفة : نعم .. أديله إيه يا خويا .. إنت من أولها ..

عصمت : إنت مش بقيت موظف عندى .. إنت مش

سكرتيرى . إديله وحاسبنى ..

خليفة : خلاص حاسبنى ..

عصمت : خليفه ..

خليفة : إنت هاتشخط من دلوقتى .

عصمت : ها تديله واللا أتصرف معاك بطريقه مش كويسه .

خليفة : لأ مش أنا .. أنا من دشنا مركز ميت غمر .. أنا ليا

عيله تاكل الحصان نى .. أنا ابن عمتى كان بيركب

القطر كل يوم .

عصمت : اطلب البوليس يا اسماعين .

خليفة : نعم .. بتهددنى .. بقى مين يطلب البوليس لمين ..

أطلب يا اسماعين .

عصمت : اطلب البوليس يا اسماعين .. الولد ده حرامى وإنت

شاهد يا اسماعين .. خد بالك من الفلوس اللى فى

إيده .. إوعى يرميها (يرمى خليفة الفلوس) اتحرز

عليها يا اسماعيل .. واطلب البوليس وروح اشترى
السيجار (إسماعيل يلتقط الفلوس ويخرج) ..
اسمع إنت مش قدى .. عاوز تشتغل معايا واللا لأ؟
خليفة: لأ .. واستنى لغاية ما البوليس ييجى ونشوف مين
اللى رايح يشرف على البرش (صوت جرس الباب)
عصمت: روح افتح الباب .. وإذا كان البوليس اوعى تجرى
هايجيبوك.

خليفة: هو أنا هاخاف (يذهب ليفتح باب الصالة، يدخل
ضابط شرطة ومعه ثلاثة من الجنود ومعهم لطفى،
ما يكاد يراهم خليفة حتى يجرى فزعاً إلى
الداخل)

الضابط: هي دى الفيلا يا دكتور؟
لطفى: أيوه يا سعادة البيه وهو دا عصمت سيف العدل.
الضابط: حضرتك (مشيراً إلى عصمت)
عصمت: فيه إيه يا دكتور .. إيه الحكاية .. عاوز إيه يا حضرة
الضابط .. وإيه العساكر دول .. اوعى يكون هو
راخر عاوز يدخل معانا جمعية الوداد (للدكتور
لطفى)

الضابط: أستاذ عصمت؟
لطفى: لأ.. أنا مش هاقبل أعضاء تانى.. كفايه كده.
الضابط: أستاذ عصمت.. اسمعنى..
عصمت: لا يمكن.. هو قريبك (للدكتور)
لطفى: دا ضابط بوليس جاي يحطك فى السجن يا نصاب
يا حرامى.
عصمت: اللى هو انا؟!
لطفى: أيوه.
عصمت: يبقى أقول بقى على كل اللى أعرفه.. تحب أسمع
الشريط اللى إنت مسجل عليه كلامك عن
العمليات إيها.
الضابط: أستاذ عصمت؟
عصمت: نعم يا سعادة الباشا.. أنا تحت أمرك.
الضابط: أنت أخذت من الدكتور لطفى المشد ميت ألف جنيه..
عصمت: علشان إيه يا سعادة الباشا؟
الضابط: بقصد إصلاح أراضى باسم جمعية الوداد للإصلاح
والتنمية الزراعيه؟
عصمت: ما حصلش يا سعادة الباشا.. أنا ما أخذتش..

الجمعية هي التي أخذت.

لطفى: أستاذ عصمت.. الأوراق مع حضرة الضابط.

الضابط: أنا مش عاوز لف ودوران.. الدكتور لطفى بيتهمك

بالنصب والاحتيال..

عصمت: وأنا باتهم الحكومة..

الضابط: أستاذ عصمت؟

عصمت: إنت زعلان ليه.. روح اسألها.. أنا كمان باتهم

الحكومة إنها خدت فلوسى وفلوس الراجل الطيب

ده وعشرين واحد زيه.

لطفى: يا حضرة الضابط ده راجل نصاب.

عصمت: اسمع.. أنا ما اسمحش لحد يهينى فى بيتى أبداً..

وإذا كنت ها تفتح كلام بقى أقول إنت بتعمل إيه

فى العيادة والمستشفى.. حد يا راجل يحوش ميت

ألف فى خمس سنين من عياده فى بولاق يا راجل يا

دكتور.

الضابط: وبعدين.. إيه الحكاياه.. أنا عاوز اسمع ردك فى

الاتهام ده صح واللا غلط؟

عصمت: غلط يا سعادة الباشا.. وعن إذنك دقيقه واحده

(يحضر بعض الأوراق) .. اتفضل آدى الورق اللي
هارفع بيه قضيه ضد الحكومه .. فى خمسه خمسه
قدمت الطلب .. فى عشره عشره ردوا بالطلبات
دى .. فى ثمانية ثمانية السنه اللي بعدها .. رجعنا
الورق .. لكن الحكومه فى اتناشر اتناشر قالت لأ ..
فى واحد واحد ..

الضابط: إيه ده كله .. والأرض وإصلاحها وزرعها؟

عصمت: لما الحكومه يا باشا تقول آه .. احنا كمان هنقول آه .

الضابط: يعنى إيه؟

عصمت: يعنى الدكتور لطفى المفروض يدينى وسام إنى

باستحمل ده كله .. أنا سايب أرضى ورايح جاى

علشان أزود الرقعه الزراعيه .. أنا تعبان يا ناس ..

أنا باعمل للصالح العام .. أنا باجاهد من أجل

الوطن .. أنا شفت الغلب علشان اخلى الوزاره

توافق على مشروع الجمعيه .

الضابط: ووافقت؟

عصمت: هاتوافق .. مش هاتقدر تغلبنا أبداً .. هى تقول

واحنا وراها نقول .. هى تقول لأ .. نقول لأ ..

لطفى: فلوسى يا حضرة الظابط .. فلوسى .. تحويشة

عمرى ..

الضابط: وإذا كان الدكتور لطفى عاوز فلوسه ..

عصمت: يروح ياخذها من الحكومه .. ياخذها من الجمعيه ..

أنا مجرد رئيس مجلس إداره .

الضابط: المهم يقدر ياخذ فلوسه واللا لأ ؟ !

عصمت: انت تزم يا باشا .. كلامك علينا أوامر .. وأوامرك

نافذة المفعول ..

الضابط: إيه رأيك يا دكتور لطفى ؟

لطفى: أنا عاوز فلوسى دلوقتى .

عصمت: شفت يا سعادة الباشا .. شفت عاوز يخرب زراعة

البلد .. عاوز يوقف حركة التنمية .. عاوز الشعب

يجوع ..

الضابط: انت مش قلت انه ممكن ياخذ فلوسه ؟

عصمت: لما يجتمع مجلس الإدارة وتوافق الحكومه .

لطفى: يا حضرة الظابط أنا مش ممكن استنى دقيقه واحده

على فلوسى .

عصمت: شفت يا سعادة الباشا آهو اعترض على موافقة

الحكومة.

الضابط: يا أستاذ عصمت.. الدكتور عاوز ينسحب.. وأنا
على العموم هاعمل محضر بالكلام ده كله.. عندك
مانع؟

عصمت: لأ أبداً يا باشا.. بس دقيقة واحده.. تعال يا دكتور
هاتعمل محضر.. هاعملك ألف.. فاكّر عملية
الزايده اللي عملتها للعشرى وقلت له عليها
سرطان ولهفت خمستاشر ألف..

لطفي: أستاذ عصمت..

عصمت: والا رسم القلب للست تفيده اللي قلت لها دا علاج
بأشعة الليزر ولهفت..

لطفي: أستاذ عصمت..

عصمت: إنت اللي قايل يا دكتور.. وأنا بقى مسجل لك
شريط.. فاكّر حقنة البنج للرجال اللي اسمه..

لطفي: أستاذ عصمت..

عصمت: تقول انك اتصاхت معايا وتأخذ حضرة الضابط
ومع السلامه أحسن.

لطفي: وفلوسى؟

عصمت: آهو كده.. أنا باحب الكلام الدوغرى.. تعال قولى

فلوسى يا عصمت أقولك اتفضل..

لطفى: فلوسى يا عصمت..

عصمت: إتفضل مع الطابط.. وفوت عليا بعد شهرين.. مع

السلامه يا دكتور..

الضابط: إيه يا دكتور لطفى.. تحب نعمل إيه؟

عصمت: دكتور لطفى اعتذر لى وأنا قبلت اعتذاره ومضطر

أخليه معانا فى الجمعيه.. مش عشان خاطره أبداً

علشان خاطر عيونك يا باشا..

الضابط: دكتور.. رأيك ايه؟

لطفى: خلاص يا حضرة الطابط (فى استسلام)

الضابط: يبقى اتفضل معايا.. تمضى على الكلام ده.. عن

إذنك يا عصمت بيه..

عصمت: سعادة الباشا دقيقه واحده..

الضابط: أيوه يا أستاذ عصمت..

عصمت: كنت عاوز العنوان.. قصدى عنوان البيت أصل

المزرعه بتاعة الجمعيه طارحة السنة دى تفاح يجن..

الضابط: انت مش قلت لسه الأرض ما انزعتش!!

عصمت: ما هي ها تزرع وتطرح إن شاء الله .. قصدى يعنى التفاح ..

الضابط: لأ معلش لما تزرعوا الأرض إن شاء الله .. عن إذنك .. اتفضل معانا يا دكتور (يخرجان)

عصمت: يا اسماعيل .. اسماعيل (منادياً)

إسماعيل: أيوه يا سعادة الباشا (داخلاً)

عصمت: الواد فين؟

إسماعيل: مستخبي فى البدروم يا سعادة الباشا .

عصمت: هاته .. بس اسمع ولا كلمه من اللى سمعته يعرفها .. فاهم (إسماعيل خارجاً)

زيـزى: صوصو .. صوصو (داخلة)

عصمت: مين .. القمر (فى سعادة)

زيـزى: بس يا صوصو .. قمر ..

عصمت: القمر والنجوم والشمس وزحل وكله .

زيـزى: لا أنا زعلانك منك .

عصمت: وانا زعلان من الزمن اللى مش راضى يمشى معايا .

زيـزى: أيوه .. هاتقول انك مش ها تدينى أرباح الشهر ده ..

عصمت: وحياتك ولا الشهر اللى جاى .. بس باقولك ايه انا

اتفقت لك مع منتج سيما ها يعمل مسلسل
علشانك .

زيـزى: صحيح يا صوصو؟

عصمت: أيوه بس (فى تردد)

زيـزى: بس إيه تانى؟

عصمت: عاوز حاجه تحت الحساب

زيـزى: هو انا اللي هاقبض واللا هو ..

عصمت: هو يقبض الأول وانتى تقبضى بعدين .

زيـزى: عصمت .. أنا خلاص شبعت من كلامك .. أنا بقى

عاوزه كل فلوسى .

خليفة: (داخلًا) وانا بقى مش قاعد .

عصمت: ما تقدرش تخرج من هنا .. إنت إيه يا خويا ..

فاكرها سايبه ، أنا ضمنتك عند حضرة الظابط ..

خليفة: أنا ما عملتش حاجه ..

عصمت: والفلوس اللي انت واخدها من بيومى وزتون

والناس اللي كانت هنا .. إيه بقشيش أنت واخدها

رشوه يا أستاذ .

خليفة: إنت فاكرنى إيه .. هاخاف .. أنا بقى اللي هاروح

القسم وابلغ عن كل اللي انت بتعمله

زيـزى: حلو قوى (تقترب من خليفة فى مغازلة)

خليفة: نعم (مضطربا)

عصمت: تصورى لسه ضامننه عند حضرة الطبايط ومش

طمران فيه.. يا أستاذ الناس خرجت من هنا وبلغت

فيك إنك أخذت منهم رشوه.

زيـزى: يجن.. اسمك إيه (تحاول الإمساك بشعر رأسه)

خليفة: وبعدين بقى (لزيـزى)

عصمت: ما هو يا تشتغل معايا.. يا هادخلك السجن..

زيـزى: يا حرام الواد الحليوه ده يدخل السجن.

عصمت: واللومان كمان.. إذا ما كانش يسمع الكلام.

زيـزى: عشان خاطرى يا صوصو..

عصمت: أنا كنت هاتكلم مع المنتج يا خده معاكى فى

المسلسل.. لكن بقى.. أنا هادخله السجن.

زيـزى: صوصو (فى دلال)

عصمت: مش ممكن.. دا مرتشى والفلوس محرزاه والشهود

وكله.

زيـزى: صوصو..

عصمت: يبقى يسمع الكلام ويشغل معايا .
زى: انت اسمك إيه يا اسمك إيه ؟
خليفة: خليفه حسانين التريحي من دشنا مركز ميت غمر .
زى: إسمع يا فوفو ..
خليفة: أنا كمان بقيت فوفو .. تعالى لى يا امه .. بقيت
فوفو ومش عارف بكره يعملونى إيه ..
عصمت: أنا هاديلك ربع ميت جنيه فى الشهر .
زى: مبسوط يا فوفو ؟
خليفة: مبسوط قوى .. هو أنا هاقبض .. بقول لخصرتك إيه
(لزي)

زى: انت تؤمر يا فوفو .
خليفة: صحيح يا ست هانم ؟
زى: هانم .. انت غسل .
خليفة: بصحيح يا ست هانم ؟
عصمت: زى (بغيط)
زى: (خليفة) أنت سكر خارج التسعيره .. انت تجن .
خليفة: يا سيدى يوسف .. تعالى لى يا امه .
زى: ها تشتغل مع عصمت ؟

خليفة: بس أنا .. أنا ..
زيزى: علشان أشوفك كل يوم .. وعلشان ..
خليفة: أيوه .. وعلشان دى مهمه قوى .. أول مرة واحده
ست تكلمنى .. واحده ست بحق وحقيقى .
زيزى: يبقى تقعد هنا علشان ..
خليفة: أيوه .. انطقى .. أنا عارف انتى بتاكللى إيه ؟ . أكيد
الجاموسه بتاعة أمك بتحلب قشطه على طول .
عصمت: زيزى .. وبعدين ..
خليفة: شوفتى الغيره .. آهو غار من دلوقتى آمال لما اقعد
عشان ..
زيزى: يعنى هاتقعد يا فوفو ؟
خليفة: علشان ..
عصمت: زيزى .. تعالى علشان نتفق ها نعمل إيه مع المنتج
اياه .. اوعى تمشى هارجع لك (يخرجان) اوعى ..
خليفة: قاعد انا .. بس يا قولك إيه .. ما تتأخريش .. يا
سيدى يوسف .. تكونش .. لأ يا وله امك قالت لك
أوعى من البنات .. اوعى تكلم بنت واللا ست ..
امشى جنب الحيط وأول ما تقبض المرتب .. أول ما

أقبض إيه .. الفلوس اللي كانت معايا .. الفلوس
اللي انا .. حلاوتك يا خليفه .. بقيت نصاب زى
عصمت بيه .. دخلت سوق الخضار طلعت لى
بنه .. عيونها سود كحيله والرموش حراميه .

فاتن: (داخله) تسمح يا أستاذ (خلفها مصور صحفى)
خليفة: (لنفسه) أنا هاقعد هنا بصحيح .. عارزه إيه انتى
كمان

فاتن: ممكن حضرتك تدى خبر لعصمت بيه ؟
خليفة: سيف العدل الديدامونى !! (بسخرية)
كوداك: أيوه .. قوله فاتن محروس الصحفيه المعروفه .. وانا
كوداك الترس المصور ..

خليفة: ترس ؟ وانتوا إيه بقى مستثمرين فى شركه الوداد ؟
كوداك: يا ريت .. احنا نطول ..
خليفة: هى أمله يعنى .. بقولك إيه ما انتيش شايفه حاجه
فيا ؟

فاتن: حضرتك من المساهمين ؟
خليفة: لأ من المستوظفين .. أنا سكرتير عصمت بيه
الخصوصى .

فاتن: صحيح (فى انبهار)
كوداك: كلميه على المكشوف يا فاتن .. خشّى فى الموضوع
وقلّبي الورق .. وكسّرى المرصوص ..
فاتن: تفتكر كده على طول.
كوداك: خلىنا نلحق الاكسبريس ونتغدا كباب ..
فاتن: بس أصل (خليفة فى دهشة)
كوداك: طاوعيني .. ركّبي الشريط ودوسى على اتنين
فاتن: مرة واحده.
خليفة: ما تعملى اللى بيقولك عليه .. انتى غلباويه ليه ..
ركّبي الشريط .. وكسّرى المرصوص وخليه يلحق
بالاكسبريس وياكل كباب ..
كوداك: مش باقولك دا معانا فى المترو.
فاتن: مش معقول !!
خليفة: من رمسيس لغاية حلوان .. بس باحب اسطح .. هى
إيه الحكاياه يا جميل .. إنتى مش شايفه فيا حاجه
والا إيه ؟
فاتن: تلاته فى الميه إيه رأيك ؟
خليفة: نعم ..

فاتن: أربعه فى الميه ..

خليفة: ياه دانا نزلت سوق الرخيص يا جدع ..

كوداك: بس ما تقلش عن عشر صفحات واتنين غلاف ..

خليفة: إيه ياعم كوداك ما تنورنا ..

كوداك: (يصوره) إدى .. ابتسم .. خد نفسك .. اديله

شمال .. اتعدل .. حلو قوى شغل بمليون دولار ..

خليفة: أفهم يا عالم .. انتوا مين .. عاوزين إيه .. انت فين يا

مدحت ؟

فاتن: (فى خوف) كوداك ..

كوداك: الدراع خرب .. والترس علق ..

خليفة: لأ اسمع .. أنا خليفة عبد ربه حسانين .. دا انا جدع

قوى .. أنا راجل من شهر راجل تقول ترس أقولك

ساقيه .. أنا ابن خالى بيقتل على طول (يعنف تجاه

كوداك)

فاتن: اعمل معروف .. دا هايوت فى إيدك ..

خليفة: عشان خاطرك بس .. أصل أنا ما عنديش رحمه ..

كوداك: يا ساتر .. انت إيه يا أخى ..

خليفة: انتوا اللي إيه وعاوزين إيه ؟

فاتن: احنا جايين ناخذ إعلان من شركات الوداد.

خليفة: (ضاحكا) إعلان؟!

فاتن: أيوه عشر صفحات وغلافين.

خليفة: نعم.. ودول بكام؟! بكثير؟!

فاتن: خمسين ألف بس.

خليفة: بس؟!

فاتن: بس.. اعمل معروف يا أستاذ.. اعمل معروف.

خليفة: يا آنسه..

فاتن: فاتن محروس محروس.. السن أربعة وعشرين

تقدس الحياه الزوجيه وليس لديها شقه وعلى

استعداد للرضا بالقليل ولا تحب الطعام الكثير..

وتميل للجلوس فى المنزل إذا وجد.

خليفة: بس.. بس..

فاتن: انت باين عليك طيب.. نوره يا كوداك.

خليفة: لأ.. مش عاوز لا أنور ولا أضلم.

خليفة: اسمعى يا آنسه.. اتكللى يا بنتى مع السلامه..

مافيش لا إعلانات ولا يحزنون.. بس يمكن

يحزنون كل اللى ييجى هنا يحزنون.

فاتن: اعمل معروف يا أستاذ... دى رابع شغله اترقد منها... كل ما اروح اشتغل فى حتة يطلبوا منى أروح أجيب فلوس من الناس... الناس ما ترضاش يفصلونى... هو انا لو كنت أقدر أجيب فلوس كنت باشتغل ليه... كلهم بيقولوا هاتى علشان تقبضى.

كوداك: صدقها يا أستاذ... صدقها.

فاتن: ثلاث شركات تأمين... فضلت ألف فى الشوارع على رجليا سنه بحالها علشان أجيب بوليصه واحده... ما عرفتتش.

خليفة: فصلوكى طبعاً.

فاتن: من قبل ما اتعين.

خليفة: وإيه اللي رماكى على الشغل ده؟

فاتن: الإعلانات... مطلوب آنسه حسنة المظهر... تجيد...

خليفة: الطهر والأعمال المنزليه وترضى بقليله.

فاتن: لأ... تجيد الآله الكاتبه واللغه الإنجليزیه.

خليفة: تروحي...

فاتن: وبعد الامتحانات يدونى شوية ورق... ولفى على الناس...

خليفة: السحب الليلة.. آخر ورقه يا بيه.. الورقه اللي

ها تجيب داغك يا بيه وتبقى من أصحاب الفلوسات .

فاتن: يا ريت يا أستاذ يا ريت .

خليفة: بس انتى مش بتقولى انك صحفيه ؟

فاتن: إعلانات .. جريدة الصدق .. ولو رضى عصمت بيه

يدينى الإعلانات ها تبقى أول مرة أقبض من ثلاث

ستين .. اعمل إيه يا أستاذ .. لازم أجيب فلوس

للجريدة عشان تدينى عموله .. لازم أجيب فلوس

علشان أقبض .. حتى اللي كان خاطبنى سابنى بعد

ما عرف انى مش باشتغل .

كوداك: انور يا آنسه ؟

فاتن: نور يا كوداك .. نور (تبكى)

خليفة: اسمعى يا آنسة فاتن ..

فاتن: أنا مستعدة أتنازل عن نص العمولة .. قالولى

هانديلك عشرة فى المية .. خد انت خمسه وأنا

الباقى أنا وكوداك .

خليفة: مش دى المسأله .

فاتن: خلاص .. خد انت ستة .. سبعة .. ثمانية .. تسعه ..

خليفة: استنى بس ..
عصمت: (داخلًا) مين دول يا خليفة؟
فاتن: (تندفع نحو عصمت) عصمت بيه .. أنا فاتن
محروس الصحفيه فى جريدة الصدق .
عصمت: أهلاً .
فاتن: أنا عاوزه آخذ حديث مع سعادتك عن النجاح
الهائل لشركاتك ومشروعاتك ومساهماتك فى
تنمية المجتمع .
عصمت: هايل .. هايل يا آنسه .. أنا محضّر وجاهز واهو ..
فين أمر النشر؟
فاتن: أهو يا افندم (تخرج دفتر أوامر النشر)
خليفة: لأ...
عصمت: إيه ده يا خليفة .. انت إيه حكايك؟!
فاتن: أمر النشر يا افندم عشر صفحات وغلافين .
عصمت: وآدى الامضا .. بس اسمعى ..
فاتن: أمرك يا افندم (فى سعادة)
عصمت: تكتبى كلام إنما إيه .. كلام زى العسل زيك .
خليفة: لأ .. لأ .. (يسك أمر النشر يمزقه) كذب فى

كذب .. حرام .. حرام (يهجم عليه كوداك وفاتن ،
وعصمت يضحك ، يتدحرج على الأرض .. كوداك
يتمكن من الإمساك به مقيداً)

عصمت معلنهش أنا هامضيلك أمر نشر جديد .. هاتى .
خليفة : (كوداك يمسك به) حرام عليك .. حرام عليك ..
انت إيه ما عندكش قلب .. ما عندكش اخوات .
(تنطلق فاتن وهى تمسك بأمر النشر يجرى خلفها
كوداك ، يظل خليفة راقدًا على الأرض يتقدم منه
عصمت)

عصمت : انت غريب بشكل ..
خليفة : اللى هو أنا (وهو نائم)
عصمت : انت مش زى الناس دى ليه .. ما كله بيضحك على
كله .. ما لك انت مكش ليه ؟

خليفة : اللى هو أنا !
عصمت : مش أنا لوحدى يا ابنى اللى بيعمل كده .. ثم انا
عملت كده لما لقيت نفسى ضعت .. روحت فى
الكازوزه ..

خليفة : تقوم تاخذ الناس معاك .

عصمت : وهى الكازوزه وحشه (يذهب إليه ليساعده على
الوقوف) المهم .. قوم .. أنا كل اللى عاوزه منك
تشغل نافوخك وتشوف تخرج من دا كله ازاي من
غير ما نروح ..
خليفة : فى الكازوزه ..
عصمت : لأ .. المرة دى بقى ها نروح أبو زعبل .. بس وانت
معايا يا خليفه .
إسماعيل : (داخل) عصمت باشا .. عصمت باشا (يبدو على
إسماعيل الهلع)
عصمت : فيه إيه يا إسماعيل ؟
إسماعيل : الراجل الصعيدى اللى اسمه جرجاوى معاه ييجى
عشرين راجل وحالفين يقتلوك .
عصمت : خليفه ..
خليفة : أنا بقى عاوزهم يقتلوك ..
عصمت : أنا أبو مدحت صاحبك يا خليفه ..
خليفة : انت أبو كل المصايب ..
عصمت : لو مدحت عرف انك اتخليت عن أبوه وسبته يقتل
قدام عينك (خط على باب الصلاة بعنف)

إسماعيل: اتصرف يا عصمت بيه .. الراجل معاه بارود ..
خليفة: ودا عملت فيه إيه .. مشروع استثمار برضه .
عصمت: لأ .. عملت لهم حج سياحي لو كس .
خليفة: وطلع حج مش سياحي ؟
عصمت: لأ .. الطيارة راحت بيهم على قبر ص
(الصوت: خبط على الباب وصوت جرجاوى)
ص. جرجاوى: هاطحك يا عصمت يعنى هاطحك .
عصمت: إتصرف يا خليفة
خليفة: وأنا هاعملك إيه ؟!
عصمت: مدحت مش ها يسامحك يا خليفة .. مدحت ها
 يقولك دم بابا فى رقبتك يا خليفة .
ص. جرجاوى: افتح الباب يا عصمت احنا عارفين انك جوا ..
 اسماعيل مش هايقدر يضحك علينا تانى ..
 وهانطحك يعنى ها نطحك ..
عصمت: ابوس إيدك يا ابنى .. الروح حلوه .. وانت فلاح
 شهم ..
خليفة: اطلع انت على فوق .
عصمت: هاتعمل إيه ؟

خليفة: انت تسمع الكلام ويس.. اطلع على فوق
وماتنزلش إلا لما اقولك (يجري عصمت صاعداً)
روح افتح لهم يا عم إسماعيل
إسماعيل: خليفة يا ابني دول كثير.
خليفة: افتح يا عم اسماعيل.
(ما يكاد يفتح حتى يهجم جرجاوى ومن معه
ونسبح دوى الرصاص والدخان مع ستار الفصل
الأول).

ستار

الفصل الثاني

المشهد الأول

المنظر: (يفتح الستار على جرجاوى ومعه حوالى خمسة من الفلاحين والصعايدة، وكل منهم يحمل بندقية سريعة الطلقات يطلقونها على خليفة الذى يحاورهم وهو فى حالة خوف شديد، تجرى المطاردة العنيفة بين جرجاوى ومن معه وخليفة، فجأة يسقط خليفة متعثرا بكنبه.. والتى تسقط هى الأخرى، يندفع جرجاوى خلف خليفة ليجهز عليه وتكف طلقات النار، يتجمع الرجال حولهما ولا يظهر لنا خليفة ولا جرجاوى، حيث اختفيا خلف الكنية المقلوبة، يقترب الرجال وهم على أهبة إطلاق النار ثانية. يظهر خليفة وهو يحمل البندقية التى وضع فوهتها على رأس جرجاوى، يدفع خليفة جرجاوى بالبندقية حتى يصل إلى منتصف المسرح، والرجال يتراجعون).

خليفة: (إلى الرجال) ولا حركة، أى واحد فيكم هاتحرك
هاتكون الرصاصه فى دماغه (مشيرا إلى جرجاوى
الذى رفع يديه فى استسلام) ارموا البنادق اللى فى
إيديكم، اسماعيل.. يا اسماعيل.. ارموا البنادق
احسن افرغها فى راسه (يضعون البنادق على
الأرض) بسرعه انتوا فاكرينها إيه.. سايبه..
السرايه محاصره، رجال الأمن فى كل مكان..
تعالوا هنا.. صف.. ما حدش يتحرك (ينادى)
اسماعيل.. انت يا اسماعيل..

إسماعيل: (داخل فى حذر) أنا ما ليش دعوه انا..

خليفة: لم البنادق دى بسرعه.. اتحرك.. وادى حضرة اللوا
خبر، قوله العمليه تمت بنجاح، حوّل..

إسماعيل: نعم (فى ارتباك واضح)

خليفة: لم البنادق بسرعة.. لم، وادى تمام لحضرة العميد
الصاغ على محمود طه.. لم البنادق..

إسماعيل: (يجمع البنادق) بس حضرة الظابط لسه ماشى..

خليفة: اسمع الكلام يا أومباشى أحسن لك، وانت
(لجرجاوى) اتحرك شويه عشان أقدر أريح إيدى..

انتوا فاكرينها ايه ..

(يلاحظ ارتباك إسماعيل بعد أن جمع البنادق)

انصرف يا اسماعيل .. خذ البنادق دي جوا وإدى

عصمت باشا خبر (إسماعيل منصرفاً) اقف

عدل .. انتوا فاكرينها سايبه .. عصمت باشا ده

مش صاحب شرکه سياحه زى ما انتم فاهمين دا

راجل مهم جدا ..

جرجاوى: يا سعادة البيه ..

خليفة: (مقاطعاً) انت بالذات تسكت خالص وتعديل

دماغك .. مش عاوز ولا كلمه .. عارفين عصمت

باشا ده اللي كنتم عاوزين تقتلوه يبقى مين؟

عبد الصمد: (من الطاير) يا سعادة البيه احنا انضحك علينا ..

خليفة: شفت .. أدبك قلت الكلام المفيد .. انضحك

عليكم .. اسمك إيه؟

عبد الصمد: عبد الصمد يا بيه ، احنا يا بيه ..

خليفة: انتم السبب ، لولا انكم عبط .. ما كانش حد

ضحك عليكم ..

جرجاوى: يا بيه ما هو مش معقول ندفع كل الفلوس دي

علشان نعمل عمرة نقوم نلاقى نفسينا فى بلاد
الخواجهات .

عبد الصمد : أيوه يا بيه دا حرام قوى .

خليفة : مش عاوز كلام كتير .. كل اللي له كلمة يقولها فى
الأمن المركزى اللي انتم عملتوه ده .. اسمه هجوم
مسلح على شخصيه هامة جداً ..

جرجاوى : يا بيه عصمت بيه هو اللي ..

خليفة : اوعى تكمل روح انت هناك جنب اخواتك علشان
تتشنقوا مع بعض .

عبد الصمد : بقى كده يا جرجاوى .. تقولنا أنك عارف عصمت
باشا كويس .. اديك ضيعت فلوسنا وقصرت
رقابينا كمان .

خليفة : انتوا لسه شفتوا حاجه .. اللي انتوا عملتوه ده له
حساب كتير قوى .

جرجاوى : ما هو يا بيه ..

خليفة : حتى لو كان اللي حصل ده زى ما بتقولوا .. أنا
ذنبى إيه تضربوا عليا مليون طلقه يا مفتريين .. تك
تك إيه سيما .. مليون طلقه (يصوب البندقية

ناخيتهم) أعمل فيكم إيه الوقت .. دانا كنت

هاموت من الخوف قبل ما أموت من الرصاص .

جرجاوى : احنا عاوزين فلسنا ونغشى .

خليفة : تمشوا ، هي بالساهل كده (يستعرض أمامهم

حركات بهلوانية بالبنديقية)

جرجاوى : عصمت باشا أخذ منينا ثلاثين ألف جنيه .

خليفة : عصمت باشا ما حطش إيدته فى جيبك غصب عنك

واخذ فلسك يا شاطر .. ثم ان عصمت باشا مش

شركة سياحه افهموا بقى .

عبد الصمد : أمال إيه يا بيه ؟

خليفة : (فى حمرة) دا .. دا .. وبعدين بقى انتوا ها تخلونى

أقول ليه دى أسرار .. أسرار من فوق قوى .. قال

يبقى إيه قال !! .

جرجاوى : بس هو قالنا انه ها يعمل لنا كل حاجه علشان

نسافر نعمل عمره وكمان ..

عبد الصمد : (مقاطعاً) جرجاوى ..

خليفة : وكمان إيه انطق .. انطق ..

عبد الصمد : عيب يا جرجاوى بلاش كلام ..

خليفة: أنا بقى لازم أعرف .. هاتقنول واللا (يهده

بالبنطقة)

جرجاوى: نشترى حاجات من هناك ونرجع بيها من غير ما ندفع الجمرك.

خليفة: شفت مخك التخين .. شفت .

جرجاوى: يا بيه اعمل معروف .. احنا كل اللي عاوزينه فلوسنا والله يسامحه بقى ..

خليفة: والطيارات اللي ركبتوها .. وبلاد الخواجات اللي رحتوها ..

عبد الصمد: يا بيه احنا كنا ..

خليفة: (مكملا) ها تعملوا عمره، لكن ما عملتوش .. عملتوا حاجة تفيد البلد .

جرجاوى: يا سلام ازاي بقى ؟

خليفة: انتوا مش رحتوا بلاد الخواجات ؟

جرجاوى: دى قبرص يا بيه .

خليفة: بلاد خواجات ولا مش بلاد خواجات ؟

جرجاوى: أيوه يا بيه .

خليفة: أهو انتم بقى كنتم بتأدوا خدمة من أجل الوطن ..

كنتم .. انتم .. مثال للمخلصين من أبناء هذا
الشعب (يصعد على المقعد وهو يلوح بالبنديقية)
أنتم الأبطال أنتم ..

جرجاوى: احنا إيه يا عبد الصمد .. ازاي دا حصل؟
خليفة: (يقفز أمامهم) مش ضرورى تعرف .. عصمت
باشا مش يلعب .. عصمت باشا بيعمل عمل
عظيم.

عبد الصمد: يعنى إيه يا بيه .. عصمت باشا وزير؟
خليفة: أكثر.

جرجاوى: رئيس وزرا؟
خليفة: أكثر.

عبد الصمد: يطلع إيه يعنى عصمت باشا ده ..
خليفة: تعالوا هنا .. الظاهر لازم اشرح لكم .. إنتم جدعان
وبايين عليكم المرجله بس للأسف حظكم وحش
علشان .. بس لأ الحظ الوحش يتغير وأنا بقى اللي
ها أغير الحظ الوحش ده .. قرب يا جرجاوى خد
البنديقيه دى وحافظ عليها (يهمس له بصوت
مسموع) انت من النهارده رئيس الأمن ..

جرجاوى: بتقول ايه يا بيه؟

خليفة: ما تزعقش .. دى أسرار .. انت مسئول عن الأمن ..
أمن الحزب وانت يا عبد الصمد .. وانتم .. كلكم
مساعدين أمن الحزب .. دى مسئولية كبيرة قوى ..
قدها والا مش رجاله ..

جرجاوى: خبر ايه يا سعادة البيه ..

خليفة: أنا بقول كده برضه .. بس كل اللي فات دا كوم
والجأى كوم تانى .. واللى عملتوه قبل كده انسوه ..
المهم اللي جأى ..

جرجاوى: يعنى عصمت باشا دا يبقى ..

خليفة: رئيس الحزب يا غبى .. هس ولا كلمه .

عبد الصمد: وفلوسنا يا بيه؟

خليفة: قولتلك كانت خدمه وطنيه .

عبد الصمد: بس احنا رحنا ما عملناش أيها حاجه .

جرجاوى: أيوه يا بيه .. احنا نزلنا من الطائرة وروحنا ناخذ
الشنط ..

عبد الصمد: الراجل قالنا بعربى مكسر جاين تتفسحوا واللا ..

جرجاوى: عيب يا عبد الصمد .

عبد الصمد: هي عيب بعقل يا جرجاوى.. قبرص.. نازلين

قبرص واحنا لابسين..

خليفة: خدمه وطنيه.

عبد الصمد: واحنا لابسين ملابس الإحرام فى مطار قبرص.

خليفة: مش بتوع قبرص شافوكم؟

عبد الصمد: وقعدنا فى المطار يومين بلياليهم عبال ما عرفنا

نرجع مصر يا بيه.

خليفة: انتم أبطال.. رجال الوطن الأوفياء.. كان لازم

قبرص تعرف ان فى مصر رجال.. وأن من الرجال

من هم أشد شجاعه من الأسود وان..

بسطويسى: هو عصمت باشا ده مش بتاع سياحه يا جرجاوى؟

خليفة: انت إيه كنت نايم.. لسه ما سمعتش اللي بنقله..

فهمه يا جرجاوى.. فهمه يا عبد الصمد.. يا أخينا

باقولك عصمت باشا بيقى رئيس حزب.

بسطويسى: حزب إيه؟

خليفة: هيه؟

جرجاوى: أيوه صحيح يا بيه حزب إيه؟

خليفة: وكم ان مش عارفين حزب إيه؟ كل البطولة دى

والتضحية دى مش عارفين حزب إيه ؟

الجميع : لأ..

خليفة : حزب .. حزب الدلال والخفة .

عبد الصمد : بتقول إيه يا سيدنا الأفندى ؟

خليفة : قصدى حزب الاستقلال .. أيوه الاستقلال التام أو الموت الزؤام .

عبد الصمد : أيوه بس احنا مستقلين والحمد لله .

خليفة : ما هو علشان كده عملوا حزب .. حزب

الاستقلال .. كل واحد شايف نفسه عنده استقلال

ينضم للحزب .. والحزب مستقل عن كل شىء عن

السياسة وعن الزراعة وعن التجارة كله استقلال فى

استقلال .

جرجاوى : أيوه بس ..

خليفة : بس إيه .. أنت بالذات لازم تكون فاهم كل حاجه ..

انت بصفتك رئيس الأمن ورئيس لجنة المقررات

وعضو اللجنة المنبثقه لازم تكون فاهم وتكون

مستقل .

جرجاوى : يا سعادة البيه أنا مش باحب الأحزاب .

خليفة: ما هو علشان كده اختاروك انت بالذات .. عشان

مش بتحب الأحزاب .. يعنى مستقل ..

بسطويسى: أنا عاوز فلوسى ومش منقول من هنا إلا لما أخذ

فلوسى على داير مليم .. أنا ما ليش دعوه بحد .

خليفة: اسمعوا عاوزين فلوسكم؟

جرجاوى: ينوبك ثواب يا سعادة البيه .

خليفة: خليكم معايا وأنا أرجع لكم فلوسكم .

عبد الصمد: وشغلنا ومصالحنا؟

خليفة: مصالحكم هنا، شغلكم هنا، أنا خلاص لقيتها على

رأى أرشميدس هاروح بلدنا اعمل إيه؟ أقول لأمى

إيه .. ما لقيتش مدحت خلاص بقى إذا كان النصب

بقى للركب يبقى لازم أعوم .. لازم أعمل مركب أنا

كمان .. بس نصب بشهادة .. نصب بليسانس ..

نصب بتقدير امتياز مع مرتبة الشرف الأولى .

جرجاوى: يتقول إيه يا بيه؟!

خليفة: باقول خلاص يا جرجاوى خلاص يا ابن عمى وابن

خالى .. وحياة اللى بعثوكم قبرص بملابس الإحرام

ومصوا دمكم لادفعهم اللى أخذوه .. وكله لازم

يَكُحْ لازم يدفع .. بس على شرط اللي يكع همه ..
الناس اللي كالتها والعة وسابونا فى سقعة الفقر ..
الناس اللي ودوكم قبرص .. الناس اللي باعت
الشمس فى قزايز ..

عبد الصمد : واحنا يا بيه ؟

خليفة : انتم خلاص لازم تاخدوا ، اقلبوا الأسطوانه بقى ..
بقالنا سنين بندفع لازم ناخد بقى وانتم ها تاخدوا
.. هم يكمعوا وانتم تاخدوا .. انتم ولاد عمى
وعمتى وخالتى وخالى انتم أهلى .. انت رئيس
الأمن .. وانت مساعد رئيس الأمن وانت مساعد
المساعد وانت .. وانتم كلكم مساعدين أوائل لأمن
الحزب .. حزب الوداد .. أيوه (مؤكددا) هو حزب
الوداد ..

بسطويسى : وهناخد كام فى الشغلانه دى ؟

خليفة : هى دى بقى اللي انت شاطر فيها .. يضحكوا
عليكو بكام ملطوش فى الشهر وهم يلحفوا
المقاوله .

بسطويسى : أيوه المشروطه مربوطه .

خليفة: فالح قوى .. لما انت شاطر كده سلمت فلوسك

لعصمت باشا من غير ما تاخذ وصل ليه يا فالح؟

بسطويسى: أنا لسه ما تخلفش اللي يضحك عليا .

خليفة: يا أخى بلاش فشر بقى .. احنا نفهمها وهى طايره،

لما باب يخبط نعرف بره مين .. ازاي عندكم منظار

سحري .. وانتم مش عارفين اللي جوا حتى انتم

كلمنجية لسان طول كده ودماغ على الزيرو .

بسطويسى: سيدنا البيه .. احنا لغاية دلوقتى حلوين معاك لكن

بقى ..

خليفة: هاتعمل إيه . ما هو لو كنت قادر تعمل حاجة كنت

عملت .. احنا اللي دهنا الهوا دوكو .. احنا اللي

بنعد الرمل ونعمله ملايات سرير .. يا عم بقى .. دا

أصفر عيل من أيها حته يقدر يضحك عليك ..

اسمعوا بقى معايا فى الشغل ده واللا لأ .

جرجاوى: ما احنا لازم نعرف ها ناخذ كام؟

خليفة: لأ مش لازم تعرف .. ها تاخذ وخلص .. ها تاخذ

اللى يكفيك وزياده .. من النهارده خلاص عهد

المقاولات خلص ما فيش مقاولات .. فيه مخ .. فتح

مخك تاكل ملبن .. ومن دلوقتي .. قولوا ورايا

الحزب الوداد يا ..

الجميع: يعيش .. يعيش .. يعيش ..

خليفة: أنا عايز رجوله خشونه .. تضرب الأرض تطلع

بطيخ .. تكثيره دايمة على طول من غير سبب ..

أيوه أحسن رجاله .. كاف على ميم ، ميم على صاد ،

صاد على سين وحببيكم مين ..

الجميع: الوداد.

خليفة: والخلوه مين ..

الجميع: الوداد.

خليفة: حلو قوى .. جرجاوى .. عبد الصمد ..

بسطويسى .. كله فى مكانه وما حدش يهرب ،

اجتماع على المستوى العالى .. تعليمات رئيس

الحزب مشغول جدا .. مفهوم ..

جرجاوى: مفهوم يا افندم.

خليفة: يا معالى الباشا يا مغفل .. أنا خليفة عبد ربه

حسانين التريحي باشا سكرتير عام الحزب والرأس

المفكر .. مفهوم يا جرجاوى ..

جرجاوى: مفهوم يا معالى الباشا.

خليفة: تعجبنى... دلوقتى كله فى مكانه (مصطفون

طاهورا) دق الكعب ودوس على النعل وشدد

حزامك... ل فوق... هبه شمال أحسن... (يخرجون)

(يستدير) دا احنا ها نلعب لعب.

(ستار)

المشهد الثانى

المنظر: نفس الصالة، ولكنها معدة لعقد اجتماع مهم،
مجموعة من اللافتات بعضها معلق والبعض الآخر
لا يزال موضوعاً على المقاعد، اللافتات تحمل
شعارات (الوداد والوداد من أجل الأولاد)، (الود
المفقود مسيره يعود)، (الحق والقوة فى الود
والوداد) وهكذا... يقف عصمت وقد ارتدى
ملابسه كاملة، يروح ويجىء وهو يحفظ الخطبة...
عصمت: وإنما إذ نقرر أنه يجب الاهتمام بالقضايا المصيرية
فإننا فى نفس الوقت، ننادى بالاهتمام بالقضايا
التي هى أقل وغير مصيرية، ذلك من خلال
منظور... والله ما أنا فاهم حاجة... المهم... نحفظ
وخلص... من خلال منظور حزب الوداد... حلوة
حزب الوداد دى... مزيكا... وإنما تانى وإنما، وإنما
نقرر من خلال منظور حزب الوداد وإنما نقرر...

ياسماعيل .. يا خليفه يا ناس ياللى جوا هاتخنىق يا

عالم .. يا خليفه ؟

خليفة: (داخلا وقد ارتدى بدلة كاملة بربطة عنق، وقد وضع

إشارة على صدره عبارة عن وردة، ويشير إليها)

ورده .. هو دا شعار الحزب .. وردة لكل عضو ودنى

أودك إنت قدى وأنا قدك .. كله ها بيقى فل قوى .

عصمت: خليفه ؟

خليفة: أفندم معالى الزعيم ..

عصمت: زعيم ؟ إيه اللى انت عمله فى نفسك ده ؟

خليفة: لزوم الإيافة والأبهة الواجبة فى معالى نائب رئيس

الحزب وسكرتيه العام والرأس المفكر للحزب .

عصمت: حزب ؟ حزب إيه يا أبو حزب ؟

خليفة: حزب الوداد يا معالى رئيس الحزب .. صاد عين

صاد .. وداد وداد وداد ..

عصمت: (ساخراً) على حزب وداد قلبى .

خليفة: حلوه .. دا شعار ممتاز للحزب .. شعار شعبية

الفلاحين والعمال .

عصمت: يا ابنى أنا عاوز أفهم انت جيت حكاية الحزب دى

متين؟ وحزب إيه بس اللي انت عاوزنا نعمله؟

خليفة: حزب الوداد، إيه انت مش وافقت تخش معايا شريك؟

عصمت: ليه هو شركة استثمار هو كمان؟

خليفة: أكثر.. بس استثمار عن استثمار يفرق، دوكه على المكشوف بيلعبوا لعب الفلوس، بيستثمروا الفلوس ويلهفوها.. احنا بقى هانستثمر الناس ذات نفسها.. نستثمر مشاكلهم لصالح الناس ولصالحنا.. دا احنا ها نكسب مكاسب.

عصمت: خليفة اعمل معروف بلاش حكاية الحزب دى.

خليفة: ما نقدرش نتراجع.. احنا خلاص قدمنا طلب الإشهار خلاص.

عصمت: إشهار؟

خليفة: أمال إيه يا إكسلانس.. مقر الحزب فيلا عصمت باشا سيف العدل الديدامونى أيوه عشان انت داخل بالفيلا وباسمك وأنا بأفكارى ومركزى.

عصمت: مركزك؟

خليفة: بقولك إيه مش عاجبك أنا هافض الشرکه.. الحزب

اللى جنبنا عارض عليا مليون .

عصمت : مليون إيه .. مليون شهر سجن ؟!

خليفة : مليون جنيه علشان انتقل بس .. وبعد كده مرتب شهرى عشر تلاف جنيه .

عصمت : علشان إيه دا كله ؟!

خليفة : علشان العب لهم .. وأنا أكسبهم الدورى والكاس وانتخابات هيئة الأمم المتحدة .

عصمت : طب اسمع يا غلباوى .. بلاش حكاية الحزب دى ونفكر فى حاجة تانيه .

خليفة : لا يا باشا انت خلاص ما بقتش تفكر ، انت كل أفكارك قديمه ، موديل فات أوانه .. أفكار هواه .. قال إيه برج الدلال واحجز بمقدمات عشرين ألف .. طيب أهم دفعوا ولميت نص أرنب لكن وبعدين .. ما هم وراك لغاية ما يخدوا فلوسهم يا يدخلوك السجن .. انت فاكر نفسك الوحيد اللى حدق ومفتح ؟

عصمت : خليفه وبعدين .

خليفة : استثمر أموالك فى مشروعات الدلال والخفاه ..

ادفع فلوسك وأنا ابعزقها .. كله نصب .. توديعهم
قبرص يعملوا عمره يا مفتري .. طيب أهم قاعدين
لك ومعاهم مدافع رشاشه .. ها ترد فلوس العالم
منين يا باشا .. ما هو نصبك أصله تيله قصيره ..
مالوش نفس .. تلف وتنصب وساعة ما تفتكر انك
خلاص عديت .. تلاقي نفسك مربع فى السجن
على البرش .

عصمت : خليفه أنا لا أسمحلك ..

خليفة : هو أنت لسه هاتسمحلى .. انت خلاص تسمع
الكلام وبس .. أحسن أسيبهم عليك أهم قاعدين
جوا .. حد يا راجل يضحك على الصعايده .. إذا
كان هم نفسهم اللي بيخترعوا النكت هم يخترعوا
النكت والناس تضحك .. لكن اللي الناس مش
عرفاه إن الصعايده هي اللي بتضحك فى الآخر ..
ودا المهم مين اللي يضحك فى الآخر .. تحب تشوف
جرجاوى .. فرغ قدامى مليون طلقه .. ما عندوش
تفاهم يا فلوسه يا رقبته .. يور لايف أو يور
مونى .. جرجاوى ..

عصمت: (فى خوف) خليفة .
جرجاوى: (داخلا) أوامرك يا معالى السكرتير العام .
خليفة: حلاوتك يا جرج .. هایل .. شايف يا معالى
الزعيم .. جرجاوى رئيس لجنة أمن الحزب ومقرر
لجنة الدفاع .. آخر متجهه .
جرجاوى: أى خدمه سعادتك ..
خليفة: لا .. أصل سعادته عصمت باشا سيف العدل كان
عاوز يفض الشركه إيه رأيك ؟
جرجاوى: يعنى إيه يا معالى السكرتير العام ؟
خليفة: (مشيراً إلى جرجاوى) هو فاهمنى بس بيدى نفسه
فرصة يفكر .. أشغل صعايده يعمل انه مش فاهم
وبعدين يدرسها .. هنا كمبيوتر ماركة فناوى ..
تعب تعرف يا باشا هو بيفكر فى إيه ؟
عصمت: خليفة مش وقته .. أنا عاوز أحفض الخطبة اللى
هاقولها فى الاجتماع التأسيسى .
خليفة: جرجاوى .. إيه رأيك .. عصمت باشا كان عاوز
يدينا بمبه ويأكل الحزب لواحد ؟
جرجاوى: ناكل رقبته الأول .. وبعدين نعلن الحداد على

سعادته عشرين يوم وبعدها تبقى انت رئيس الحزب
ونحط على الحزب شاره سودا.

خليفة: ويبقى حزب الوداد أبو شرطه، انت خلاص
حسبتها (لعصمت) إيه رأيك؟ تحب نكمل المشوار
من غير غلبه واللا نعمله أبو شرطه؟
عصمت: روح يا جرجاوى اظمن على مدخل السرايه،
وشوف اليافطه عدله واللا مقلوبه فيه ناس كتير
جايه الاجتماع ..

جرجاوى: أروح يا سعادة النائب السكرتير العام؟
خليفة: روح يا جرجاوى.
جرجاوى: (يهتف) ميم على كاف، كاف على عين وداد وداد
سوداد (خارجا)

خليفة: (مجيبا بالهتاف) وداد وداد وداد ..
عصمت: إيه اللي انت بتقوله انت وهو ده احنا فى الكشفه ..
خليفة: الشعار .. بس لسه شوية، عاوزين شويه تحابيش
حزبيه .. كلام كده له رنين .. هب فوق طلّعها
شمال .. ارفع صوتك تكيد عدوك، كلام كده فيه
مزيكا .. زى ميه الميه عبده عطيه (يهتف) لا كلام

ولا كلام العمل هو البرهان .

عصمت : دا الكلام المزيكا بقى !! .

خليفة : أنا عارف بتوع الكوره بيحبوا الكلام الخلو اللي زى

العسل ده منين .. بص شوف عصمت بيعمل إيه

بص شوف خليفه بيعمل إيه .. عسل .

فاتن : (داخله) ممكن أدخل ؟

خليفة : فاتن حمامة .. قصدى فاتن محروس .

فاتن : إسمع يا أستاذ أنا ممكن أرد عليك وأقولك كلام

وحش قوى بس أنا قدام الباشا .

خليفة : انتى لسه مغشوشه فيه .

عصمت : خليفه وبعدين .. الزم حدودك ، ما تنساش أنك

واقف فى حضرة رئيس الحزب وأنا لسه رئيس

الحزب .

فاتن : حزب ؟

خليفة : (متجهًا نحوها فى طفولة) اسكتى مش عملنا

حزب ، وحزب إيه هایل يا آنسه فاتن .. على حزب

وداد قلبى .. أهو الشعار اللي انت ألفتته أدينى

باعترف أهو .. آه كل واحد لازم يعرف اللي له

واللى عليه.. حنة شعار واحد أنا بقى مألّف دلوقتى
أكثر من ألف شعار أهه..

عصمت: خلاص كفايه انت إيه.. ما بتصدق تتكلم.
خليفة: على فكرة يا آنسة فاتن أنا لقيتلك شغلانة إنما إيه
هايلة ها تاخدى منها فلوس لغاية ما تقولى بس..
ولو أن ما فيش حد بيقول للفلوس بس..
فاتن: لا أنا زعلانه منك.. انت ضيعت منى فرصة
العمر.. الجريده مش راضيه تنشر الإعلانات اللى
(تبدأ البكاء) الا لما عصمت باشا يدفع.

خليفة: يدفع إيه؟
فاتن: الإعلانات القديمه.. الأربعين ألف جنيهه (تبكى
بشدة)

خليفة: حلاوتك يا صوصو.. ادفع يا خويا ادفع.
فاتن: وحياتك يا سعادة الباشا.. اعمل معروف وادفع
لهم الفلوس علشان خاطرى.. هاترفد إذا ما
دفعتش.. ومش كده وبس هايحسبوها عليا (تزداد
بكاءً)

عصمت: منين أنت كمان.. اروح احفض البيان جوا.. يمكن

فكرتك تنجح ونسدد البلاوى دى كلها .

خليفة: أكيد يا سعادة الباشا .

عصمت: أنا باعمل كل اللي بتقول عليه أهوه .

خليفة: لا تخش شيئاً يا زعيم كلنا خلفك سدا .

عصمت: هيه (يتأهب للخروج) دعونا نعمل فى هدوء ..

فاتن: سعادة الباشا (تحاول الإمساك به ، خليفة يمسك بها)

خليفة: تعالى هنا رايحة فين ..

فاتن: (وهى مازالت تبكى) لازم يدفع الفلوس .

خليفة: بس بقى .. بطل عياط (تكف) انتى إيه كنتى

محرومة من العياط .. حنفية سايبة .. بس ..

فاتن: سبنى انتى كمان عاوز منى إيه .. مش كفاية اللي

انت عملته .. حرام عليك .. نفسى مرة واحدة

استنى فى شغل .. قبض آخر الشهر .

خليفة: هاتقبضى كل أسبوع .. بس استنى واهدى علشان

أفهمك (يمسك بها)

إسماعيل: (داخلاً) أستاذ خليفه الحقنى يا أستاذ خليفة ..

خليفة: فيه إيه يا عم اسماعيل (انتزعه من اشتباكه مع

فاتن)

إسماعيل: الراجل الجزار ومراته ومعاهم شله جامده قوى..

والمره دى باين عليهم مش ها يسكتوا..

خليفة: خليه يستنوا فى الصالون الذهبى.

إسماعيل: أدخلهم الصالون؟!!

خليفة: عم اسماعيل.. سمعت اللي باقوله والا أنه على

جرجاوى؟

إسماعيل: سمعت.. سمعت ان الحال بقى مش هو الحال..

الله يرحمك يا بابا.

خليفة: عم اسماعيل تحب أخلى عصمت باشا بنفسه

يقولك أنا أبقي إيه هنا؟

إسماعيل: عارف يا خليفة بيه عارف.. انت سبع البرمبة..

السبع اللي بارم ديله.

خليفة: اسماعيل (تنكمش فاتن فى خوف)

إسماعيل: قصدى فخامة السكرتير العام وأمين عام لجنة مش

عارف إيه.. ما احنا بقينا الضهر الأحمر.

خليفة: خلاص روح دخلهم الصالون الذهبى وإعملهم

شربات كمان.

إسماعيل: أوامرك يا فخامة السكرتير العام.

خليفة: (لا يدعه يذهب بمسك به ، ويضع يده على كتفه)

على فكره يا عم اسماعيل .. انت مرشح علشان
تكون أمين عام لجنة العمل والعمال بالحزب .

إسماعيل: كتر ألف خيرك يا سعادة السكرتير .. أنا كويس
قوى كده .. وأول ما آخذ فلوسى هاقول طيران
وأسيب السرايه دى باللى فيها .

خليفة: عم اسماعيل ..

إسماعيل: ولا حاجه يا عظمة السكرتير العام .. هاروح
أقعدهم فى الصالون الذهبى واعملهم شربات
وشاى وقهوه كمان .. آمال إيه داحنا مش بقينا
الضهر .. داحنا بقينا بكره (يخرج)

فاتن: إيه الحكاياه يا أستاذ خليفة .. حزب إيه وإيه الكلام
اللى باسمعه ده تمثيليه؟!

خليفة: ادورى .

فاتن: نعم!

خليفة: لفى .

فاتن: أستاذ خليفة (تتحرك مبتعدة)

خليفة: لأ معقول .. قولتى لى اسمك إيه؟

فاتن: فأتن محروس.

خليفة: معاكى شهادات؟ قصدى معاكى برايز من اللى بتتعلق.. مؤهلات يعنى؟

فاتن: بكالوريوس إعلام بتقدير جيد جداً.

خليفة: هایل.. حاجة هنا خالص.. آنسه فاتن أنا خلاص عينتك فى الشغل.

فاتن: نعم..

خليفة: انتى يا بنتى تقدرى تعتبرى نفسك من دلوقتى المتحدثه الصحفيه باسم حزب الوداد والخفه.

فاتن: نعم.. حزب إيه؟!!

خليفة: قصدى الوداد.. حزب الوداد.. حزب ينادى بالود والوداد والتعاون والتعارف والتقارب والتآخى بين كل أفراد المجتمع، وبين كل المجتمعات.. حزب هدفه العام التقارب فى كل شىء.

فاتن: أستاذ خليفه..

خليفة: حزب يعمل من أجل الفرد، من أجل المجتمع، حزب يعمل من أجل العالم كله ما هو زى الفل.. اكتبى يا فاتن اكتبى.. أرجوكى تكتبى.. دى لحظة إلهام مش

هتتكور... اكتبى (تكتب فعلا) إنا نفخر بأننا أول
من نادى بالود والاستلطاف بين أفراد الشعب..
يجب على كل فرد منا أن يكون ودودا لطيفا مع
غيره من الناس.. وعندما يعم الود والوداد يعمل
الجميع بهمة ونشاط لرفع المعاناة عن الشعب.. يا
سلام يا خليفه.

فاتن: يعمل إيه يا أستاذ خليفه.. بعدها إيه؟

خليفة: الجميع يد واحده وبهمه وقوه ونشاط لرفع المعاناة
عن الشعب، الله يا واد يا خليفه هي دى اللى كنت
بادور عليها.. اكتبى يا فاتن اكتبى بس بسرعه
علشان الكلام نازل يرخ على دماغى.. المعاناه.. ما
هي المعاناه.. استنى.. من يوم ما بنوا الهرم وهم
بيقولوا الكلمه دى لكن حد عارف معناها أبداً..

فاتن: أكتب ده يا أستاذ خليفه؟

خليفة: لأ.. المعاناه يا فاتن ما حدش عارف معناها إلا اللى
داقها واللى بيدوقها ما بيعرفش يتكلم طعمه وحش
قوى بيكتم على لسانه، ما بيعرفش ينطق.. عشان
كده اللى بيقولوها مش عارفين معناها.. وأنا مش

عاوزها تكتم على لسانى .. ومش لازم تكتم على
لسانك أنت كمان .. لازم تحاربها .

فاتن: أستاذ خليفه؟

خليفة: أيوه أنا ابتديت أحاربها ومش هارجع لها أبداً .. دا
مشوار ابتديته ومش هارجع فيه .. أنا عشت طول
عمرى صفر على الشمال أو حتى مجرد رقم مالوش
معنى حتى لما كنت باطلع الأول فى المدرسة كان
رقمى واحد .. مجرد رقم مالوش مدلول ، شوفى يا
أمه الشهاده ، أنا أخذت النمر النهائيه (يقلد أمه)
حط شوية تب للجاموسه .. يا أمه أنا طلعت الأول
(أمة) روح سقف للفراخ .. الفراخ يا ابنى تعبانه
من الحر ، وأنا يا أمه تعبانه من الحر والبرد
والحرمان .. تعبانه من كله .

فاتن: (فى اهتمام) أستاذ خليفه .

خليفة: لا أنا كويس .. اوعى تفتكرى انى .. لا ، اللى زينا
عمره ما يجراه حاجه .. احنا لولا جامدين كنا
خلصنا من زمان .. احنا انحطينا فى كل الظروف
غير الصحيه لحياة البشر .. وعدينا كل الاختبارات

وعشنا .. تصورى أكلنا مليون طن فراخ فاسدة ولا
جرالنا حاجة .

فاتن: أرجوك يا أستاذ خليفة .. أرجوك تسمعنى .. أنا
مشكلتى ما اتحلّتش وانت تقدر تساعدنى .. أرجوك
تخلّى عصمت باشا ..

خليفة: ما بقاش عصمت باشا .. بقى الأراجوز .. بقى
العروسه اللي أنا أقدر أحزكها بإيديا أنا .. الحق
عليه هو اللي خلّا التعبان للإبد جوايا يطلع .. جاي
فرحان من الكفر كل حلمى شغلانه اقبض منها آخر
الشهر أدفع بيها حق العيش والغموس .

فاتن: وأنا يا خليفه وأنا .

خليفة: لا لقيت الشغلانه ولا لقيت العيش الحاف .

فاتن: ضحكوا علينا .. ذاكرى يا فاتن .. لازم تجيبى
مجموع يا فاتن علشان تدخلى الإعداديه .. حاضر
ياماما حاضر .. ذاكرى يا فاتن لازم تتجدعنى
وتجيبى مجموع علشان تدخلى الثانوى .. الكسر
التكميبي لصاد عين س اتنين .. غاز الهليوم الضغوط
تحت ٣٢ ألف رطل .. ذاكرى يا فاتن حاضر يا

ماما .. انت الأمل انت اللي ها تصرفى علينا ..
اخواتك بيحلموا باللقمه الحلوه والهدمه .. ذاكرى
يا فاتن .. وذاكرت ذاكرت وعديت .. كل
الحواجز .. وفى الآخر ما فيش .. ما فيش لقمه
لاخواتى ولا هدمه لأمى .. طلعت كل حاجه كلام
على ورق .. طار فى الهواء أول ما فتحنا الكتاب .

خليفة: بس خلاص .. مش ها يقدرروا يضحكوا علينا تانى
احنا اللي هنضحك عشان احنا اللي ها نألف الكلام
ونملا الكتاب ونحط الحواجز ونبقى احنا فوق ..
فوق ..

فاتن: ازاي بس يا خليفه ؟

خليفة: الغش ما لوش الا الغش .. وإذا كانوا فاكرين أننا
هانفضل ساكتين لأ .. احنا ها نقلب الأسطوانه
ندورها على الوش التانى ما فيش اسطوانه بوش
واحد .. لازم ندورها .. وتعيشى بيهم قبل ما
يفطروا بينا .

عصمت: (داخل) وأنا نعاهدكم كما نعاهد أنفسنا على
أن .. على أن ..

خليفة: انت لسه ما حفظتش يا عصمت ؟

عصمت: يا خليفة الكلام صعب قوى يا ابنى .. ما تكتبها بالفرنساوى .. قصدى بالحروف اللاتينى ..

خليفة: نعم ياخويا ها تخطب فى الناس باللاتينى ..

عصمت: أصله أسهل .. قوليله يا بنتى ..

خليفة: مش باقولك عروسه قماش .. عروسه قماش لكن قدر يضحك على الحكومه وعلى الناس .. قدر يضحك على ناس بشنبات بتقول احنا اللى دهنا الهوا دوكو وفركنا الزلط بإيدينا .. اسمع يا عصمت انت لازم تحفض الخطبه زى ما أنا كاتبها وتقولها زى ما أنا علمتك .. اتفضل (يدفعه إلى الداخل)

فاتن: يا خسارة حتى انت كمان .. بقيت زيهم .

خليفة: اسمعى انتى كمان .. انتى بتشتغلى معايا دلوقتى .. لازم تسمعى كلامى .

إسماعيل: (داخلا) الحقنى يا أستاذ خليفة .. قصدى يا معالى السكرتير العام ..

خليفة: فيه إيه يا راجل انت .. انت كل شوية تنط هنا .

إسماعيل: انت كل شوية تزعقلنى .. أنا أمين عام زيك ..

خليفة: نعم يا خويا ..

إسماعيل: آه .. أنا أمين عام العمل والعمال .. وانت اللى قايل

كده واللا رجعت فى كلامك ؟

خليفة: صح .. اسمعى يا فاتن .. اكتبى الكلام ده كله .. أنا

خايف نتورط ونوزع مناصب أكثر من الحزب .. مش

عاوزين من أولها نتقل على الحزب بكثرة

المناصب .. آه هاتى كشكول واكتبى كل واحد

منصبه ولما أغلظ تقوليلى .. أيوه يا سعادة أمين

العمال ..

إسماعيل: (مسروراً) الراجل المدرس مش عاوز يقعد مع الناس

فى الصالون .

خليفة: ما هو لازم يتكوموا فى الصالون لغاية ما الباشا

يحفض .

إسماعيل: هو بقى راسه وألف سيف يقابل الباشا .

زيمون: (داخلًا) أنا عاوز أفهم إزاي ما فيش حد واقف فى

انتظارى .. أنا معايا استدعاء كتابى .. أنا أمين عام

التعليم .. يعنى لو الحزب مسك الحكومة ودا ممكن

يحصل ها أبقي وزير التعليم .. وبعد كده الراجل

ده عاوز يحوشنى !

إسماعيل : أنا كمان أمين عام .. ولازم أمتك .

خليفة : روح انت يا عم اسماعيل .

إسماعيل : (خارجاً) حته ورقة ويقولى وزير !

خليفة : أهلا يا أستاذ زتون .

زتون : تصور يا أستاذ خليفة أنا بعد العمر ده كله الاقى

اللى يقدرنى .. اللى يقدر كفاءتى صحيح فيه ناس

بتفهم ..

فاتن : اللى هم مين يا أستاذ ؟

زتون : اللى اختارونى طبعاً يا آنسة .. أنا عارف نفسى

كويس .. كنت دائماً أقول مش معقول ان كل قدراتى

أدرس فى المدارس الابتدائى أكيد ليا دور مهم لازم

ألعبه .. مش كده يا أستاذ خليفة ..

خليفة : أكيد لك دور .

زتون : إنما عاوز أقابل الباشا ضرورى .. قصدى فخامة

رئيس الحزب .. أنا عندى مشروعات كتيره وأفكار

خطيرة .. أنا كنت بانتظر الفرصة دى من زمان ..

أرجوك يا خليفة يا ابني خليتي أقابل فخامة الزعيم.

خليفة: يا عم زتون افندى روح أقعد فى الصالون.
زتون: إيه يا أستاذ انت عارف بتكلم مين.. أنا أمين عام
التعليم فى الحزب يعنى لو الحزب مسك الحكومة
هابقى الوزير مش كده يا بنتى..

فاتن: لأ.

زتون: نعم!

خليفة: فاتن روحى حفصى عصمت الخطيبه.

فاتن: لأ.. لا انت هاتبقى وزير ولا حتى ها تبقى حاجه
خالص.. وانت عليك العوض.. أنا كان عندى أمل
الاقى زميل.. الاقى واحد يحط همه على همى
ونشيله سوا.. كنت مستعده استنى وياه واستحمل
لكن يا خساره من أول حاجز وقع.

خليفة: فاتن.. ادخلى جوه.

فاتن: إيه سحبت منى المنصب.. مش أنا برضه المتحدثه
الصحفيه باسم الحزب..

زتون: حضرتك.. يبقى لازم تاخدى كلامى كله وتخلي
كل الجرايد تنشره أنا عندى رأى مهم فى الجامعه

الأهليه ومجانبة التعليم .

فـاتن : أكيد يا عم زتون .. أكيد عندك رأى مهم فى كل
حاجة .. أمال كنت بتدرس إيه وتعلم إيه .. بس
الظاهر ما عندكش رأى مهم إلا فى الورقة اللي
معاك .. مصدقها .. مصدق كل حاجة فى أى حاجة
وبعدين تقول رأى مهم ..

خليفة : فاتن كفايه

فـاتن : صحيح أنا مش لاقيه شغل .. وعارفه انى ممكن أدور
سنين عبال مالاقى وأمى كل يوم بتستنانى عشان
أبشرها وأقولها الماهية أهى يا أمى لكن مش ممكن
أقبل اللي انت بتعمله ده .. لأنه نصب خداع غش .

خليفة : فاتن انتى مش فاهمة حاجة .. مش فاهمة أنا ..

فـاتن : يا خسارة (تندفع خارجة)

زتون : مالها العروسة دى يا أستاذ خليفة ؟

خليفة : مش مهم .. المهم قولنا انت .. إيه مشاريعك يا أمين
التعليم فى زراعة الكرنب الخشى ؟

زتون : على فكرة يا أستاذ خليفة عملت إيه فى حكاية
فلوسى اللي فى شركة الوداد للاستثمار ؟

خليفة: خلاص انت اتبرعت بيها.

زتون: بتقول إيه؟!

خليفة: (ينادي) عم اسماعيل... الإسعاف جاهزة؟

زتون: رد عليا يا ابني.. فلوسى راحت فين؟

خليفة: زتون بيه.. همه مش اختاروا سعادتك أمين عام

التعليم فى الحزب ويمكن تبقى وزير؟

زتون: يعنى إيه؟.. ودى مالها ومال فلوسى؟!

خليفة: واحد.. يادى يادى.. ما ينفعوش مع بعض.. انت

اتبرعت بالفلوس وهمه اختاروك أمين عام.

زتون: أنا رايح أبلغ البوليس.

خليفة: (يمسكه) هيسألوك فى البوليس.. جيت الفلوس

دى كلها منين.. ها تقولهم إيه يا عم زتون.. مش

من الدروس الخصوصية والدروس ممنوعه بأمر

الحكومة.. لكن انت يا تدى درس للعيال يا تسقطه

يعنى حطيت إيدك فى جيوب الغلابة وخذت

فلوسهم.. أنا بقى ها أقول فى البوليس الكلام ده..

زتون: لا.. دانا لازم أبلغ البوليس..

خليفة: ما تقدرش.. انت بتخاف من البوليس.. بتخاف من

الحكومة.. لو كنت مش خايف كنت حطيتهم فى
بنك مش حوشتهم على قلبك وبعدين إديتهم
لواحد وكرمان من غير إيصال.

زتون: انت مجنون.

خليفة: انت المجنون عشان مش بتسمع كلامى للآخر.. انت
دلوقتي مش أمين عام التعليم فى الحزب..

زتون: أيوه بس..

خليفة: ما بسش.. لولا التبرع ما كانوش اختاروك
للمنصب اللي عمرك ما حلمت بيه.. كده واللا
لأ..

زتون: أيوه بس..

خليفة: تانى بس.. وعلى العموم انت تقدر ترجع الفلوس
اللى اتبرعت بيها للحزب وأكثر كمان.

عصمت: (داخلاً) أنا بقى مش حافض.. ومش لاعب..
ومش هاشتغل الشغلانة دى.

زتون: عصمت باشا الحقنى أنا فى عرضك..

عصمت: مين الراجل ده؟

زتون: انت مش فاكرنى.. أنا مستثمر فلوسى عند

سعادتك ويقالى سنتين ما قبضتش الأرباح .. تصور
الحكومة قالت اللي عاين فلوسه عند شركات
الاستثمار يبلغ عنها ، أنا ما بلغتش .

خليفة : إديله الأرباح يا عصمت باشا .. إديله أحسن يبلغ
وساعتها هايطالبوك بكل الفلوس اللي أخذتها .. دا
الراجل أهو ما بلغش ..

زتون : والله العظيم ما بلغت .. هو إيه ما فيش أصول .. أنا
قولت عيب يا زتون افندى عصمت باشا راجل ابن
ذوات وعارف الأصول .. إدينى الأرباح بقى يا
باشا ..

خليفة : إديله الأرباح يا باشا .. إديله دا ما بلغش الحكومة ..
لسه مصدقك انت ومكذب الحكومة .. شوف
الشهامة وانت ابن ذوات وعارف الأصول .. إديله ..
عصمت : اتصرف مع الراجل ده .. أحسن والله العظيم أقطع
الخطبه وافض الشركه .

خليفة : من غير تهديد أنا برضه اللي هاتصرف .. إسمع يا
عم زتون ..

زتون : والله ما بلغت .. قلت مش معقول أخون عصمت

باشا أبداً .. عاوز فلوسى بقى .. أرجوك يا أستاذ
خليفه .

خليفة : عم زتون روق امال .. عصمت باشا رئيس الحزب ..
زتون : (مقاطعاً) رئيس إيه ؟

خليفة : إيه ده انت ما كنتش تعرف .. أمال استدعاء كتابى
وأنا عندى مشاريع .. ما هو عصمت باشا اللى
مختارك فى المنصب الكبير ده .

زتون : هو اللى ..

خليفة : أيوه علشان ما بلغتش عنه .. الحكومة تقولك قول
فلوسك عند مين عشان نرجعها لك .. لكن انت
أبداً راجل مخلص .. خبيت عن الحكومة .

زتون : أيوه كده تمام .

خليفة : حلاوتك .. ما هو اللى جاي بلاش لازم يروح بلاش .

عصمت : خليفه .. خليك هي شويه .. اتصرف .

خليفة : أمال إيه يا زتون بيه .. عصمت باشا قال زتون بيه
النملاوى هو الوحيد اللى يفهم فى أمور العلم
والتعليم ومحمود باشا عارض .. لكن عصمت باشا
ما سابش الجلسة إلا وقرار تعيينك مختوم بختم

الحزب.

زتون: صحيح الكلام ده يا عصمت باشا .. صحيح اللي
بيقوله خليفه .. أنا ..

خليفة: معالي رئيس الحزب مش فاضى يا معالي الأمين العام
المساعد.

زتون: اللي هو أنا؟!

عصمت: أيوه يا زتون .. أنا رفعت درجتك .. خليتك الأمين
العام المساعد ولو سمعت كلامى وخليتنى أحفض
الكلام المعقرب ده هاخليك نائب الحزب.

زتون: أنا؟!

خليفة: أيوه روح معاه.

زتون: وفلوسى؟

خليفة: يا عالم افهموا .. هى دى الطريقة الوحيدة اللي
ها ترجع بيها فلوسكم .. اتفضل بقى.

عصمت: (هامساً) خليفة أنا لسه مش مقتنع.

خليفة: أنت تسكت خالص يا معالي رئيس الحزب .. هو
حد خرب بيتهم إلا انت .. ما الفلوس جوه بطنك ..
روح ذاكر.

عصمت : بس أفهم .. هانكسب من حكاية الحزب دى قد إيه
خليفة : انت واخذ حقك مقدم .. انت ناسى واخذ كام مليون
من الناس .. خش جوا .. تحب اسبيهم عليك ؟
زىزى : (داخلة) والله عال يا عصمت باشا ، تعمل حزب يا
أخويا وأنا مش فيه ؟ ليه عورة .. مكسحة
مايفهمش .. تحب تسمع شوية كلام من بتوع
الأحزاب ؟
عصمت : أهلاً زىزى
(بمساعدة) أنتى فىن .. والله كنت هاطلبك عشان ..
خليفة : معالى زعيم الحزب ..
عصمت : دى زىزى .. زىزى مهلبية .
زىزى : جرى إيه يا سى خليفة ، هو انت يا أخويا اللى
ماسك القعدة .
خليفة : روح احفض الخطبة ، خلينا نخلص .. روح معاه يا
زتون افندى .
زىزى : مافيش حد هايتنقل من هنا إلا لما أفهم إيه الحكاية ..
آه عصمت باشا أنا معاه فى الحلوة والمرة .. والا إيه
يا إكسلانس ؟

عصمت: بس انتى عرفتى إزاي؟!

زِيـزى: وهو فيه حاجة بتستخبه على زيزى يا معالى الباشا

(فى دلال) أفهم إيه العبارة؟

عصمت: يفهمك معالى النائب والسكرتير العام.

زِيـزى: ده؟ سكرتير إيه.. خلى خليفه..

خليفة: إيه مش عاجبك يا ست مهلبية.. خش جوا يا

معالى الزعيم.

زِيـزى: معقول تبقى الهلُمه دى كلها.. إيه الموضوع يا

صوصو..

عصمت: أنا داخل احفض وخليفة باقولك.

زِيـزى: لا وحياتك لازم أفهم الموضوع وأبقى فيه (تمسك

عصمت ولا تدعه ينصرف).. والا إيه يا خلى

خليفة: مش لو كنتى بتفهمنى..

زِيـزى: اسمع أنا اشتريك كلك على بعضك وبعدين

استغنى عنك وأبيعك فى المزاد.

خليفة: تعملها ما انت قاعده على تل فلوس.

زِيـزى: من تعبى وشقايا يا روحى.

خليفة: لأ وانتى الصادقه من الهز، الله يرحمك يا توفيق يا

حكيم كانوا يشتروا منك الكتاب بثمانين جنيه
كتاب قعدت تألفه أكثر من سنة وفي الآخر ثمانين
جنيه.. والست الهام بتاخذ فى كل هزه ميت
جنيه.. كده شمال ميه.. كده يمين ميه..

زهـزى: لا يا روحى مش علياً أنا الكلام ده.. دانا أفردك
وأطويك واعملك شبك بالعجوة.. اصحى فوق..
وإلا اسمعك اللى يرجع القلب..

خليفة: قلبك أبيض، أنا سمعت كفايه.. يسقط الكتاب
ويحيا الرقص.. مش كده يا عم زتون يا مدرس..
مش كده يا عصمت باشا، أنا خلاص فهمت
اللعبة.. فهمت الدرس كويس قوى.. فهمت
وذاكرت وحفظت وطلعت الأول عشان كده أنا
الألفة دلوقتى، أنا اللى باتكلم واهز المشاعر، عشان
كده لازم تسمعونى، أنا المايسترو، أنا مدير العمال
والملاعب والكوتش، مش تقولوا من الأول إن
الحكاية لعب فى لعب.

زتون: أستاذ خليفه.. هو جراك إيه؟!

خليفة: الحق عليك انت يا مدرس الفصل، كنت بتضربنى

لما أقولك سبعة فى سبعة بسبعين وتقولى غلط
وهات يا ضرب .. أهم طلعا بسبعين وطلعت انت
الغلط، أضربك دلوقتى، اقرا يا ولد .. أعرب ما تحته
خط مكسور بالضمه المشدوده ومنصوب عليه من
كل حدق فى وكاله البلح .. اعمل فيه إيه دلوقتى؟

عصمت : خليفه جراك إيه؟! !

زى : صوصو .. الظاهر (تشاور على رأسها)

خليفة : ما حدش يتكلم .. لما الألفه بتاع الفصل يتكلم،
الكل يسكت، لما المعلم الكبير يتكلم الكل يقول
حاضر .. تعالى شوفينى يا أمه .. شوفى ابنك وهو
بيه .. مش كان نفسك كده .. كان هايجرا إيه لو
قعدت جنبك فى الغيط، أزرع الدرة واقلع النغلة،
وأنا بأعرف أشيل السنطه من جوه الغيط .. وأعرف
أحط البذر جوه الأرض واطبطب عليها بحنيه
واستنى لما تطرح .. لأ لازم تروح المدرسه .. لازم
تبقى افندى تبقى بيه .. ومش مهم ابقى بيه فى إيه
وعلى إيه .

زى : (فى تأثر) أستاذ خليفة انت قلبتها جد كده ليه؟! !

خليفة: صح يا زيزى هاتم صح .. انتى صح .. سامحونى
كلكم أنا غلطت وقلبت لها جد واحنا بنلعب .. مع
إنى الألفة وفاهم أصول اللعبة .. لازم نلعب ونجيب
اجوان.

زيزى: وانت الكابتن ..

خليفة: وانتى أمين عام الفن ..

زيزى: بس؟

خليفة: والثقافة والعلوم والرقص .. بس لازم تصحى
عاوزين مشاريع.

زيزى: ياه عندى كتير .. صوصو ..

خليفة: من غير صوصو .. صوصو راح يحفض ومعاها أمين
عام التعليم .. وانت معايا تفكرى فى التبرعات ..
والإعانات.

عصمت: أهو أنا عاوز أفهم إيه اللي هانكسبه من الحكاية دى؟

خليفة: أنت لسه واقف (يكاد يتحرك، يدخل بيومى
وخلفه نبوية)

بيومى: أهو كده؟ يادى النور يادى الهنا.

عصمت: تعالى نحفض الخطبة (لزيتون)

بيومى: رايح فين يا سعادة الباشا دى فرصة إننا نطلع لوجه
سعادتك ونتملاً بالنور.. يادى الهنا (يقترب من

عصمت)

عصمت: خليفة.. اتصرف..

بيومى: خليفة بيه هنا كمان يا أهلاً.

خليفة: (متجها نحو بيومى) اسمع يا معالى أمين
الرأسمالية الوطنية..

بيومى: نعم يا أخويا، أنا بقى ما بكونش من الكلام ده..
وأدى الجواب اللى جانى (يخرج ورقة من جيبه)

أهو (يمزقه)

نبوية: وأنا كمان (تمزق ورقة هي الأخرى) قال إيه أمينة
المرأة.. راجل ما عندكش حيا وأدب.. أمينة إيه يا

دلعدى.. أنا أمينة على نفسى وعلى بيتى وبس

بيومى: بيضحكوا علينا يا نبوية.. فاكريتنا كروديات..

شوية هلضممة عشان فلوسنا تتوكل، لا أنا المعلم

بيومى أبو كرشة اللى بيدبح يوماتى.. يا فلوسى

حالا يا رقابيكم.. مفهوم.

زتون: أنا زيك يا معلم، خدوا فلوسى (يجذبه عصمت

نحوه)

عصمت: (وهو يجذب زتون) اتصرف يا معالى السكرتير العام.

خليفة: اسمع يا سيادة الأمين العام ..

بيومى: اسمع انت يا أبو مخ تخين، انت حنة عيل فلاح لا طلعت ولا نزلت .. أنا لما أحب أكلها .. أكلها بمزاجى .. ما تخلقش اللي يضحك عليا.

خليفة: لو كنت حففت الخطبة (إلى عصمت)

بيومى: مش عاوز كتر كلام.

نبوية: أيوه يا فلوسنا يا المعلم يدبحكم وأنا أفرق جتتكم للكلاب.

زيزى: أنا آسفة يا جماعة .. ما أقدرش أقعد أنا عندى بروفه.

نبوية: تعالى هنا يا شابة .. مش انتى برضه ..

زيزى: زيزى مهلبية .. نجمة المسرح والتليفزيون والسيما و .. مش بتشوفينى فى الأفلام؟!

بيومى: هى دى اللي وقعتنا مع عصمت بيه مش كده ..

زيزى: أرجوك يا معلم .. ما يصحش تقول كده .. انت راجل چانتيه .. حبوب لو كان عندى وقت كنت

شرحت لسعادتك .. لكن باى .

نبوية : اقعدى عدل يا شابة .. حركات الكباريهات دى
مش عندنا .. مش على جوزى .. اقعدى (تدفعها
بعنف إلى المؤخرة)

زىزى : صوصو .. عصمت مش معقول .

عصمت : (فى نبرة متعالية وأمرة) أنا خلاص ما ليش كلمة
فى بيتى .. ما فيش خشا ولا احترام .. انت عاوز إيه
يا جدع انت ؟

بيومى : فلوسنا لا مؤاخذه ونمشى من بيتك .

عصمت : قول كده من الصبح .. قول من غير خناق .. انت يا
أخى واقف فى حضرتى .. انت مش عارف أنا أبقى
مين ؟!

خليفة : أيوه سعادة عصمت باشا رئيس الحزب ..

بيومى : يا عم هويننا بقى ، مش لاقين تاكلوا وعاوزين
تعملوا حزب !!

نبوية : الأحزاب دى شغل الناس الفاضية .. الرايقة .

بيومى : حلاوتك يا نبوية ، وهو فيه حد بياخد فلوس من ورا
شغلة السياسة .. حد يصدق إن شغل السياسة

بيجيب فلوس .. دى تجيب معتقلات حجوزات ..

نبوية: دا الواد ابن أختى اشتغل فى السياسة دفع دم قلبه
عبال ما نجح فى الانتخاب.

بيومى: من غير كتر كلام .. فلوسنا يا باشا.

عصمت: فلوسنا، فلوسنا .. انت إيه يا أخى لا فى احترام ولا
خشيا، خلاص علشان أنا ساكت .. إيه فلوسكم
دى .. عيب يا أخى انت راجل ابن بلد وعارف
الأصول واللا إيه يا ست الكل ؟!

نبوية: أى نعم يا سعادة الباشا .. معاه حق يا معلم.

بيومى: يا سعادة الباشا ما هو أصل ..

عصمت: (يقاطعه) ولا كلمة بعد كده، مش عاوز كلام
كتير، الراجل عمّال يقولك انت أمين الرأسمالية
الوطنية وانت ولا انت هنا .. فلوس فلوس .. إيديله
فلوسه على داير مليم يا خليفة بيه.

خليفة: نعم .. ما انت كنت ماشى زى الفل، يا سعادة
الباشا.

عصمت: أرجوك إوعى تقولى انه ينفع فى الحزب تانى.

خليفة: يا سعادة الباشا ..

زىزى: فعلاً.. المعلم مش فاهم المسألة خالص.. وفعلاً ما
ينفعش.

عصمت: ولازم ترجعله فلوسه حالا، بلاش كلام فارغ.. أنا
تاعب نفسى ليه وعلشان إيه.

خليفة: دا بيومى يا معالى الزعيم بيومى وحرمة.
زىزى: مش ممكن.

عصمت: زتون بيه.. أرجوك تعالى علشان نستعد لاجتماع
اللجنة التأسيسية.

زتون: تحت أمرك يا زعيم.

زىزى: وأنا جهزت لكم القعدة.. قصدى الأوراق.. اتفضل
معاليك.

بيومى: كلمة واحدة بس يا عصمت باشا..

عصمت: ولا نص كلمة.. خلاص المقابلة انتهت.. إديله
فلوسه يا خليفة بيه.. بس لما أشكّل الحكومة وابقى
فى الوزارة ما تبقاش تندم.. لأن ساعتها مش
هاسمحللك إنك حتى تذكر اسمى.. بينا يا معالى
الأمين العام.

زتون: بينا يا فخامة الزعيم المبجل.

بيومى: يا سعادة الباشا كلمة واحدة ..

زيزى: اتفضل يا فخامة الزعيم .. (هامسة) قبل ما يفوق .

عصمت: (وهو منصرف بعظمة) أرجوك يا خليفة بيه

تخلصهم بسرعة وتحصلنا على الاجتماع رفقى باشا

والجماعة مش لازم يستنوا كتير .. عن إذذك يا هامم

(يخرج وخلفه زتون وزيزى)

نبوية: هامم .. روح الله يفتح فى وشك القبول .. شايف

ولاد الأصول يا معلم .

بيومى: استنى يا نبوية .. يعنى إيه الكلام ده يا خليفة

افندى ؟

خليفة: بيه يا معلم بيه .. خليفة بيه السكرتير العام

للحزب والوزارة المقبلة إن شاء الله بيه يا كرشه

بيه .. تعالى هنا قوللى حسابك كام ؟

نبوية: استنى بس يا سيدنا الافندى ؟

بيومى: يستنى إيه تانى يا نبوية .. الراجل مستعد يدبنا

الفلوس عشان اخواتك ما يفتحوش بقهم .

نبوية: ما لكش دعوة باخواتى ، قوللى يا سيدنا الافندى إيه

حكاية الحزب دى .. صحيح الباشا ممكن يبقى فى

الحكومة؟

خليفة: وليه لأ.. مش رئيس حزب.. وممكن ينجح فى الانتخابات ساعتها يبقى هو الحكومة.

بيومى: يا عم احسب اللي لينا وعد فلوسك..

نبوية: استنى يا بيومى.. انت ما سمعتش عصمت باشا قالك إيه..

بيومى: نبوية.. أنا كل مرة باسمع كلام عصمت باشا وانت بتزعلى.

نبوية: إدينى فرصة اتكلم مع الافندى.. قولى يا خويا بأمانة كده إيه الحدوتة؟

خليفة: (يهمس إليها كأنه سر) الباشا خطوه رئيس حزب كبير قوى.. بس مش عاوزك تقولى لحد..

نبوية: معقول؟!!

خليفة: والفرصة كانت قدامكم.. هو كان ها يبقى أمين الرأسمالية وانت أمينة المرأة..

نبوية: يعنى إيه الكلام ده؟

خليفة: يعنى ها تبقوا فوق.. فوق قوى.

بيومى: وفلوسنا؟

خليفة: ها ترجع تانى للكلام ده .. اتفضل خدها، عد ..
نبوية: استنى يا بيومى .. والحكاية دى يا سيدنا البيه
يتكسب؟

خليفة: إلا بتكسب فى الأول الواحد يضحى شوية وبعدين
يقش .. يفرش علشان الناس تقعد .. وأول ما تقعد
ينزل المشاريب .. وبعدها ما فيش حد ها يخرج من
غير ما يدفع.

نبوية: كلام معقول ..
خليفة: وبعدين انتى عاوزه إيه من الفلوس .. ما الفلوس
عندكم بالكوم .. عملتوا بيها إيه .. لكن لا مؤاخذه
يا معلمة .. انت إيه؟ ولا حاجة .. معلمة كرشة ..
بياعة كرشة.

نبوية: يا سيدنا البيه ما انت كنت حلو فى الكلام ..
خليفة: ما تزعليش منى انتى زى أختى .. أيوه انتى ولا
حاجة بتاعة كرشة ويس كان ممكن .. لكن خلاص ..
خلّى الفلوس تنفعكم .. حسابكم كمام؟
بيومى: يا نبوية .. دى جحر التعبان .. خلينا ناخد فلوسنا ..
نبوية: معلم .. الله .. ما هو صحيح الفلوس عندنا بالكوم ..

كانت نفعت في إيه . فهمنى يا دلعدى الله يخليك ؟

خليفة: انت عمرك دخلتى التلفزيون ؟

نبوية: لأ .

خليفة: طلعت صورتك فى التلفزيون ، فى الجرايد والمجلات ؟

نبوية: لأ .

خليفة: تقدرى تروحي الحفلات الهأى لايف .. تقدرى

تنعشى مجاناً كل ليلة فى أحسن حة ، تقدرى

تركبى القطر من غير ما تدفعى ولا تحجزى .. لأ

طبعا .. عشان انتى بتاعة كرشة .

نبوية: يعنى أقدر أعمل كل ده .. لو ..

خليفة: لو دخلتى الحزب ، ومش الحزب ويس لأ .. انتى

نفسك الحزب أمينة عام الحزب لشئون الستات ..

الجرايد ها تكتب كل كلامك ، والإذاعة تجرى

وراكى والتليفزيون معاكى وهات تصوير .. وكل

اللى عليكى .. الحكومة تقول يمين تَنْتَظِرِى انتى

وتقولى شمال .. الحكومة تقول الزيت موجود تعلّى

صوتك انتى وتقولى هو فىن الزيت يا وزير

الداخلية ..

نبوية: سامع يا بيومي .. كل ده !!
بيومي: يا وليه اعقلي .. احنا ما لنا ومال السياسة ..
خليفة: ومين قالك اننا هانشتغل فى السياسة ..
بيومي: سيدنا البيه أنا حالف ما أصدق كلام الباشا تانى ..
نبوية: نجرب المرة دى يا بيومي .. المرة دى وبس ..
خليفة: ما هو ما فيش فايدة .. الباشا زعل .. خدوا فلوسكم
ومع السلامة .. بس لما الست عطيات بتاعة الممبار
تاخذ مطر حك فى الحزب وتعمل عليكى الشوية أم
عشرة ما تبقيش تزعلنى .
نبوية: لأ فشر .. وأنا ستها وتاج راسها .
خليفة: يبقى تقولى للمعلم .. مصلحته فين ..
بيومي: والفلوس يا حدق ؟
خليفة: الفلوس .. الفلوس .. لما انت خايف على الفلوس
كده وعامل مفتاح سلمتهم للباشا ليه من غير
إيصالات .. ما تفوق يابا .. إنت دلوقتى مش بتلعب
مع الباشا بتلعب معايا أنا .
بيومي: بتلعب ..
خليفة: أيوه .. واللى هانكسبه ها نقسمه علينا .. دى

فرصتك تطلع على وش الدنيا .. تبقى معلم
المعلمين .. شيخ التجار .. الألفة عليهم .. الكلمة
كلمتك والشورة شورتك واللى عاوز حاجة يأبج ..
يدفع .. يكع ..

نبوية: يعنى هانكسب يا خويا؟

خليفة: أمال عاملين حزب علشان إيه يا خالة .. علشان
نصرف عليه دم قلبنا؟!

نبوية: خلاص يا خويا احنا موافقين .. مش كده يا معلم ..
يوه يا أمين الرأسمالية ..

خليفة: وفلوسكم؟

بيومى: ما تلزمني .. اعتبروها تبرع للحزب .. رشة كبيرة
علشان الناس الحلوين اللى فى الحزب ..

خليفة: حلاوتك يا معلم .

بيومى: لأ يا معالى .. خليك حلو قولى يا معالى أمين
الرأسمالية ..

نبوية: الوطنية وشرفك .

فاتن: (داخلة) لأ .. لأ حرام عليك يا خليفة .. ما
تصدقوش النصاب ده .. ده بيضحك عليكم ..

خليفة: فاتن خشى جوا.
بيرومى: مين دى يا خليفة بيه؟
خليفة: دى.. دى مش معانا..
فاتن: أيوه مش معاكم.. وهافضحكم فى كل حنة..
هاقول للناس حقيقتك يا خليفة..
خليفة: مهما تعملى مش هارجعك لوظيفتك تانى.
فاتن: مش عاوزه اشتغل إذا كان كل الشغل زى شغلك..
لكن هاصرخ فى كل مكان.. اصحوا يا خلق..
الكذب بقى بحور هاتغرقكم.. الكذب بقى غول
هاياكل ولادكم اصحوا قبل ما النصابين يتحدوا
عليكم ويبقوا أكثر منكم..
خليفة: فاتن اعقلى..
فاتن: مش هاسكت.. كله إلا البلد..
(موسيقى عالية جداً)
زتون: (داخلاً) معالى صاحب الفخامة رئيس حزب الوداد
ورائد الحركة الودادية والمعلم الأول للحزب
عصمت باشا.
عصمت: (داخلاً يرفع يده بالتحية وخلفه جرجاوى وبقية

فريق الصعايدة بالبنادق)

أهلاً.. أهلاً (تدخل زيزى تحمل أوراقاً كثيرة على

يديها)

فاتن: يسقط الغش والغشاشين..

خليفة: (بصوت عال) الهوا جاب الريح على ملا وشه.

(يتقدم عصمت وخلفه الصعايدة، وفي نفس

الوقت يقبض جرجارى على فاتن فى عنف، ويمنمها

من الكلام)

خليفة: بص شوف الوداد بيعمل إيه (مجموعة فى تشكيل

واضح)

المجموعة: بص شوف الوداد بيعمل إيه.

خليفة: وزعيمكم مين؟

المجموعة: عصمت باشا.

خليفة: وحييكم مين؟

المجموعة: عصمت باشا.

عصمت: (يرفع يده فى عظمة) أرجوكم

بيومى: أجدعها حزب..

المجموع: الوداد..

نبوية: البلدى الأصلي ..
المجموع: الوداد ..
عصمت: اليوم ونحن على أعتاب مرحلة تاريخية ..
زى: (تردد فى هتاف) هيه .. هيه ..
المجموع: الوداد ..
عصمت: اليوم ونحن .. ونحن ..
خليفة: (مصفقاً فيصفق الآخرون) أيها السيدات
والسادة .. وبعد أن استمعنا إلى الكلمات البليغة
التي حددت لنا المصير والمسار، وبعد المناقشة
المستفيضة .. جاءني بطلب موقع عليه من مائة
وسبعين عضو يقفل باب المناقشة .. فالموافق يرفع
يده موافقون ..
فاتن: اسمعوني يا خلق ..
جرجاوى: (يحكم يده على فمها) وخليفة بيه ..
الجميع: أمين الحزب ..
جرجاوى: خليفه بيه ..
الجميع: حبيب الكل ..
خليفة: وإننى باسمكم جميعاً .. أعلن قيام حزب الوداد

بزعامه معلمنا الأول عصمت باشا سيف العدل
الديداموني .. على أن تبدأ فى الحال إجراءات جمع
التبرعات والإعانات لزوم مصروفات التأسيس .

نبوية: شدى حيلك يا زيزى ..

المجموع: شدى حيلك يا زيزى ..

نبوية: ما تشدى حيلك يا زيزى ..

المجموع: شدى حيلك يا زيزى ..

فاتن: (تفلت من قبضة جرجاوى) يا نصابين يا حرامية ..

خليفة: اطلعى بره .. بره .. مفصولة (يسرع إليها جرجاوى

ويمسكها ويدفعها إلى الخارج .. خليفة فى حماس)

كلكم هنا خليفة .. إذا مات خليفة .. فكلكم لا

مساومة بعد اليوم ولا مناقشة بعد اليوم .. لقد

علمتكم أصول اللعبة .. فلا حرية بعد اليوم ولا ..

(يدخل لطفى ومعه محضر وأحد رجال الشرطة-

صول)

لطفى: (داخلاً) بس ولا كلمة، كل واحد يقف فى مطرحه

(يسود الصمت) أهو يا حضرة الصول (يشير إلى

عصمت) عصمت سيف العدل الديداموني قدامك

أهو .. أقبض عليه .

عصمت : جرى إليه يا دكتور .. فيه إيه تانى ؟

خليفة : مين ده يا باشا .. إوعى يكون واحد له فلوس وأنا
ماعرفوش ؟!

لطفى : (خليفة) أنت تخرس خالص .

خليفة : لا دأمش عارف أنا مين .. مين ده يا باشا ؟!

الصول : شوف شغلك يا حضرة الخضر .

عصمت : حصل إليه يا دكتور .. انت كل شوية تيجى ومعاك

ضابط إليه الحكاية المرة دى فيه إيه ؟!!

لطفى : المرة دى فيها معتقل يا عصمت .

زبى : (لى رعب) سى خليفة .. الظاهر اتكشفنا ..

لطفى : ولا حركة يا ست انت ، انت كمان اسمك هنا ..

كلكم أسماؤكم هنا اقرا يا عبد السميع افندى
اقرا .

خليفة : مين ده يا باشا ؟!

لطفى : اقرا يا عبد السميع افندى .

جرجاوى : (داخلاً) الريح جابت الهوا على مالا وشه ..
تنصرف ؟

خليفة: استنى يا جرجاوى .. فيه إيه يا حضرة!!؟
لطفى: أنت بالذات تسكت خالص .. انت لواحدك إعدام
وإذا رأفوا بحالك مؤيد .

خليفة: ليه حضرتك مين لا مؤاخذه؟
لطفى: دكتور لطفى سيد الغزال رئيس حزب الوداد يا
نصابين يا نور .

خليفة: نعم .. بتقول إيه يا دكتور .. جرجاوى .. الريح
جابت الهوا .. عصمت باشا .. نبويه عم زتون ..
انتوا سامعين اللى أنا سامعه رئيس حزب إيه يا
خويا؟

لطفى: الوداد يا افندى يا نصاب .. بقى عاوزين تسرقوا
حقوقى .. وأنا هاوديكم فى داهية .. اقرا عريضة
الدعوى يا عبد السميع افندى .. شوف شغلك .

خليفة: استنى يا عبد السميع افندى .. الحزب ده بتاعى
أنا ، أنا اللى فكرت فيه أنا اللى عملته .. أنا اللى
ألفته من دماغى ..

لطفى: ابقى قول الكلام ده قدام المحكمة يا نصاب .. عاوز
تسرق تعب عشرين سنة؟!

خليفة: مش ممكن .. دا حزبي أنا .. أحلف يا عالم، دى ..
دى كانت لعبة من دماغى حاجة كده زى ما يقولوا
تفنيه .. أنا اللي ولفتها حتى اسألوا عصمت
باشا .. اسألوا عم اسماعيل .. مش كده يا خالة
نبوية، مش كده يا زتون افندى؟

لطفى: كذب، أنا معالى رئيس حزب الوداد وصاحب
الفكرة الأولى .. دا حقى ولا يمكن اسمح لأى
واحد إنه يسرقه منى .. يسرق أفكارى وأعمالى ..

خليفة: حتى فى دى كمان طلعلك فيها عين حسود يا
خليفة .. حتى النصب يا خليفه طلعت خايب فيه ..
حتى الخبيه مش فالح فيها !!

لطفى: شوف شغلك يا عبد السميع افندى .

المحضر: المدعو عصمت سيف العدل الديدامونى .

عصمت: نعم .

المحضر: بتعرف تمضى يا حضرة؟

عصمت: بالفرنساوى معلش .. امضى يا خليفة

خليفة: شوف شغلك يا عبد السميع افندى .

المحضر: إنه فى يومه وتاريخه ومعرفتى أنا محضر ..

خليفة: باختصار الله يخليك .

المحضر: عليكم الحضور أمام محكمة القضاء المستعجل
للفصل فى الدعوى المقامه ضدكم من المدعو لطفى
سيد الغزالى .. وذلك بخصوص سرقة حقوقه
الأدبيه والماديه لاعتدائكم على اسم وشعار حزبه
المسمى باسم الوداد .. وذلك فى اليوم والتاريخ
المحددين .. وقّع يا سيدى وقول إنك استلمت نسخة
من عريضة الدعوى .

عصمت: أوقع يا خليفه؟

خليفة: وقّع يا عصمت باشا .. وقّع .. لكن ولو يا دكتور
لطفى .. عاوز محكمه معاك فى المحكمه .. احنا
اللى فى الآخر هانكسب وإذا كنت بتسرق الكحل
من العين .. فاحنا اللى بنصحنه على السحاب
وهانشوف مين اللى ها يكسب ..

(ستار نهاية الفصل الثانى)

الفصل الثالث

المُنظر: (نفس الصالة السابقة في الفصلين الأول والثاني،

ولكنها الآن مرتبة بحيث تبدو صالة استقبال

للحزب فعلاً، مقاعد جلدية كثيرة، اللافتات

معلقة، اختفت الصور القديمة، مجموعة مكاتب

صغيرة عليها آلات كتابة، المكان هادئ ونظيف

جداً ومرتب.

يفتح الستار ويدخل الدكتور لطفي وخلفه

إسماعيل الذي ارتدى بدلة سوداء رسمية وشرائط

على الكتف.)

لطفي: أنا قلت ميت مرة انسى بقى انك كنت بتشتغل

فى سراية الباشا دى ما بقتش سرايا.. دى فيلا

الحزب.. المركز الرئيسى لحزب الوداد.. مفهوم..

إسماعيل: أيوه يا بيه بس أنا فعلاً باشتغل عند عصمت باشا.

لطفي: وما بقاش باشا.. أقولها ألف مرة.. الأمور اتغيرت

يا عم اسماعيل الفيلا بقت ملك الحزب.. عصمت

باشا ما بقاش باشا.. بقى واحد شغلناه فراش فى

الحزب يودى بوسته .. يجيب الجرايد .. يلمع

الكراسى .. يمسح الأرض .

إسماعيل : دا كتير يا بيه كتير .

لطفى : مش عاجبك مع ألف سلامه .. مش كفايه إنى

وافقت وعملتك ساعى مكتب رئيس الحزب ..

الكرسى ده مش نضيف ليه (ينادى) يا عصمت ؟

انت يا عصمت ؟

عصمت : (داخلا يرتدى ملابس عمال النظافة) نعم يا دكتور .

لطفى : اسمى صاحب الفخامه الزعيم .. فاهم والا اخليهم

يحطوك فى البدروم ؟

عصمت : فاهم يا صاحب الفخامه .

لطفى : الزعيم .. ما تنساش الزعيم .. أقولها ألف مرة .. أنا

مين يا عم اسماعيل ؟

إسماعيل : الدكتور لطفى سعادة الباشا .

لطفى : مش معقول .. أعملكم مدرسه علشان أعلمكم ..

خلاص ما فيش باشويه .. الباشويه دى شيلناها من

أربعين سنه مفهوم .. عصمت فهمه .

عصمت : أيوه يا عم اسماعيل شالوها من زمان .. هم اللى

شالوها .

لطفى: احنا دلوقتى فى عصر المساواه .. عصر الحرية ..
عصر السواسيه .. كلنا هنا سواء .. عصمت هو زى
اسماعيل .. واسماعيل ..

عصمت: زى لطفى .

لطفى: لأ .. لأ يا عصمت .. لأ أنا الزعيم أنا الكل فى
الكل .. انت لسه واقف روح لمع أوضتى أحسن لو
دخلت ولقيت بقعة تراب .. ها يكون حسابك
عسير جداً ..

إسماعيل: هاروح أنا يا فخامة الزعيم .

لطفى: لأ .. هو عصمت سيف العدل .. اتفضل على جوه

(لعصمت الذى يخرج)

إسماعيل: لا حول ولا قوة إلا بالله .. سيحان المعز المذل !

لطفى: وأنت روح شوف لى جرجاوى حالاً .

إسماعيل: استر يارب .. جرجاوى ليه تانى .. ما الحال ماشى
كويس أهوه .

خليفة: (داخلا) دماغى هتفرقع روح اعمل شأى يا عم
اسماعيل .

إسماعيل: انت جيت يا وش السعد.

خليفة: عم اسماعيل جراك إيه .. كل ما تشوفنى تسمعنى
الكلمتين دول .. زعلان ليه .. كنت بتشتغل وما
بتقبضش .. دلوقت بتقبض وما بتشتغلش عاوز إيه
تانى؟!

إسماعيل: عاوز اشوف آخرتها .. أروح أجيب لك الشاى.

خليفة: هالو .. فخامة الزعيم (يرفع يديه لكى يحتضن
لطفى)

لطفى: هالو .. معالى النائب (يتقابلان ويتعانقان فى
حرارة)

خليفة: أظن فخامة الزعيم مبسوط.

لطفى: مش قوى يا معالى النائب مش قوى .. فيه حاجات
كثير لازم نعملها.

خليفة: كله ها يتعمل .. بس انت روق كده وخذ نفسك
واقعد فى كرسى الأبهة ده .. واسمعنى ..

لطفى: اوعى تقولى انهم رفضوا إشهار الحزب؟

خليفة: لأ ما تخافش .. لسه بدرى .. بس الظاهر
هايحصل .. دانا عندى معلومات .. وعامل لى

تقيل .. وأنا كنت مخموم خمة ياجدعان !!

لطفى: حصل إيه فهمنى؟

خليفة: أبداً ولا حاجة .. دول ما قبلوش الورق من أصله ..

لطفى: بتقول إيه؟!

خليفة: روق آمال يا فخامة الزعيم .. روق وفتح مخك كده

وبحلق فى وشى.

لطفى: إيه العبارات دى يا معالى النائب احنا مش اتفقنا ..

خليفة: حلو .. اديك قلتها .. اتفقنا .. مين اتفق مع مين؟!

لطفى: أنا وانت ..

خليفة: حلو قوى .. اديك بتقولها .. انت وانا اتفقنا مش

كده؟

لطفى: وكل حاجة على المكشوف.

خليفة: لأ للأسف .. ولا على المكشوف ولا حاجة .. طلعت

انت مخبى كل حاجة .. مخزن .. وأنا مخموم حنة

خمة.

لطفى: أستاذ خليفه أنا مش ممكن أقبل ..

خليفة: اسمع امال .. انت ها تقبل وتمضى يا عم لطفى ..

لطفى: معالى نائب الحزب.

خليفة: مش لما يبقوا يقبلوا الورق الأول .. خوفتني عملت
لى قضيه وخذتنا فى دوكه .. ولهفت الفلوس
وشرب عصمت باشا المقلب وقبل يشتغل ساعى ..
يا عم لطفى !!

لطفى: أستاذ خليفه ..

خليفة: أيوه قول كمان مرة .. أستاذ خليفة أنا فعلاً أستاذ
معايا شهادة تثبت إنى أستاذ .. شهادة صح ..
شهادة ميرى مختومة بختم ميرى ما يقدرش حد
يقولى إنها مش صح .. أنا أستاذ يا عم لطفى ..
معايا شهادة بحق وحقيقى .

لطفى: خليفة بيه إيه الحكاية .. حصل إيه ؟!

خليفة: وشاويش ومحضر .. ومحكمة .. وهله .. وكلناها
كلنا .. حتى عم زتون المدرس المحترم صدق .. إذا
كنت أنا صدقت واتفقت معاك .. بلاش المحكمة ..
بلاش القضايا ندخل شركا مع بعض .. وأول ما
اتفقنا .. ما فيش أسبوع إلا وهُب .. طيرت عصمت
سيف العدل .. قلبته بقدرة قادر من باشا صاحب
السرايه دى .. لساعى بيشتغل بلقمته .. دا ان

طالبها من حنك السبع ..

لطفى: المساواه والعدل .. قيمة الإنسان بعمله .. وأننا فى

حزب الوداد ..

خليفة: يا عم روق بقى .. روق .. يا عم لطفى .

لطفى: إيه حكاية عم لطفى دى .. أنا اسمى ..

خليفة: قبل ما تكمل .. عارف ان اسمك فخامة الزعيم ..

بس أنا اللي اديتك الاسم ده .. وأنا برضه اللي

بشيله منك .

إسماعيل: الشاى يا معالى النائب .

خليفة: عم اسماعيل .. جرجاوى فين ؟

إسماعيل: إيه الحكاية كله بيدور على جرجاوى ليه النهارده ؟!

خليفة: عاوزه يا عم اسماعيل .. عاوزه .. واسمع عاوز كل

أعضاء اللجنة التأسيسية .. فيه بيان هام هاذيعه

عليهم .. بيان هيعدل المقلوب ويقلب الظالم .

لطفى: أستاذ خليفه مش معقول كده ..

خليفة: أنا اسمى صاحب الفخامة رئيس الحزب واسكت .

إسماعيل: هو إيه .. كل شوية تغيروا .. ما ترسوا على بر !!

خليفة: روح هات لى جرجاوى .. وخلص زيزى تستدعى كل

أعضاء اللجنة التأسيسية .. بسرعة (إسماعيل

يخرج)

لطفى: خليفه .. إيه الحكاياه .. احنا اتفارقنا راح فين ؟

خليفة: هتعرف كل حاجه قدام اللجنة .

لطفى: لجنة .. اللجنة دى انت اللى عاملها .. وأنا لا يمكن

أسمح باجتماع من غير إذننى .

خليفة: لأ هاتسمح وهتوافق على انى أصلح واحد لرئاسة

الحزب .. آه أنا بشهاده مبرى مش شهاده مزوره يا

لطفى افندى .. وكممان فكرة الحزب فكرتى

ملكى .. ملكى يا حرامى يا نصاب .

لطفى: يا أستاذ خليفه أنا مش عارف بتكلم عن إيه ؟!

خليفة: بقى مش عارف يا عم لطفى .. يا دكتور لطفى .. يا

حكيمباشى مستشفى لطفى .. انت إيه .. جتتك

إيه .. انت ما عندكش إحساس ليه يا نصاب يا مزور

يا ضلالى ..

لطفى: لا أنا لا يمكن أسمح لصعلوك زيك يكلمنى

بالشكل ده .. انت عارف بتكلم مين ؟!

خليفة: حلو .. سؤال زى العسل .. كل واحد يتخانق فى

الشارع يقولك انت عارف بتكلم مين .. واللى قدامه
يتخض .. باكلم مين يا عم لطفى .. إذا كنت جدع
عرفنى .. لو الواحد قال للى بيزعق له .. انت تبقى
مين .. ها يسكت ها ينكبس .. انت مين يا دلعدى ..
هاتكون مين يعنى ؟ !

لطفى: أنا لازم أفصلك من الحزب وأخلّى جرجاوى يرميك
فى البدروم.

خليفة: خوفتنى يا دكتور .. دانا هافضحك قدام اللى يسوى
واللى ما يسواش .. ولو ان ما فيش حد ما يسواش
إلا أنت .. بقى يا راجل يا حرامى تعمل دكتور مرة
واحدة !!

جرجاوى: (داخلا) الهوا جاب الريح على ملّى وشه ..

خليفة: الهوا جاب عم لطفى على وشه يا جرج.

جرجاوى: أوامر فخامة الزعيم (للطفى)

لطفى: خد معالى النائب وخليه يستريح فى البدروم كام
يوم يا جرجاوى.

جرجاوى: اتفضل يا معالى.

خليفة: (مأخوذاً) جرج .. اسمع الكلام اللى أنا هاقوله ..

جرجاوى: معايا يا معالى بالذوق بلاش استعمل معاك انت
بالذات العافيه.

خليفة: جرج.. دانا اللي عينتك فى الحزب أنا اللي
هاخليك تاخذ كل فلوسك ..

لطفى: بسرعه يا جرجاوى.. وانا شغل.

جرجاوى: أوامرك يا فخامة الزعيم.

خليفة: جرج.. اسمع بس.. فيه بيان هام هاقلوله ها تعرف
ان الراجل ده نصاب .

لطفى: مش عاوز اسمع صوته.

جرجاوى: هانكتمه يا فخامة (يضع يده على فم خليفة) يعنى
لازم تخلىنى أعمل فيك كده ياسى خليفه.. قدامى.

لطفى: ومش عاوز أشوف وشه تانى..و..

جرجاوى: أوامرك يا فخامة (يختفيان)

لطفى: سيبت جتتى جتك البلا.. بس عرف منين.. دا
أكيد عنده معلومات.. أنا لازم اتصرف (يتحرك..

تدخل زيزى)

زيزى: على فين يا فخامة الزعيم؟

لطفى: زيزى أهلاً.

زىزى: أنا عاوزه اتكلم مع فخامتك فى موضوع مهم قبل

الاجتماع ..

لطفى: آسف يا زىزى .. أنا أصلى لازم أخرج دلوقتى .

زىزى: مش قبل ما تسمع أنا عاوزه أقول إيه ..

لطفى: أصل ..

عصمت: (داخلاً) أوضة فخامتك جاهزه يا فخامة الزعيم .

زىزى: عصمت باشا؟؟!

لطفى: ما بقاش باشا .. بقى عصمت بس .. عصمت

حاف .. اتفضل انزل انت .

عصمت: أوامرك يا فخامة الزعيم (منصرفاً)

زىزى: عصمت؟؟!!

لطفى: زىزى .. أنا مشغول .. مشغول قوى وعاوز امشى

زىزى: مش لما تسمع أنا جمعت كام تبرعات وإعانات

تأسيس ..

لطفى: والفلوس فين؟

زىزى: والفلوس أهى .. لأ أنا مش جيباهم بالساهل .

لطفى: فعلاً لازم تاخدى حقتك .. خدى اللى يكفيكى .

زىزى: مش قبل ما تسمعنى وتوافق على رأيى ..

لطفى: زيزى هاتم هاتى الفلوس وبعدين تتكلم.

زيزى: أنا بقى يا أخويا مش هاتم .. أنا جمعت الفلوس دى كلها علشان الحزب .. آه .. أنا صحيح فى الأول كنت وخذهاها لعب ، لكن وأنا باتكلم مع أصحابى .. لقيت أنها فكره حلوه .. ليه ما نعملش حزب ؟

لطفى: ما احنا عاملين حزب .

زيزى: لا .. حزب بجد وحقيقى مش لعب زى ما قال خليفة .

لطفى: خليفة تم فصله وإبعاده لأفكاره الهدامه ، تصورى كان عاوز يعمل انقلاب فى الحزب !

زيزى: أنت مصدق نفسك يا دكتور .. أنا قصدى انى هاعمل حزب بجد .. حزب للفن .. لازم العيل من صغره يطلع يحب الفن .

لطفى: حزب رقص بقى .

زيزى: هو الرقص عيب ؟! .. ما هو الرقص جزء من الفن .. والفن تعبير عن المجتمع .. والحزب لازم يعبر عن الجمال فى كل مكان .. فى البيوت فى الجنائن فى

الميادين فى المواصلات .. فى كل مكان .. والجمال
هو الفن .

لطفى: دا إيه دا كله يا ست زيزى !
زيزى: إيه مستغرب يا دكتور .. علشان أنا رقاصه .. هو
يعنى قبل ما أكون رقاصه مش بنى آدم .. إنسانه ربنا
خلقها تحب كل شىء حلو فى الدنيا ..

لطفى: والحزب ده اسمه إيه بقى ؟ !
زيزى: مش مهم الاسم .. المهم يقدر يعمل إيه .. يقدر يقدم
إيه للناس للبلد .. إيه خطته .. إيه هدفه ؟

لطفى: هاتى الفلوس وبعدين نتكلم هاتى .
زيزى: آسفه يا فخامة الزعيم .. أنا هاتكلم الأول قدام
اللجنة التأسيسية وبعدين ناخذ الآراء .. وإذا كانوا
موافقين على كلامى .. يبقى أنا الزعيمه .

لطفى: لا الظاهر انت كمان لازم تحصلى خليفه .. يا
جرجاوى .

زيزى: دكتور لطفى .. انت ليه بتزعج من المناقشه .. إذا
كان رأى مش عاجبك ناقشنى .. اقنعنى بانه غلط .
لطفى: أناقشك انت ؟ ! يا جرجاوى ..

زى: المفروض انك فخامة الزعيم واحنا أعضاء اللجنة

التأسيسية.. والمفروض..

لطفى: مين علمك الكلام ده كله.. دا كلام كبير قوى يا

زى؟!

زى: ناقشنى.

جرجاوى: الهرا جاب الريح على ملئ وشه.

لطفى: البدروم (مشيرا إلى زى)

زى: لأ يا جرجاوى لا.. اسمعنى يا فخامة الزعيم.. احنا

لازم نبقى أحرار زى ما بتقول سواسيه.. كل واحد

له رأى يعبر عنه وبعدين ناخذ الأصوات..

لطفى: البدروم يا جرجاوى..

زى: جرجاوى.. مش فخامة الزعيم قال كده.. كل

واحد له حق التعبير عن فكره؟

لطفى: مش عاوز اسمع صوتها.. جرجاوى..

جرجاوى: أنتوا إيه (يسكها ويكممها) لازم الواحد يبقى

عنيف.

لطفى: مش عاوز أشوف وشها.

جرجاوى: أوامرك يا فخامة.. قدامى (يخرجان)

لطفی: الفلوس .. الفلوس معاها .. جرجاوی (یخرج)
عصمت: (داخل) أخيراً يا مدحت افتكرت بابا .. أخيراً
افتكرتني يا مدحت .. وجواب مرة واحدة .. ما
حدث هنا اقعد استريح وأقرا الجواب تاني.
إسماعيل: (داخل) قول عاشر يا معالي الباشا.
عصمت: (مأخوذاً ثم يكتشف إسماعيل) هوانت يا عم
اسماعيل.
إسماعيل: بقينا أغراب يا عصمت باشا .. وبقيت انت مش
قادر تقعد على كرسي في بيتك عشان تقرا جواب
على راحتك !!
عصمت: حالي صعب عليك يا عم اسماعيل.
إسماعيل: حالك يصعب على اللي قلبه حجر يا عصمت باشا.
عصمت: بس تعرف يا عم اسماعيل .. أنا استاهل اللي
يجرالي أكثر من كده ..
إسماعيل: ما تقولش كده يا عصمت باشا.
عصمت: لأ يا عم اسماعيل .. وانت كمان تستاهل ..
إسماعيل: وأنا ليه يا عصمت باشا ؟
عصمت: علشان كنت شايف الغلط وسأكت عليه .. كنت

شايفنى عايش فى الوهم .. عايش فى عالم تانى فى
برج تانى وساكت .

إسماعيل : وأنا بس كنت هاقدر اعمل إيه ؟

عصمت : تصحىنى تقولى لأ .. حتى ابنى مدحت .. ما
حاولش يساعدى سافر .. كنت هاعمل إيه .. راجل
ما يعرفش حاجه غير انه يشخط فى الناس .. ما
عنديش غير سرايا ملك .. وابن وحيد .. الابن
سافر وما سألش نفسه سؤال واحد .. أبويا جاب
كل ده منين .. صرفت عليه ثمن آخر قيراط فضل
عندى .. وكنت فاكر انه هابقعد جانبى .. هاشتغل
ويخلينى أكل جبهه .. أعيش وأنا باشم ريعته ..
سافر يا عم اسماعيل .. وسابنى زى شجرة السنط
العجوزه .. الشجرة طرحت شوك يا عم اسماعيل
ماكانش عندها إلا الشوك يا اسماعيل .. شوك شوك
الناس وشوكت .. خلأنى خيشة قديمة كل واحد
داخل يمسخ رجليه فيها .. نسيوا كل حاجة كانت
حلوه فى حياتى ومافتكروش غير شجرة السنط يا
عم اسماعيل لغاية ما قطعوها ورموها للولعه

تاكلها .. أنا في نار يا اسماعيل .. نار والعه ..
إسماعيل: مش ممكن يا عصمت باشا .. مش ممكن، أنا هاعمل
المستحيل علشان ترجع زى الأول.
عصمت: ما تتعيش نفسك أنا نفسي مش عاوز أرجع زى
الأول. أنا عاوز أكفر عن غلطتي .. وكل اللي باحلم
بيه أشوف ابني مدحت قبل ما أموت.
إسماعيل: ها تشوفه يا عصمت باشا ها تشوفه وترجع
السراية خالها.
عصمت: ما فيش حاجة بترجع يا عم اسماعيل .. اللي حصل
علمني حاجات كتير .. علمني ان ما فيش حاجة
بترجع .. الدنيا بتمشي لقدام واللي ما يقدرش
يحصلها ويمشي معاها بتدوسه وأنا خلاص الدنيا
داستني .. هاروح المع أوضة الاجتماعات .. بيقولوا
فيه اجتماع مهم للجنة التأسيسية .
إسماعيل: عصمت باشا (وهو يبكى)
عصمت: تحب تعرف مدحت ابني قايلي إيه في الجواب؟
إسماعيل: طبعاً يا باشا .. ما هو ابني انا كمان .. اتفضل يا
باشا علشان تستريح .. اتفضل (يخرجان)

زتون: (داخلا) هو ما فيش حد هنا واللا إيه.. الظاهر
جيت بدري.. ما أقعد استريح أنا أصلى لفيت على
كل مدارس القاهرة.. لفيت كتير قوى.. كان لازم
افتش على المدارس أمال إزاي أبقي وزير من غير ما
أعرف حالة المدارس الحقيقيه.. وأدى قعده..

بيومى: (داخلا) يا ميت مسا على معالى أمين التعليم.

زتون: يا أهلاً يا معلم.

بيومى: معلم إيه بقى يا زمل.

زتون: قصدى يا معالى.. يا معالى أمين الرأسماليه.

بيومى: يا سلام يا معالى التعليم.. دى شغلانة الأحزاب دى
جميلة بشكل.. بصراحة أنا ما كنتش متصور انها
ها تبقى بالحلاوه دى.. دى سهله خالص.

زتون: أنا بقى تعبت.. تصور يا معلم.. قصدى يا معالى

أمين الرأسماليه الوطنيه.. أنا لفيت على مدارس

القاهرة مدرسه مدرسه.. وكل مدرسه كنت لازم

أخطب فيها.. رغم ان نظار المدارس والمدرسين كانوا

فى غاية الدهشه.. كلهم قال إيه بيقولوا عمرنا ما

سمعنا عن الحزب ده.. احنا لازم نعمل دعاية

(بيومي يضحك) دعايه علشان الناس تعرف
حزبنا .. حصل إيه يا معالي أمين الرأسماليه ..
بتضحك ليه ؟!

بيومي: أصله حصل يا معالي التعليم .. حصل ..

زتون: هو إيه اللي حصل ؟

بيومي: الدعايه .. صرفت عليها ميت ألف وشرفك ..
تليفزيون وسيما وإذاعه وجرايد وكله .. حتى
اتفضل دى حاجه بسيطه .

زتون: إيه دى ؟ (يمسك الساعة)

بيومي: ساعه .. ساعه تخطها فى جييك .. كل شويه تقولك
بيومي كرشه .. أمين الرأسماليه الوطنيه حزب
الوداد .

زتون: ساعه بتتكلم ؟! (يقلبها بين يديه)

بيومي: املاها وانت تسمع .. شوف (يدير الساعة نسمع

الصوت)

الصوت: (صوت حريمى بدلال) بيومي كرشه .. أمين
الرأسماليه الوطنيه حزب الوداد .. لحمه مفرومه
الكيلو بتخلاته جنيه .. لحم على الفرازة الكيلو

بسبعه جنيه .. بوفتيك وريش وخلافه .. بعشره
جنيه .. ١٧ و ١٧ شارع المديح وله محلات كمان
بسوق الخضار .. انت تنقى واحنا نختار ..

بيومي: اتفضل هدية يا زتون بيه.

زتون: دى حاجة حلوه قوى .. دانت على كده صرفت
كتير !!

بيومي: لا معاليك ما شفتش الباقي .. دا غير لا مؤاخذه
الخته بتاعتنا .. كلها كده بتشغى
إعلانات .. ومحسوبك نازل كلام .. اللي يقولى
امتروها يطلع الهرم؟ أقوله طبعاً أمال إيه .. واللى
يقولى ها توزعوا العيش على البيوت أقوله طبعاً
أمال .. طيب دا حنة ولد سألنى سؤال إنما إيه ما
عرفتش منه ولا كلمه ..

زتون: وبعدين جاوبت ازاي؟

بيومي: هي شغلانه .. يا معالي زتون بيه .. احنا ولاد بلد
ونفهمها وهي في العش قبل ما تطير كمان .. احنا
ياا اللي عملنا الحجاره سندوتشات وغمسناها
بالزلط هاو ..

زتون: فَاكِر السَّوَالِ يَا بِيَوْمَى بِيه؟
بيومى: أصله كان بالعربى الكبير قوى.. روحه قايله
بعربى أكبر منه: إطلاقاً.

زتون: من غير ما تعرف معنى السؤال؟!
بيومى: إطلاقاً.. وصقفوا تصقيف.. عيال المدارس بقم
نحل حوالين الدكاكين بتاعتى أصلى باوزع عليهم
ششط جلد مكتوب عليها.. بيومى رأسماليه.

زتون: بس؟!
بيومى: اختصار للاسم.. يا سلام يا عالم على حكاية
السياسة دى سهله قوى.. لدرجة انى بأفكر أخلع
من هنا وأروح أعمل حزب أنا والعيال بتوع حتتنا.

زتون: عيال؟
بيومى: آه.. قصدى أصحابي المعلمين اللي زبي.. حزب
كده إنما يعجب الناس.. بس حرمانا المصون مش
موافقه بتقول إحنا ادينا كلمه للناس وبعدين
فلوسنا لسه ما استثمرنهاش كويس.. قولى يا
معالي أمين التعليم هم مش هايصرفوا دفعه من
الأرباح..

زتون: أرباح إيه يا معلم .. ما الشركات اياها طلعت ..
بيومي: لأ قصدى أرباح الحزب .. أنا سمعت ان الفلوس
داخله على ودنه

زتون: هي السياسه باظت من شويه .. ما هو من أمثالكم ،
الرعاع أمثالكم اللي فاكرين الدنيا فلوس ويس ..
معاك قرش تساوى قرش .. لا يا حضرة احنا عملنا
الحزب علشان نصلح الكون علشان نحدد شباب
البلد عشان نرد عنها الأعادى وكيد الأعادى عشان
نحارب أمثالك من ..

نبوية: (داخلة) جرى إيه يا عمر معلّى صوتك على صوت
الرأسماليه ليه ؟ .. انت تبقى مين ؟ .. دانت حتة
مدرس لا طلعت ولا نزلت .. دانا عندي دسته منك
بيدوا الواد حميدو ابني دروس وياريته فالح .. لسه
ما تخلقش اللي يعلّى صوته على صوت رأسمالية
المعلم بيومي .

زتون: ما هي كرشه .. هاتبقى إيه يعنى .. زيك بالضبط ..
إذا كانت بتبيع المخ بالكيلو وداخله الحزب
وعملوها أمينة المرأة .. المرأة انظلمت بيكى يا

معالي كرشه هاتم .

بيومى: الله .. الله .. جرى إيه يا جدع .. انت نازل فينا
تليخ ليه ؟!

نبوية: سيوهلى يا معلم ..

بيومى: معالى المرأة .. ولا كلمه ، وأنا واقف .. هو أنا
طرطور .. هو أنا خيشه .. هو أنا لا مؤاخذه ديبحه
مسلوخة ملهاش رأى وأنا معالى الرأسماليه كلها .

زتون: الحق مش عليك .. الحق على خليفة .

بيومى: أهو كده .. أهو اعتذر يا معالى المرأة .

نبوية: ناس ما بتختشيش الا بالعين الحمرا .. خلاص يا
معالى الرأسماليه ربّطت مع كل الجدعان بتوعنا ..
الرئيس عبد الصمد .. راح يحمّل عربيتين من
المدبح .. والواد عويس راح بلدهم ومعاها كام عربيه
وما تخافش الأغلبيه معانا .

بيومى: وفهمتيهم ها يقولوا إيه ؟

نبوية: هى حكاية .. كل شويه يزغقوا ويقولوا .. يا خليفه
قول بالحق لطفى زور والا لأ ..

زتون: إيه الحكايه انتوا ها تعملوا مظاهره ؟!

بيومى: اسمع يا معالى أمين التعليم.. أنا عندى فلوس كتير

وهو حته عيل بنترجاه من ربنا.

نبوية: مش عاوزين حاجه من الدنيا إلا نشوفه قاعد على

كرسى وبیشخط فى الناس.

زتـون: هو إيه الحكايه كرسى إيه.. وعيل إيه؟

بيومى: كلام فى شرك.. احنا هنعمل انقلاب.

زتـون: يا نهار مش فايت.. أنا ماليش دعوه.. أنا أشجب

كل ما تهمس به.. أنا هاوديك فى داهيه.. أنا

هابلغ عنكم..

نبوية: ما تروق أمال يا سيدنا الأستاذ.. ها نديك عشره.

زتـون: مش ممكن.. أنا هابلغ البوليس.. النيايه.. مجلس

الأمن.. أنا مع الشرعيه وضد الفوضى..

بيومى: شرعية إيه هو احنا فى محكمه ما تروق أمال..

هاخليك نائب الرئيس.. مبسوط؟

زتـون: مش ممكن.. أنا أشجب كل أعمالكم وأندد بكل

عنف..

بيومى: وهاديك ٢٥ ألف.

نبوية: ومن عندى زيهم.

بيومى: بس وافق ..

زتـون: لا يمكن .. دا الكلام معاك يودى أبو زعبل .. أبو
زعبل مين دا يودى لعشماوى .. أنا أشجب وبإصرار
وعن قناعه متضامنة ذلك الذى يهدد به لسانك ..
(نسمع أصوات عالية: يا خليفة قول بالحق لطفى

زور والال)

نبوية: وصلوا يا معلمه وصلوا ..

بيومى: نبويه .. قولنا إيه .. بقالنا سبع ليالى بنذاكر .

نبوية: يا فخامة الرئيس بيومى كرشه .

بيومى: إيه رأيك يا زتون .. مش أنا بزمتهك أنسب لرياسة
الحزب من الدكتور لطفى إيه رأيك معايا بقى ولا
إيه؟

زتـون: هو انت تبقى رئيس الحزب؟!

بيومى: أيوه .. نشيله فى حركة كماشه .. العيال الجزارين
واللى معاهم يزغقوا تروح انت ماسك الميكرفون
وتقول لأعضاء الحزب وهم السلطه العلويه فى
الحزب اختاروا بيومى كرشه .

صوت جماعى: ان جيت للحق بيومى أحق (تتكرر الهتافات من

الخارج (

بيومى: شايف بيقولوا إيه؟

عصمت: (داخلًا) عن إذنكم يا معالى الأمناء.. اتفضلوا فى قاعة الاجتماعات الرئيسيه.. اتفضلوا فخامة الرئيس فى انتظاركم.

زتون: عصمت باشا.. بقى الزمن يعمل فيك كده؟!

عصمت: سامحنى يا زتون.. خدعتك وغشيتك.. يا ريت تسامحنى..

زتون: يا راجل ولا يهملك ما هو الدكتور لطفى تعهد بدفع الفلوس بعد الحزب ما يقف على رجله.

الصوت: ان جيت للحق بيومى أحق (من الخارج بصوت واضح)

بيومى: نبوية اخرجى قولى لعبد الصمد.. اسكت لغاية ما نديله الإشارة.. احنا عاوزين ناخده على خوانه.. وانت يا عصمت تعالى هنا..

عصمت: نعم يا معلم بيومى.

بيومى: اسمى معالى الرأسماليه يا عصمت.. انت إيه مش يتفهم.

عصمت : معاك حق .. نعم يا معالى الرأسماليه .. هو أنا لو
كنت بافهمم .. كان بقى الحال دا حالى .. اتفضلوا
فخامة رئيس الحزب فى انتظاركم .

بيومى : اتفضلى يا معالم هاتم .. زى ما اتفقنا يا زتون
(يخرجان)

نبوية : اتفضل يا معالى الرأسماليه .. ما تنساشى القره يا
عصمت (يخرج)

عصمت : حاضر يا هاتم .. حاضر .. (يخرج الخطاب من
جيبه) مش كنت فضلت معايا يا مدحت (يخرج
وهو يقرأ فى الخطاب)

خليفة : (داخلا ومعه زيزى وجرجاوى) عشان انت غبى ..
مش بتفهمم .. مين اللى عَيْنَك مين اللى جابلك
الليس ده .. مين اللى خَلَاكَ تقبض بالدولار؟! !

جرجاوى : المسامح كريم يا خليفة بيه .

زيزى : وأنا تعمل فيا كده يا ابو البلديات؟! !

جرجاوى : الله مش سى خليفة علمنى اسمع كلام اللى يعمل
ريس عليكمم .. أنا ما ليش ذنب الحق على سى
خليفة .

خليفة: اسمعوا مش وقت العتاب .. زى ما فهمتكم يا جرج .. احنا مش ممكن نسيب الحزب يروح من إيدنا ويلهفه الجدع النصاب ده .. أنا هاكشفه .. بس احنا محتاجين أصوات .. قصدى محتاجين ناس يصوتوا .. لا قصدى ناس هتيفه أيوه احنا عاوزين هتيفه ..

جرجاوى: مظاهره يعنى ياسى خليفة؟

خليفة: لأ .. ناس تقف فى اجتماع اللجنة التأسيسية .. ولما يبجى لطفى يتكلم يغلو شوا عليه .. لغاية ما يسكت وابتكلم أنا وساعتها أقول البيان .. بعدها شلة تهتف بعزل لطفى واختيار جرجاوى رئيساً للحزب .

جرجاوى: آنى ياسى خليفة؟!

خليفة: أيوه .. ما فيش غيرك .. انت لامخ ولا تفكير .. واللى هاقوله هتعمله .. يعنى انت هاتبقى ساتر ..

زى: طيب ماعصمت كويس؟

خليفة: زيزى هانم .. كل عصر وله رجالته .. وجرجاوى رجل هذا العصر .. نحن فى أشد الحاجة إلى رجال

والرجال قليل ومنهم جرجاوى .

جرجاوى: يا أستاذ بلاش تريقه !

خليفة: اسمع الكلام اللي باقوله .. رأيك إيه يا ست زيزى

عندك؟ أنا عاوز ناس كثير يحضروا بعد ساعة .

جرجاوى: أنا عندى .. بلدياتى كثير .. وأقدر اجيب ميت

راجل .

خليفة: حلو قوى .. دول فلاحين وعمال عاوزين فئات .

زيزى: وأنا عندى عشرين واحد .. فرقتى اللي بتشتغل

معايا فى الكباريه والأفراح .

خليفة: هایل دول فئات اتصرفوا .. فاكر يا جرجاوى

البلاستيك اللي طبعناها علشان نعلقها على رقبة

الأعضاء ..

جرجاوى: أيوه عندى منها كثير فى البدروم .

خليفة: بلدياتك يعلقوها .. وأول ما أدى الإشارة ..

جرجاوى: يصقفوا ..

خليفة: وبعدين يا أبو البلديات عاوزين عقلك يشتغل

النهارده بس .. كل المطلوب انهم يهيئوا لغاية ما

الدكتور لطفى يسكت .

جرجاری: آیوه فهمت .. (یخرج)

زیزى: خلیفه .. الحکایة کده هانخسر و مش ها نعرف نلم تعبها .

خلیفة: الفلوس معاکی والا لا؟

زیزى: أخذها المفتری خده رینا ، هافضل أدعی علیه طول العمر .. اتقفل فی وشه کل باب و رکه الهباب و ..

خلیفة: ها تعددی .. روحی هاتی الفرقة .. دول ها یبقوا فئات مش معقول حزب کله عمال وفلاحین .. و خلیهم یلبسوا البتاعه السودا اللى فی الرقبه دى ..

زیزى: بس یاسی خلیفه ..

خلیفة: انتی لسه ها تحکی .. بسرعه یا زیزى (یدفعها و تخرج زیزى) بقى کده یا زمن رضینا بالنصب والنصب کمان مش راضی بینا .. أعمل إیه یا امه .. نفسی أنفع فی حاجه .. أقول انا باعمل حاجه .. أنا عارف إنی غلط یا أمه .. عارف إنی .. بس لا هاعملها صح المرة دى .. ولازم تنفع .

لطفی: (داخلا) أنت .. إیه اللى طلعتک من البدروم

(يتادى) جرجاوى ..

خليفة: (ضاحكاً) ما تتعش نفسك جرجاوى بقى معانا .
لطفى: وصدقته؟ .. اسمع يا خليفة أنت ولد زكى أنا ممكن
أدفعلك .

خليفة: اسمع انت يا لطفى .. قبل ما كل الناس تعرف
ويتلموا عليك ..

بيومى: (داخلاً) هو ايه الحكاياه .. ما فيش اجتماع والا ايه
(ثم يدخل كل من زتون ونبوية)

لطفى: فيه اجتماع طبعاً .. طبعاً .. اتفضلوا جوا عبال ما
اتكلم مع سعادة السكرتير العام اتفضلوا .

خليفة: مش قبل ما يسمعوا اللي هاقله ..

لطفى: خليفة .. معلش يا جماعه .. اتفضلوا انتم (يقفوا
فى حيرة)

خليفة: مش قبل ما يسمعوا البيان .. قصدى المعلومات اللي
عندى يا دكتور ..

لطفى: خليفة مش وقته .. اتفضلوا يا جماعه .. احنا
هانحصلكم على قاعة الاجتماعات .

خليفة: ما أنا مش هاسكت لازم يعرفوا .. لازم أقول ..

لطفى: خليفه..

خليفة: عارفين الدكتور لطفى ده يبقى إيه ..

لطفى: خليفه أنا أقدر أعمل فيكم حاجات كتير .. انت أصلك مش عارفنى كويس ..

خليفة: أنا بقى عارفك كويس قوى .. لكن عيب أخبى اللى عارفه عن الناس .. عم بيومى الراجل السكره .. أمين عام الرأسماليه الوطنيه .. الراجل اللى دفع متين ألف علشان تأسيس الحزب ..

زتـون: ما أحنا كمان دفعنا يا سعادة السكرتير العام ..

خليفة: عم زتون .. عم زتون لازم يعرف ..

لطفى: أستاذ خليفه .. أرجوك، احنا اتفقنا على كل شىء.

خليفة: والبدروم يا عم لطفى؟ .. دا اللى أنا عملته رئيس أمن الحزب كان أول واحد بيضرب فيا ..

عصمت: (داخل) الناس اللى جوه بيسألوا عن الاجتماع يا فخامة الرئيس.

خليفة: عصمت باشا .. احضرنا الله يخليك .. احضرنا يا وش الهنا .. دانا كنبت باقول عليك أستاذ النصب كله .. أتاريك حته تلميذ فى مدرسه وناظرها أخونا

صاحب الفخامة لطفى بيه ..

لطفى: خليفه أرجوك .. اتفضلوا يا جماعه .. عصمت وزع

شأى وحاجه ساقعه ..

إسماعيل: الناس بره كتير وأنا خايف على جنيته السرايه ..

عصمت باشا ..

عصمت: بقت مش بتاعتى يا عم اسماعيل .. قول لأصحاب

المعالى.

خليفة: حلو عم اسماعيل احضرنا يا راجل يا طيب ..

كويس قوى ان أهم أعضاء اللجنة التأسيسيه

موجودين .. اسمعوا كلكم .. إليكم هذا البيان

الهام ..

لطفى: ما حدش يسمع الموتور ده .. دا قابض فلوس من

الأحزاب الثانيه، دا عميل .. أكيد انت بتتعامل مع

دول الأعداء.

خليفة: أيوه عشان هاكشفك يا نصاب .. اسمعوا كلكم ..

الراجل ده لا دكتور ولا تخرجى حته .. دا مزور ..

لطفى: كذاب ..

خليفة: (يظهر ورقة من جيبه) دانا عامل حسابى .. وكنت

باصدقك وعامل لك حساب .. قصدى كشف
حساب ٣٥ قضية نصب ، ٢٠ قضية شيك بدون
رصيد .. مطلوب القبض عليه فى سبع دول ..
انتحل شخصية ضابط بوليس وضابط فى القوات
المسلحة وخبير أجنبى وبعدين دكتور .. بقى تعمل
عمليات فى البطن .. دانت مش عارف الفرق بين
الطحال والمخ ..

لطفى: كذاب .. أنا هاوديك فى داهيه .. أنا (يحاول
الخروج)

بيومى: (يمعنه) انت مش ها تخرج من هنا يا فخامة
الرئيس .

زتون: أيوه .. عندك رد قوله واحنا نسمع .

لطفى: أنا بصفتى رئيس الحزب بقرر فصل الأستاذ خليفه
وكل واحد يصدقه .

الأصوات: يا خليفه قول الحق ، لطفى زور واللا لأ (تكرر
نسمعها من الخارج)

خليفة: سامع يا دكتور لطفى ؟

نبوية: ما تتكلم بقى يا زتون افندى .. قول اللى اتفقنا

عليه ..

الأصوات: يا خليفه قول الحق، لطفى زور واللا لأ (تكرر

التهافتات)

بيسومي: انت رايح فين (يمنع لطفى) .. انت مش ماشى من

هنا .. أنا بنفسى اللي هاسلمك للبوليس .. فين

جرجاوى؟

جرجاوى: (داخلاً مسرعاً) سى خليفه .. سى خليفه ..

بيسومي: خده على البدروم يا جرجاوى .. لغاية ما البوليس

يستلمه.

جرجاوى: حد قالك انى باشتغل خفير .. أنا من دلوقتى فخامة

رئيس الحزب .. والراجل ابن الراجل اللي يقول لأ ..

عصمت: انت كمان طمعت فيها !!

جرجاوى: (ينادى) اضرب يا حميده (نسمع فوراً صوت

طلقات نار سريعة)

خليفة: جراللك إيه يا جرج .. احنا ما اتفقناش على كده؟!

جرجاوى: هى حسبة برما يا سيدنا الافندى .. انت مش قلت

اللى ناسه كتير يبقى رئيس الحزب .. أنا معايا ناس

تاكل الحديد .. اضرب يا حميده (طلقات متوالية)

عصمت: جرجاوى اعمل معروف .. السراية هاتتهد .
جرجاوى: ما تخافش يا عصمت باشا .. احنا ولاد أصول
ونعرف الواجب سرايتك حاتر جعلك كل اللى خده
منك اخينا ده هاير جعلك .. مش كده واللا إيه يا
لطفى؟

نبوية: واحنا روحنا فين يا دلعدى .. احنا عندنا بدل
الراجل مليون واد يا عويس .. وري له احنا مين ..

الأصوات: ان جيتوا للحق بيومى أحق (تكرر)

زتون: الظاهر احنا لازم نمشى لغاية ما يتفقوا .

جرجاوى: ما حدش منقول من هنا إلا لما تحلفوا على الخاتمه
إنكم موافقين على جرجاوى رئيس الحزب .. قول
لهم يا سى خليفه ..

خليفة: اقول إيه بقى .. انت معاك بارود وهم معاهم
سوا طير؟!

الأصوات: من غير تهويش جرجاوى أحسن منه ما فيش
(تكرر)

(يفر لطفى منتهزا فرصة الهرج بعد الهتافات ،
يحاول خليفه أن يلحق به ولكن جرجاوى يمنعه)

جرجاوى: سيك منه خلينا هنا.. هيه قولتوا إيه يا جماعة؟
 زتون: أنا عاوز أروح.. أنا حرمت أخرج من دارى تانى.
 بيومى: جراك إيه يا أمين التعليم ما تخليك جدع للآخر.
 عصمت: اتكلم يا عقل الحزب.. يا مفكر يا عظيم.. يا أبو
 مخ كبير.. اتكلم قبل ما يهدوا السرايه على
 دماغنا.. اتكلم يا فالح.
 خليفة: أنا عندى حل يرضى جميع الأطراف.
 بيومى: خليفه افندى.. انت عارف أنا بعزك قد إيه..
 وكم ان أنا أقدر أخليك أغنى واحد.
 جرجاوى: سى خليفه.. انت نسيت قلت لى إيه..
 زيزى: (داخله) إيه الحكاية.. السرايه حوالىها ناس ما
 تتعدهش.. خليفة..
 خليفة: انتى رجعتى ليه؟
 زيزى: الفرقه بتاعى الناس اللى بره حاشوهم.. هو إيه
 اللى حصل؟
 جرجاوى: سى خليفه.. ما عندناش وقت.. قول للناس دى..
 أنا مزاجى متعكر.. اتكلم يا معالى السكرتير..
 نبويه: أستاذ بزمتهك مين أحق بالحزب جوزى المعلم الغنى

المتريش اللي يقدر يصرف على الحزب وعشرة زيه
واللا الغلبان اللي بيشتغل يوم بيوم؟

جرجاوى: حميده..

خليفة: روق يا جرج.. روق مش كده أمال مش كل شويه
بارود.

جرجاوى: ما أنا مش عاوز كلام كتير قول لهم مين رئيس الحزب.

خليفة: اسمعوا يا جماعه.. إنتوا ترضوا بحكمى؟

زتون: خلصنا يا أستاذ خليفة.. أنا عاوز أروح.

جرجاوى: ما حدش منقول من هنا والا نخلي الدم للركب..
اتكلم بقى ياسى خليفة..

خليفة: أنا عندي اختراع تسمعه.. ماشى يا معلم بيومى؟

بيومى: وجب يا عندليب.. المهم يبقى كلام حقانى.

خليفة: وانت يا جرجاوى.. كلامى ماشى؟

جرجاوى: على رقبتى.. بس اياك يبقى كلام مش ابن أصول.

خليفة: عصمت باشا؟

عصمت: إيه عاوز موافقتى يا خليفة.. انت من يوم ما دخلت

هنا وانا بقيت لعبه فى إيدك.. بس الحق مش عليك..

الحق عليا أنا.. قول يا فيلسوف وأنا سامع.

خليفة: عم اسماعيل؟
إسماعيل: عمك اسماعيل عاوز يشوفكم وانتم مروحين..
عاوز يشوف السرايا فاضية.. نضيفة.
نبوية: إيه الحكاية يا أستاذ خليفة.. عندك كلام مهم
قوله.. ما عندكش سبنا احنا نورى للناس احنا
نبقى مين والا إيه يا معلم..
بيومى: وجب يا ست الكل.. اتكلم بقى يا أخينا.. اتكلم
أحسن أنا خلاص زهقت..
زيزى: خليفة.. أنا
نبوية: انتى تسكتى لغايه ما بسلامته يقول هو عاوز يقول
إيه.
جرجاوى: ما تنطق يا أبو البلديات.. انطق..
خليفة: اسمعوا يا جماعه، هى مش الفرخه لها جناحين،
والعصفوره واليمامه.. كل حاجه فى الدنيا لها بدل
الذراع اتنين.. كده والا لأ..
بيومى: قصدك أيه يا أستاذ؟
خليفة: معلم بيومى.. قصدى معالى بيومى بيه يبقى رئيس
الكتلة الرأسماليه.. ومعالى جرجاوى بيه يبقى

رئيس الكتلة الفواعلية .. قصدى اللي بيشتغلوا
بأيديهم .
جرجاوى: مش فاهم؟
خليفة: هاتفهم بعدين .. المهم انك رئيس .
بيومى: دا كلام ما يخشش الدماغ وأنا؟
خليفة: فخامة رئيس الكتلة الرأسمالية .. دا كلام حلر قوى
ويجب همه ووافق بقى خيلنا نفضها .
زبى: وأنا ياسى خليفه وأنا؟
نبوية: انت بتقول إيه يا سيدنا الأفندى .. اتنين رئيس
للحزب .. وكلام مين اللي يمشى؟!
خليفة: اسمعوا بقى .. يا ترضوا بالحل ده يا مفيش حزب .
بيومى: أنا أقدر أعمل حزب على كيفى .
جرجاوى: وأنا اطربقها على دماغك ودماغ اللي يتشد ذلك .
خليفة: بس بقى .. هو دا الحل .. جرجاوى رئيس للكتلة
دى وبيومى رئيس للكتلة دى .. والأستاذ زتون
رئيس محايد .. راجل طيب وابن حلال ..
عصمت: بس أنا مش موافق يا خليفه .
خليفة: انت؟!!

عصمت: آه انت نسيته يا خليفة .. نسيت إني المفروض
الرئيس الشرعي للحزب .. انت نسيت إني صاحب
البيت اللي انت قاعد فيه .. أنا بقى مش موافق ..
زى: عصمت باشا ..

عصمت: ما بقتش باشا .. ما بقتش حاجة خالص .. بس لسه
عندى مخ .. خلاص نسيت أمك ونسيت أهلك
ونسيت انت كنت جاي مصر ليه ..

خليفة: جاي أدور على شغل يا باشا .

عصمت: وما دورتش ..

خليفة: لقيتك بتنصب يا باشا .. لقيتك مدور كل سواقى
النصب .

عصمت: عملت زى .. مش كده .. بس أنا كنت بانصب
على شوية ناس ، ٢٠٠٠ ساكن بيدوروا على شقق ،
٢٠٠٠ واحد بيدور على مكسب زياده .. بانصب
على عدد محدود .. مش زيك عاوز تنصب على
البلد بحالها .. وياريت على البلد ويس .. انت
كمان عاوز تبعها لأى مشترى ..

بيومى: الله .. الله جراك إيه يا عصمت باشا .. ما تروق

أمال احنا برضك مش ها نسيبك هانشرفلك
شغلانة حلوة فى الحزب وها نبسطك .. مش كده يا
فخامة رئيس الكتلة العمالية ؟
جرجاوى : ماشى كلامك يا فخامة رئيس الكتلة الرأسمالية ..
اللى تقول عليه عشان خاطر عصمت باشا أنا
موافق عليه .
عصمت : إيه هاتدوني معالى من عندكم .. مش عاوز .. يفتح
الله .
فاتن : (داخلة) أهم يا حضرة الظابط (تشير إليهم)
خليفة : فاتن (يدخل ضابط شرطة يحدث دخوله ارتباكاً
شديداً)
فاتن : آسفة يا خليفة آسفة .. حاولت اسكت ، حاولت
أفهم ظروفك مقدرتش .. الحكاية مش لعبة يا
خليفة .. الحكاية أهم وأعلى وأعز من مجرد أكل
عيش .
الضابط : انت عصمت سيف العدل ؟
عصمت : أيوه يا حضرة الظابط وكل اللى قالته الآنسه دى أنا
معترف بيه .. ومستعد اتحاكم واللى تحكموا بيه أنا

راضى بيه .

الضابط : وانت خليفه ؟

خليفة : أنا (ينظر إلى فاتن) أنا ولا حاجه .. أنا كنت جاي
أخضر .. أحلامي كانت خضرا ، كل أملى إني
اشتغل بالشهادة اللي حفيت عليها عبال ما أخذتها
أمى دفعت علشانى ربع قيراط وكردان ذهب
وخمسه وعشرين سنه من حياتها . كان نفسى أقول
لأمى متشكرين يا أمه .. أقولها وأنا بأديها كوز فينو
وعلبة حلاوه طحينيه .. لكن يا خساره ها تفضلى
محرومه من الفينو طول عمرك يا أمه .. أنا خليفه
عبد ربه حسانين .. أنا المسئول عن كل شىء ..
مسئول عن نفسى وعن الناس دى كلها .. خدنى
احبسنى . اسجنى بس ما حدش يقول لأمى (فاتن
تذهب إليه وتمسك به)

بيومى : احنا ما لناش لزوم هنا .. بينا يا نبويه (يحاولان
الانسحاب يمنعهما الضابط)

الضابط : على فين يا معلم بيومى .. مش المعلم بيومى برضه ؟
نبويه : جوزى مالوش دعوه بأى حاجه .. أيوه يا حضرة

الظابط احنا ناس على قدنا .. ملناش دعوه
بالسياسة .. أيوه .

بيومى : إحنا يا سعادة البيه كنا جاين نطلب من عصمت
باشا القرشين اللي أخذهم مننا .. واحنا متنازلين
عنهم .

الضابط : متنازل عن ميتين ألف يا معلم ؟ !
بيومى : عليه العوض ومنه العوض .. انضحك علينا يا
سعادة البيه .. ربنا يعوضنا عنهم .. عن إذك يا
سعادة البيه .

الضابط : الله .. إيه يا راجل انت مش عضو فى الحزب واللا
إيه ؟

نبوية : أبداً يا سعادة البيه أبداً .. الله يجازيه سى
الافندى .. هو اللي كان بيزن على دماغ المعلم لكن
المعلم أبداً ما دلوش وش .

زتون : وأنا والله يا حضرة الظابط .. أنا مدرس على
المعاش ..

الضابط : ولك فلوس عند عصمت باشا .
زتون : أبداً .. ما ليش سبونى أروح بقى .

الضابط: وحضرتك؟

زبـزى: أنا بقى بتاعة الفن يا سعادة البيه.

الضابط: ومالكيش فلوس عند عصمت باشا.. ومالكيش فى

السياسة.. إيه رأيك يا آنسة فاتن؟

خليفة: أنا المسئول عن كل شىء يا حضرة الضابط.

جرجاوى: أيوه يا بيه.. هو اللي كان هايودينا فى داهيه يا

سعادة البيه.. أنا كان مالى ومال الحكايه دى من

أصله.. عطلنا يا بيه.. لكن منه لله بقى.

الضابط: يعنى بتعترف إنك معاه فى الحزب؟

جرجاوى: يا بيه هو أنا بأعرف أفك الخط.. حزب إيه.. دا

كان بيتفق معانا على مقابلة نهد السراية دى..

حتى اسأل.. اسأل الرجالة اللي بره.. أنا مظلوم يا

سعادة البيه.

زبـزى: أنا عندي بروجرام هایل يا حضرة الضابط.. يا ريت

تشرف حضرتك.. كازينو الوداد.. لأ.. لأ قصدى

كازينو الورد.. أمشى أنا يا سعادة البيه؟

نبوية: واحنا يا سعادة البيه؟

الضابط: الله إيه يا جماعه.. إنتوا فهمتوا وجودى هنا غلط.

زيرى: يه حضرتك مش جاى تقبض علينا؟

الضابط: أبداً...

خليفة: معقول.. فاتن؟

الضابط: أنا جاى فى موضوع تانى.. لكن بالنسبة للحزب

وماله لما تعملوا حزب.. اتفقوا على هدف.. هدف

يخدم البلد بصحيح وتكونوا قادرين تحققوه

واعملوا حزب علشان.. معلم بيومى عندك هدف

قومى عاوز تحققه وشايف انك قادر تحققه..

نبوية: يا سعادة البيه بقول ل حضرتك جوزى مالوش فى

السياسة.

الضابط: وانت يا أستاذ زتون؟

زتون: أنا من الصبح عاوز أروح.. الروماتيزم حالل عليا

ومش قادر أقف..

الضابط: أستاذ خليفة.. عندك انت الهدف القومى اللى

شايف إنه بامكانك تحققه؟

خليفة: يا حضرة الضابط.. أنا عاوز أدخل السجن.

الضابط: سجن علشان إيه؟

خليفة: علشان أنا كذاب.. وياريتنى كدبت كدبه صغيره

لكن للأسف كدبت كدبه كبيره قوى فاتن .. أنا
كنت تايه .. كنت خالى شغل .. كنت مغمى عني ..
ولما جيت هنا لقيت كله بينصب على كله ..
الضمير خد أجازة .. قلت لنفسي إذا كانت الحكاياه
حكاية لعبه مين أذكي من مين قلت ألعياهم وهم مش
أذكي مننا .. مش كده يا حضرة الظابط .. مش كده
يا جرجاوى .. بيضحكوا علينا .. دائماً بيضحكوا
علينا علشان احنا فلاحين .. بلديات .. ناس طيبين
بنسمع الكلام .. حبيت أقولهم اننا كمان نقدر
نبقى زيهم .

الظابط : المهم عندك شجاعه إنك تعمل حزب له أهداف ؟

خليفة : أيوه .. أيوه أقدر .

فاتن : تانى يا خليفه ؟

خليفة : أيوه يا فاتن .. حزب ما يتكلمش .. حزب يشتغل

بس .. ينتج بس .. يحب مصر من غير أغاني

ومواويل حزب ولاد مصر .. حزب من غير حزب ..

حزب يقول للشمس فى عز الظهر احنا واقفين فى

الغيظ بنزرع ونقلع ، واقفين ورا المكن .. وورا

المدفع .. ما نخافش من لسعتك .. حزب يقول
لمصر .. أنا بأحبك يا مصر مش ببقه ، بإيديه وهى
مليانه غلة ورغيف عيش مغمس بالعسل .. معايا
يا جرجاوى؟

جرجاوى: والفاس والمقطف معايا .

خليفة: وانت يا زتون؟

زتون: كنت ناسى ان تعليم القرابه والكتابه لواحد من
جيرانى هو الحزب بصحيح .

خليفة: خالتى نبويه؟

نبويه: معلم بيومى .. احنا نسينا نفسنا .. نسينا أبوك الله
يرحمه ومكسبه القليل وقلبه على الزبون .

بيومى: أيوه يا نبويه .. نسينا أبويا ونسينا أهلنا .. طمعنا
فى الفلوس اشترينا الفلوس وبعنا لحم ولادنا ..

خليفة: مش إنتوا لواحدكم يا معلم بيومى .. كتير من
الناس عملت كده .. وعلشان كده بقى فيه اللى
زى .. اللى شاف وهج الفلوس وما شافش وش
الحقيقه ..

فاتن: ودلوقت يا خليفة ..

خليفة: ودلوقتى شفت وعرفت عرق الجبين هو الحقيقه اللى
كان لازم نشوفها من الأول .. بينا يا فاتن ..

إسماعيل: والحزب يا سى خليفة؟

خليفة: على حزب وداد قلبى .. مش كده يا عصمت باشا؟

الضابط: بس فيه حاجه مهمه يا أستاذ خليفة .. مهمتى اللى
جائ علشانها ..

خليفة: أيوه صحيح حضرتك كنت جاي هنا ليه؟

الضابط: تانى يا خليفة ها نرجع تانى للسليه يا صاحب
فكرة الحزب ..

خليفة: مش حضرتك قلت ..

الضابط: واللى عمله عصمت سيف العدل .. مش لازم
يتحاسب عليه واللى عملته انت؟

خليفة: أنا ..

الضابط: انت ساعدته وبدل ما تبلغ عنه . وبدل ما تساعد

الناس إنها تاخذ حقوقها .. عاوز تعمل شبكة نصب

جديده .. مش كده يا أستاذ خليفة ..

نبوية: حضرة الضابط احنا مستعدين كلنا نتنازل عن

فلوسنا وعن حقوقنا . مش كده يا جرجاوى .. مش

كده يا زتون .. مش كده يا ست زيزى ؟
زیزى: أبوه يا حضرة الطباط .. مش معقول نقبل انه يدخل
السجن .

الضابط: آسف .. إنتوا ناسيين حق المجتمع اللى مفروض
عاوزين تعملوا حزب تدافعوا عنه ..

خليفة: حضرة الطباط معاك حق .. بس أنا كمان ليّا حق
عند المجتمع اللى بتقول عليه .. كانوا بيعلمونا ليه
لما همه مش عاوزينا .. كانوا بيعشموننا ليه لما همه
مش قادرين .. عاوز حقى يا حضرة الطباط .. عاوز
حقى يا خلق .

ستار ختام

للنشر في السلسلة :

- * يتقدم الكاتب بنسختين من الكتاب على أن يكون مكتوباً على الكمبيوتر أو الآلة الكاتبة أو بخط واضح مقروء .
- ويفضل أن يسلم إرفاق أسطوانة (C.D) أو ديسك إن أمكن .
- * يقدم الكاتب أو المحقق سيرة ذاتية مختصرة تضم بياناته الشخصية وأعماله المطبوعة .
- * السلسلة غير ملزمة برد النسخ المقدمة إليها سواء طبع الكتاب أم لم يطبع .

المحتوى

المحتوى

المحتوى

- على حزب وداد قلبى وقضايا المهمشين ٧
- الفصل الأول ٢٣
- الفصل الثانى ٧٩
- الفصل الثالث ١٤٩

**إصدارات
نصوص مسرحية**

- ٥٥- كوميديا عائلية محمد الشربيني
٥٦- سارة وأخواتها حزين عمر
٥٧- المعجزة ومسرحيات أخرى محمود دياب
٥٨- الرقص على القمر د. عصام عبد العزيز
٥٩- حاصروا المنطقة ممدوح فهمي
٦٠- المؤرقــــــــون عماد مطاوع
٦١- الحب تحت طلفات الرصاص و... العكس هو الصحيح... إبراهيم محمد علي
٦٢- رحلة السندباد منتصر ثابت
٦٣- حكاية من الصعيد خالد حمزة
٦٤- ح. و. ش قراقوش حسن أبو العلا
٦٥- ابن دانيال محمد طلبه الغريب
٦٦- بين نارين رأفت الدويري
٦٧- علي حزب وداد قلبي فتحي سلامة

شركة الأمل للطباعة والنشر
(مورافيتلى سابقاً)

